









DESCRIPTIO

BREDENBERGÆ HOLSÆ

TICÆ SIVE CAMBRICÆ IN STORMA-

ria arcis, conditæ primum à magnanimo Heroe D. IO-

HANNE RANTZOVIO, nunc ab eius filio HENRI-

co regis Danorum consiliario, & in ducatibus Holsatiæ,

Slesuicensi atq; Ditmarsicæ vicario nouis ædificijs, pluri-

misq; versibus & sententijs, lectu cum frugiferis, tum ius-

cundis sic expolitæ, vt Martem cum Minerua

in hac ornanda, amicè coniurasse lector

deprehendere possit.

A V T O R E

GEORGIO CRVSIO HANNO-

VERENSI.



ADIECTA EST BREVIS NAR-


RATIO, VNA CVM EPISTOLIS ET EPITAPHIIS

nonnullis de vita, precipuis rebus gestis, & obitu nobilis ac strenui viri, D A-

NIELIS RANTZOVII, copiarum serenissimi Regis

Danorum Frederici II. in Succos pri-

marij ductoris.



WITEBERGÆ

EXCVDEBAT IOHANNES

CRATO,

ANNO M. D. LXX.

007143256

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

1000 1000 1000 1000

NOBILI EQVITI HOLSATO HEINRICO

RANTZOVIO, REGIS DANORVM FRIDERICI II. in Ducatibus Holsatico, Slesuicensi, & Dithmarsiae Vicario consiliarioq; Bredenbergæ, Rantzouisholmiæ, Vandesburgi & Tuschulabecani Dominum, Patrono & Mecænati suo obsequiandissimo. S. D.



LECTVM, PATRONE OPTIME, IN multorum est ore: Quem ingratitude reum feceris, cum merito omnium vitiorum in simulabis. Nam sicut gratitudo duabus præstantissimis virtutibus, veritate & iustitia, quibus homines Deo proximi fiunt, constat: Ita ingratitude ex turpissimis vitijs, Mendacio & Iniustitia, quibus ~~deus~~ Sathanæ simillimi sumus, constari necesse est: ex quibus, si non pullularet velut ex radicibus tota vitiorum arbor, virtutum tamen adnata, si quæ esse possent, ceu taxi præsentissima umbra, infusarentur et decorarentur.

Etenim statuae virginæ affaberrimè factæ, vel ipsi etiam Pandoræ ocelli exculpantur, labella utraq; detruncantur, quid artis, quid pulchritudinis reliquo corporis trunco erit? Euellatur pe-

A

ij

ctori

1819
1000

1000

1000

1000

1000

NOBILI EQVITI HOLSATO HEINRICO

RANTZOVIO, REGIS DANORVM FRIDERICI II. in Ducatibus Holsatico, Slesuicensi, & Dithmarsiae Vicario consiliarioq, Bredenbergæ, Rantzoniæ holmiæ, Vandesburgi & Tusculabecani Domino, Patrono & Mecænati suo obsequiandissimo. S. D.



ICTVM, PATRONE OPTIME, IN multorum est ore: Quem ingratitude reum feceris, eum merito omnium vitiorum insimulabis. Nam sicut gratitudo duabus præstantissimis virtutibus, veritate & iustitia, quibus homines Deo proximi fiunt, constat: Ita ingratitude ex turpissimis vitijs, Mendacio & Iniustitia, quibus ~~deus~~ Sathanæ simillimi sumus, conflare necesse est: ex quibus, si non pullularet velut ex radicibus tota vitiorum arbor, virtutum tamen adnata, si quæ esse possent, ceu taxi præsentissima umbra, infuscarentur et decorarentur.

Etenim statuæ virginæ affaberrimè factæ, vel ipsi etiam Pandoræ ocelli exculpantur, labella vtræq; detruncantur, quid artis, quid pulchritudinis reliquo corporis trunco erit? Euellatur pe-

A ij ctori

ctori gratitudo, virtutum lumen & præco, filia iu-
stitiæ & veritatis, quid boni amabò remanebit,
quid inhonestius, tetrius, detestabilius apparebit?
Summis itaq; viribus omnibus enitendum, ne vir-
tutum decus veneno ingratitude in inficiatur, con-
spurcetur, funditusue eradicetur. Quanquam ve-
rò ego ab ingratitude humo, me quoq; tollere,
vt decet, cupio, quia tua amplitudo, Domine hu-
manissime, me nullo non genere beneficiorum
obruit (quod, ne in os laudantis existimetur, oro:)
Tamen cum te, cum meas vires, cum inæqualita-
tem retaliationis æqua lance trutino, totus horreo,
tremoq; atq; animi religio triplici hoc ariete labe-
factata cadit. Equidem video meliora, proboq;,
sed ipsam gratitudinem præstare re,

*Hoc opus, hic labor est, pauci, quos æquus amavit
Iupiter, aut culto versu exornavit Apollo,
Esse queunt verè grati.*

Quis enim ego sum, Vicarie Regie, vir amplis-
sime, quæ ingenioli nostri literis paululum tincti,
copia, vt te virum nobilem, prudentem, ingenuis
artibus expolitum, quæ inter nobiles in tua patria
(absit inuidia dicto) rariores sunt nigro cygno, in-
terpellare meis scriptis in animum inducere pos-
sum, imò, si Dijs placet, gratiam referre? Egregia
scilicet

scilicet recompensatio *ἀντὶ χρημάτων ἀσπὸς ἐχημάτων*,
nec quidem omnium domi nostræ natorum. Ni-
hil ferè hîc non tuum, nihil non ex tuis ipsius Mu-
sæi viridario decerptum: nihil propemodum me-
um, nisi labor colligendi, arcemq; vtcunq; aduni-
brandi.

Quapropter nisi tua magnificentia animi gra-
ti studium, aut, si ita mauis, gratitudinem mancarn
æqui boniq; fecerit, me in ære tuo, nec soluendo
esse, nec tuis in me amplissimis beneficijs posse ali-
ud specimen gratitudinis dare, cogor fateri. At-
tamen spectatissime Domine, vt tua beneficia di-
gnitate longè præcellunt, ita remunerandi vicem
non reposcunt à priuato, sed contenta voluntate
erunt, nec tam loquentem parcè, quàm sentientem
largissimè spectabunt. Non displicet Deo pau-
per, qui cum nullo modo possit hecatombas im-
molare, voluntatem opimam offert illi. Equidem
vt cogito, consuetos succos non tam nauscam mo-
uere interdum; quàm palatum dissuauiri: Sic
non æquè gratum, nouum fœtum semper obtru-
dere, quàm emblemata, gnomas, versusq; notos
in arce tua, hortoq; hinc inde dispersos, vna quasi
lance tibi proponere intuentes.

Nam cum minimum tempus sis domi tuæ, plus-
rimum te negotia publicâ distringant, te rex Das-
niæ, te duces Holsatiæ, te patria, comitiâq; amis-

ciq; hinc auocent, te suum quisq; sibi soli perpetuo
expetat, mirum non fuerit, te desiderio tuorum
versuum, quibus æra, tabulæ, parietes, lapides,
ipsa quoq; specularia fenestrarum scatent, teneri,
& nomenclatorem, qui in memoriam redigat, ex-
optare. Non opus habeo dicere, quæ sit in lecto-
res hinc redundaturâ utilitas. Quippe heroum
vita versibus hîc descripta breuiter delectat & do-
cet: Quemadmodum etiam diuersæ sententiæ ex
varijs autoribus decerptæ, & passim parietibus cu-
biculorum tuorum ascriptæ, normam viuendi
oculis subiiciunt: Ad quam rem non parum etiam
adfert momenti votum illud tuum, quod nupcr
rimè ad imitationem Xenophontis (quem domi
forisq; in ipsa iactatione itinerũ, ceu alter Aphri-
canus Scipio, inexhausta cupiditate legendi con-
teris) à te est factum. Nam quale etiam de te ver-
sibusq; tuis clarissimus vir D. Ioachimus Came-
rarius in græca & latina lingua eximiè doctus, fe-
cerit iudicium, subsequens Epistola, quam perle-
ctis tuis versibus ad doctissimũ virum Erasmum
Kirstenium Iurisconsultum perscripsit, testatur.
Quamobrem here et Meccenas optime, patere ob-
secro, me tibi de me optimè merito gratum de tuo
præbere, nam de meo haud possum, vt quocunq;
modo licet, abominabile ingratitudinis vitium ef-
fugiam: patere, si ita videtur, fragmenta, quibus
arcem

arcem tuam cibasti, etiam in peregrinos me erogare, mattamq; meam scirpeam, donec quis mapam sericam substituat, eis substernere, vt quem locum, quæq; versuum fercula in arce tua sibi vendicent, lector cupidus scire queat. Vale Patrone optime, & me tui obseruantissimum, qui contuli me in fidem, clientelamq; tuam, amare & tueri, quod facis, desinere noli. Datae in arce tua Breddenberga, Anno ab orbe redempto sexagesimo octauo, supra sesquimillesimum. 4. Id: Nouembris.

*FRIDERICI tuæ præst: filij
Præceptor*

*GEORGIUS CRYSIVS
Hannouerenſis.*



JOACHIMVS CAME-
RARIVS D. ERASMO

KIRSTENIO IVRISCON-

sulto clarissimo,

S. D.



ELLEGENTI MIHI STUDIOSE ET
magna cum voluptate propter tam ele-
gantiam, quam varietatem versus nu-
per abs te mihi traditos, in mentem ve-
nit, autorem verè posse de se vsurpare *ῥηχλόχειον*
istud:

*εἰμὶ δὲ ἐγὼ θεράπων μὲν ἐναλίοιο ἀνακτοῦ
καὶ Μεσσηνέων ἐρατὴν δῶρον Ἰππικέμην.*

Atq; coniungi aliquando hæc, sicut secundum
Platonem potentiam interdum & sapientiam, sta-
tuendum, sed copulatio ista admodum rara, &
ideo præclarior est. Lectionem modo hæc, modo
illæ interpellationes impediuerunt. Notavi *σφάλματα*
quædam *χαφικὰ*, remittoq; scriptum tibi fortasse
serius quam debui. Sed tua humanitas moram
istam boni consulet. Assignatum munus tibi fe-
liciter euenire ex animo cupio. De libellis autem
vt gratias verbis meis, ei qui donauit, meo nomi-
ne officiosè agas, abs tua humanitate peto. Vale.

Descri

DESCRIPTIO BRE- DENBERGAE.



I QUID ESSET IN ME INGENIO-
li, lectores candidi, aut si quis vsus, ex-
ercitatiōue quippiam describēdi, aut si
scientia aliqua à studijs ingenuarum ar-
tium profecta, earum rerum omnium vel inpri-
mis arx Bredenberga fructum iure suo ex me fer-
ret. Nam cūm ex hac certatim prosiliunt Mecæ-
nates & alumni Musarum, tum verò ego in ea,
ceu Alcyonio nido, delitui hactenus, nepotesq̃
conditoris nobilissimi herois, quod potui, literis,
moribus, & pietate institui, doctrinæq̃ precium,
præter alia, fauorem viri principis Holsatici & fe-
ro & tuli. Quod si casulæ interdum, quæ vos plu-
uia & nocte ingruente, excepit, honorificam faci-
tis mentionem, quibus verbis arcē, quæ me diuti-
us fouet, honores habendos, gratiasq̃ referendas
censetis?

Et si equidem nihil in me eiusmodi esse video,
quo pro meo in arcē animo, proq̃ eius in me me-
rito, verbis persolvere mercedem beneficij pos-
sim, nedum illustrare: Tamen quemadmodū spe-
ro, & quaeso à vobis, inopi qui gratiam referre nō
potest, veniam dabit, si habere & agere vel bal-
butiens nitatur. Etenim aiunt boni, si optio detur,

B se malle

se malle fidem grati animi ineptè dicendo acqui-
rere, quam dicendo malè audire. Quod si auto-
ritas eorum, vt par est, valebit, ad gratiam mihi
tribuendam, beneuolentiamq̃ imperticmini, effi-
ciam profectò, vt quanquam arx dicendo oculis
subijci à me nequeat, tamen situm, firmitatem, gra-
tiamq̃ eius quasi per transfennam, prætereuntes
strictim aspiciatis, dignamq̃ iudicetis, quæ non
hac mea stridenti stipula disperdatur, sed ab inge-
niosiore quopiam, quod faxit Deus quàm pri-
mum, tuba decantetur, & cum illa simul memo-
ria conditoris æternitati consecretur. Bene enim
de sua patria meretur, qui eam munit ædificijs &
exornat.

Non minus autem delinquant, qui non accu-
sant vastatores patriæ, quàm qui non laudant eam
excolentes, quo vterq̃ præmium suum, ille igno-
miniam, hic honorem reportet. Id ego quoq̃ si
tentare, & fortasse productius in conditoris lau-
dem excurrere interdum videbor, etiam atq̃ etiã
existimetis, me non iniuria, operis autorem cum
opere ipso sociare. Arx autem, vt initium nostræ
narrationis inde nascatur, est sita in ea Transalbi-
næ & Citerioris Cimbricæ Chersonesi parte, cui
Idiomate Holsatorum Incolarum Stormariæ est
nomen, ad occidentem pagi Bredenbergaë oram,
inter Storam fluuium & Vellulam syluam, in cli-
uo,

no, quem perperam montem appellitant, ita leuiter & sensim confurgente, vt cum te ascendere nō putes, sentias ascendisse. Aequata agri planities circum circa esset, vsquequā prospectus ferē pater, nisi fossis intercisa hiarent arua. Verisimile autem videtur, hunc cliuum non multis ab hinc sæculis Storam maritimo æstu exundantem eructasse.

Nam cum fossa arcis duceretur, caudices quæ ni ex alto solo sunt eruti: Dispositio etiam siliceï clibani, nec non alia obrutarum domuum vestigia à notis mihi & fide dignis viris sunt visa, decennio antè ab hinc, cum tumulū, qui circa arcem erat, deprimere in altitudinem non longè imparē alueo Storæ, conarentur, vt aggere tormentis rupto, spumeus amnis exiret, hostiq; ad arcem aditum præcluderet. Ad hæc accolæ mentionem faciunt inundationis falsæ, & quam vocant S. Galli, sed quæ egresserit cliuum, liquidò sciri non potest.

Vt vt sit, id constat, eas furenter cumulo per arua latas esse, cum stabulis armenta traxisse, omnia confudisse & vastasse: hunc verò cliuum arcis, nec antiquitate, nec naturali munitione, nec elegantia, sed consilio, industria, atq; opere incomparabilis Herois Iohannis Rantzouij primum anno à nato redemptore sesquimillesimo supra tri-

gesimum innotuisse, nobilitatum & munitum esse, sic ut illi tertias, inter Holsatica munimenta hinc deferant, qui oppugnationum non imperiti habentur. Quanquam me non fugit, ut cætera pleraque, sic arcem plurimum spectari ex autore, eumque illi famam præclaram conficere: Tamen ex ipso artificio & firmitate non minimo æstimatur. Etenim fossa profunda circumcirca est ducta, octogenos quinos lata pedes, in cuius ferè medium demissus arrectus ordo vallorum præacutorum, inter se transversarijs coniunctorum, qui non amplius duobus cubitis ex aqua eminent, ut qui transilire eos pararit, ubi tranauerit, se ipse ijs induat, sit necesse.

Transitus fossæ, ad æquinoctialem exortum spectans, ponte sublicio est coniunctus, intercusus alijs duobus ponticulis pensilibus, quorum angustior pedibus, latior curru vel equo transmittitur, uterque subductus portarum munus obit: Vnde subductiles licebit voces. Mœnia autem lateribus deinceps longis sunt exstructa, quadrata, sicut & vallum, cui prætenduntur paribus lateribus, eorum singula pedes habent quadringentos, sexagenos quaternos. Circuitus itaque tenet passus trecentos septuaginta unum. Etsi quidem prudentissimum virum Rantzouium non latuit, directum, quadratumque opus ob excurrentes angulos, facilius

lius à machinis dissipari, rodundationes ad centrum adigi: quadratam tamen mœniorum formam vtiliorem hoc loco esse iudicauit. Nihilominus tamen curauit, vt rotundæ turres proijcerentur in exteriores partes angulorum duorum: Vna ad orientem hybernum, vnde Vulturius, quem Græci Euronotum vocant, spirat, altera ad Caurum, qui ab occasus æstiuæ solstitialis meta, inter Fauonium et Septentrionarium volat. Huius turris diameter est sexagenum ternum pedum. Peripheria itaq; habet centum, nonaginta octo pedes. Ambitus enim extremus circuli, ter continet dimetientem suam, & dimetientis paulò minus septimam partem.

His turribus seu propugnaculis loco opportunis id est consecutus, vt singula bina latera, dextrumq; læuumq; commodissime tutentur. Nam globi ex tormentis æneis per fenestras emissi, arceant subiens agmen, abripiantq; multos ordinatum, est necesse. Itur omnino ad turres hasce deorsum versum cryptoporticib. porrectis subter valum centenos & sexagenos cubitus: quorum vbi centenos fueris emensus, occurrunt foriculæ, singulos duntaxat viros simul admittentes, quarum egregius est vsus, cum post mœnia ex tuto quid molendum. Porro ad dexteram eius testudinis, ad turrim, quam diximus iacere ad Caurum, ædis

ficatus est nefariorum scelerum coherētor & vindex carcer. Ei vero, quæ ad Eurōnotum vergit, vt alia omittam, fornicata domuncula est contigua, in qua vasculis, quas cucurbitas à forma vocant, in ahenum feruentis aquæ demissis, atq; cooperitis rostratis galeis, ab Arabibus Alembicis dictis, herbarum stillaticij humores eliciuntur, & ad medicum familiæ, subditorumq; pauperum vsum, diligenter asseruantur.

In ipsa vero turri fonticulus scatet mirè fecundus, sic tamen occultè temperatus, ne labia lateritia impleantur, & redundant, & solo perpetuum madefacto turre vitium faciat. Sed in eiusmodi recensendis magnum studium, multamq; operam conferre, nec videtur operæprecium, nec nostri est instituti. Itaq; ordinem, quem tenere institumus, vrgeamus. Mœnibus proxima est validissima totius arcis munitio, vallū, quod orgyijs paulo plus nouem altum, circiter pedes quinquaginta est latum, oblitum per interualla duobus sæpiibus viuīs, ex ruborum & sentum caninarum plantis in ordinem dispositis. Id sæpium genus, præterquam quod naturalibus spiculis aduersus hostiles insultus est munitum, facem non timet, & ne tantula possessoris impensa eger. Sed & pulueris nitrati mola trusatilis, nec non Oporothece extracta

citata sunt in vallo ad Orientem super ipsa porta ,
Præterea super quemlibet valli angulum posita
est domus , qua famulis excubias agentibus , ibi-
demq̃ dormientibus , magis opportunior esse nul-
la potest , quod subter se subiectam planitiem ha-
beant , nec aures penè ullus , quantumvis exilis stre-
pitus subterfugiat ,

Deniq̃ in meridionali parte valli , armamenta-
rium omni genere apparatus bellici refertum con-
spicitur , præcipuè tormentis æreis , quæ , quod ve-
teribus ignota fuerint , nouè dicuntur bombardæ ,
& pro magnitudine & vsu diuersum sortiuntur
nomen , curules , colubrinæ , falcones , ferreæ quin-
quipedæ , sclopetti , manuales , et alia horridioris so-
ni . Copia item magna pulueris pyrii , quem nitra-
tum appellant , pilarumq̃ sulphureorumq̃ glô-
borum , canabinorumq̃ fertorum pice illitorum
hic est reposita . In tabulato autem asseruantur ,
cataphracti , loricæ , thoraces , galeæ , hastilia , lan-
cæ , enses , tympana , vexilla & χροµυλα ferrea , in-
geniosè nunc primum inuenta , quibus & in acie
pro malleis præacutis vtaris , & si res ita ferat , in
obsidione , quotidie sesquimodium molas . Quo
autem loco fixa erant arma D. Iohannis Rantzouij ,
quorum portionem Heinrichus , quæ ad se re-
dibat , fratri Paulo dedit , ei loco sequens Epigram-
ma est suffectum :

Diuidere

Diuidere arma patris cum vellent bellica nati,
Corpore quæ proprio gesserat ipse suo:
Mars clypeum abiecit, dixitq; ô parcite, nati
Parcite, in his aliquid Mars quoq; iuris habet.
Quæ toties genitor defendit ab hostibus arma,
Turpe, ea si natis diripiantur, erit.
Integra, dante Deo, post tristia fata manebunt,
Vt sacra dum vixit, tutaq; semper erant.
Ergo dedit Paulo, fraterni pignus amoris
Heinricus partem, Marte monente, suam.
Exoptatq; armis cum laude vtatur ijsdem,
His vsus genitor qualiter ante fuit.

Et in armamentarij foribus Heinrici Rantzo-
uij hi versus conspiciuntur :

Longa domus belli capit instrumenta cruenti,
Dum bona, tranquilla tempora pacis eunt.
Grandia stant illic vteris tormenta cauatis,
Et nunc cen placido pressa sopore tacent :
At subeant hostes, mox longa silentia rumpent,
Et piceas flammæ ore pilasq; voment.
Sydera pulsabit sonus alta, remugiet ather,
Et gemitum tellus, mota fragore, dabit.
Sulphureoq; globos procul eiacula cauernis,
Turbine prosternent obuia quæq; solo.

Haftenus

Hactenus sum prosecutus, vt potui, ea quæ
ambiunt domos arcis, easq; tanquam galeæ capi-
ta tegunt & obarmant: nunc intrò per portam re-
ctà eo. Surgit hæc arcuata testudine, passibus quin-
decim longa, non directà, scæua, ita tamen vt ra-
dios ferè orientis æquinoctialis Solis elegantissi-
mè transmittat, occidentis non exclusura, ni do-
mus interueniret. Vtrinq; etiam deauratis versi-
bus in æs sculptis radiat, exterius insignibus D.
Heinrici Rantzouij & coniugis, interius tetrasti-
cho hoc sanè non indocto:

*Sinibilibus edificas, qui spectas nostra viator,
Aut mea ne carpas, aut meliora struas.
Si meliora tenes, id Diuos poscito mecum,
Ne, quod vterq; tenet, fascinet inuidia.*

S V B I N S I G N I B V S
HEINRICI RANTZOVII.

C*Andida pars vna est clypei, pars vna colore
Purpureo, cassis cornua bina tenet.
Agentilitijs generoso stemmate natus
HEINRICVS RANTZOV talia signa gerit.*

S V B I N S I G N I B V S C H R I
STINAE AB HALLE CON-
iugis eius.

C

Vertice

Vertice pennato galea est, chypeusq; lacertum
Sustinet armatum, tres quoq; signa rosas:

HEINRICI coniunx CHRISTINA insignibus istis
Egregios ortus, concelebratq; genus.

Ingressos portam excipit area quadrata, silici-
bus strata eleganter, munda, molliter ad cloacas
pluuiam in fossam euomentes deuexa, vtrinq; atq;
à fronte ædificijs, à tergo vero inclusa muris, per
interualla fornicatis, propter tabulas ducum, quos
post dicemus, insertas: ita fit, vt cauedij formam
ferè videatur referre. Etenim ad dextram directâ
ambulatio, quatuordecim Ionicis gracilioribus
columnis suffulta tollitur, cuius intercolumnia
pectore tenus cancellatim pluteis septa sunt, qua-
bus inambulando fessi nitantur.

Est autem hæc porticus æquinoctiali Meri-
dionali aduersa, quod in ea ponenda Architecti
diligenter obseruant, reciperetq; hyeme multum,
æstate paululum Solis, nisi voluptatem hanc do-
mus obiecta ei inuideret. Ereptam tamē aliquan-
tulum Hyemalis Solis vsuram, sorte eiusmodi re-
sarcit, vt iubar à Sole fenorari totum diem ei libi-
tum non fuisse videatur. Quippe luculentæ ima-
gines magni nominis heroum inibi depictorum,
latè rutilant, atq; omnes, nisi Tiresia sint ceciores,
blanda

blanda venustate ac regio decore alliciunt & trahunt: gesta quoque sua ipse decaſtichis, tetrastichisque decantant, quæ, quod eorum commodior ratio haberi nequit, huc inseram.

IN ALIQUOT HEROAS TOTO

ORBE TERRARVM CLARISSIMOS,

qui in porticu Bredenbergenſi viſuntur.

Ad ſpectatorem Heinricus Rantzenius.



Scipio cum Romæ ſtatuas ſpectaret auorum,

Hæc ad virtutem ſunt mihi calcar, ait:

Hos quoque, quis ſpectet referentes inclita facta,

Seque aliquo tangi laudis amore neget?

Sint licet abſtractis procul in regionibus orti,

Omnes æternum promeruere decus.

IOſUA DVX POPVLI

ISRAELITICI, H. R.

Aspice, Nunnides ego ſum, qui maximus armis

Pro populo geſſi bella cruenta meo.

Promiſſamque diu, caſis cultoribus enſe,

Distribui iacta ſorte, dedi que plagam.

Triginta numero Reges, quis credat? Et vnum,

Hæc mea diuina dextera fudit ope.

C ij . Et

*Et mihi Iordanis, tacitis immobilis undis,
Et mihi tardatis, Sol stetit altus, equis.
Esse typum Christi factis & nomine quisquis
Me putat, errorem quo tueatur, habet.*

ALITER H. R.

*I*osua ter denos Reges vnumq; peremi
Occupo promissi, dum fera regna, soli.
Sol quoq; bisseis lucens immobilis horis
In medio cæli, me cupiente, stetit.

*DAVID REX ISRAE.
LITICVS H. R.*

*P*arus eram, pecudumq; gregem per rura sequebar,
Extulit ad regni, de grege, sceptrum Deus.
Et leo prædator, violentus & vnguibus vrsus
Occisi manibus, procubere meis.
Ore Philistæus terram indignante momordit,
Immanem letho quem mea funda dedit.
Laberis in crimen, quisquis malè prouidus, ingens,
Ne venia culpam, crede carere, tuam.
Me quoq; mens in grande scelus cæca impulit, at non
Gratia lugenti, sacra negata fuit.

ALITER H. R.

Sum

SUm David quondam caule, nunc arbiter aula
Proq, pedo vili regia sceptrā gero:
Gathiten funda sterno stridente Goliath,
Bis quino fermè qui pede longus erat.

IUDAS MACHABÆVS

DUX IUDÆICVS H. R.

VTleo conspectum ruit iracundus in hostem,
Et ferus illata vulnera strage facit:
Sic ego commotis in prælia viribus ibam
Pro patriæ, capiens, legibus, arma mea.
Excidiumq, vrbis sacræ, gentiq, minantes
Sæpe trucidavi, Marte fauente, viros.
Pulchrius est visum, paucos opponere multis,
Vertere quàm turpi, terga pudenda, fuga.
Sic me conieci medios moriturus in hostes,
Et mihi mors voto digna reperta meo est.

ALITER H. R.

ENego sum Iudas, Machabææ gloria stirpis,
Qui nullis vnquam terga pudenda dedi.
Pro grege, proq, sacris pulchram per vulnera mortem
Oppetij, inde virum cuncta per ora volo.

HECTOR DUX

TROIANVS.

C ij

Argoli.

ARGolicis terror ducibus, dum fata sinebant,
Proq̃ meis murus ciuibus, Hec̃tor eram.
In decimo primũ, quod concidit Ilion anno,
Nemo negat factum viribus esse meis.
Phylacides per me, Antilochusq̃ Menætiadesq̃,
Præterea multi procubuere duces.
Quid querar? vnus peruenit crimen ad omnes,
Et caput oppressit publica pœna meum.
Fraude locum captans vita spoliauit Achilles,
Et rapidis, circum mœnia traxit, equis.

ALITER H. R.

VRus ego patria pereuntis aeneus Hec̃tor,
Dimico pro Troia per duo lustra, mea.
Vulnifica multos transfigo cuspide Graios,
Fortis at à forti victus Achille cado.

ALEXANDER REX

M A C E D O H. R.

AT quis Alexandrum? quis facta perennia nescit,
Orbe quibus toto notus ad astra feror?
Nomine sicut eram magnus, sic maximus armis,
Terga fugæ nunquam, victus ab hoste, dedi.
Imperium extendi, quâ decolor Indus oberrat,
Et quâ Riphæas verberat aura nives.
Perside se victa, totus mihi subdidit orbis,
Sed mihi tunc orbis non satis vnus erat.

Mors

*Mors satis vna fuit, luctu fastuq; tumentem
Quæ me sub terras abstulit ante diem.*

ALITER H. R.

*D*icor Alexander factis & nomine Magnus,
Cui Iuueni totus subditus orbis erat,
Par mihi nemo foret, modicè si vna bibissem.
Interitu luxum disce cauere meo.

*CAIVS IVLIVS CÆSAR MO-
NARCHA ROMANVS H. R.*

*N*on ego sum duris tantum spectatus in armis,
Et mea doctrinæ nomine fama viget.
Sequana quis bello fuerim, Rhenusq; fatentur,
Et mihi cum toto subditus orbe Tybris:
Quis fuerim scriptis, monumenta relicta loquuntur,
Quæq; manu gessi bella, legenda dedi.
Nec satis hoc: etiam cælum scrutabar & astra,
Hinc meus æternum permanet annus, opus.
Immemores tellus homines producit vbiq;
Hoc queror, hæc fati causa, necisq; meæ.

ALITER H. R.

*Q*uinquagena inij collatis prælia signis,
Autor Romani Iulius imperij.

Quæis

*Quæ vitam dederam, sæua me morte trucidant,
Pro meritis reddunt sic mala facta meis.*

HARMINIVS DVX CHE.
RVSCORVM H. R.

N*Ec ducibus virtute minor, nec fortibus armis,
Græcia quos iactat, magnâq; Roma, sui.
Quod nimis impensum est illis, mihi defuit vni,
Nullaq; de factis edita scripta meis.
Vnicus inuentus Tacitus, qui nostra tacere
Noluit, hunc de me consule, certus eris.
Hic tibi narrabit, per me Germania victrix,
Ut sit depulso libera facta iugo.
Et duce cum Varo, stratis legionibus, illa
In quanto fuerit Martia Roma metu.*

ALITER H. R.

H*Arminius Latias, deleui ego Saxo cateruas,
Vix vbi prima mihi barba resecta fuit.
Me metuens Cæsar, Vare, ô Vare ocys inquit,
Redde aquilas, Romæ robora, redde aquilas.*

ARTVRVS REX BRI.
TANNIÆ H. R.

Q*ui vocor Arturus, me Gallia nominat Artum:
Paruit imperio terra Britanna meo.*

Non

*Non me sceptrâ tulit quisquam præstantior illic,
Egregius belli laude togæq. fui.*

Nomina quæ monstrat procerum virtute potentum,

Hæc, est inuentum, mensa rotunda meum.

Saxonas & Dacos domui, Romanaq. fudi

Agmina, quæ regno damna dedere meo.

Optima prima cadunt, sic firmus & integer annis

Occido, me, regni sceptrâ, cadente, ruunt.

ALITER H. R.

*B*arbariem obiectat cum Grayjs, Roma, superbis,
Barbariem præ se num mea facta ferunt?

Sum pius Arturus, nulli pietate secundum

Dixeris, in bello sum Leo, pace Pater.

CAROLVS MAGNVS PRIMVS

IMPERATOR GERMANI-

CVS. H. R.

*Q*uis me iure, neget, Magni cognomen adeptum?
Quin titulus factis est minor ipse meis.

Floruit optata, sub me duce, Gallia pace,

Pannonijs fusus concidit Hunnus agris.

Itala sublatis, tellus pacata Tyrannis,

Pulsus & est oris hostis, Ibere, tuis.

D

Impe-

Imperij, per me, sedes Germania facta,
Saxonis, est Christi, terra, professa fidem.
Me quoq; neglectis, duce, reddita gloria Musis,
Ipse repurgata nec rudis artis eram.

ALITER H. R.

TE quater octonos, de bello Carolus, annos,
Ut celebres viuum, mascule Sax, Deum.
Hic scopus, hæc regum belli sit norma mouendi,
Proq; gerant aris prælia, proq; focis.

CANVTVS MAGNVS REX

DANIAE, SVEDIAE, NORVEGIAE, AN-
GLIAE, TE NORMANNIAE H. R.

DESine mirari, quos garrula laudibus effert
Græcia, quos iactat Roma superba, duces.
Danica me nulli veterum virtute secundum,
Edidit Hyberno, terra propinqua freto.
Facta mihi, Magni, pepererunt incluta nomen,
Quinq; sub imperio regna fuere meo.
Me sibi delegit socerum, qui tertius orbis,
Arbiter, HEINRICVS nomine, sceptrum tulit.
Iustitia præclarus eram, Regesq; potentes
Subiectos docui legibus esse suis.

ALITER H. R.

Iustitia

*I*ustitia, bellivæ prius mireris honorem,
Addubites, certè par in utroq; fui.
Ipse mihi, latae legis reus, irrogo multam,
Imperijs subdo quinaq; regna meis.

GODEFRIDVS BILIO.

NAEVS H. R.

*O*Mnibus Europæ lectis heröibus oris
Nobile suscepi, Iasonis instar, iter.
At mihi non Colchis, non diues velleris auri,
Terra fuit votis sancta petita meis.
Hanc validis armis, Solymaq; recepimus urbem,
Quæ fuerat diro capta sub hoste diu.
Mænibus insilui primus sublimibus vrbis,
Hinc data, cum regno, fulua corona mihi est.
Vrbe, sed hanc, auro, Solyma gestare negavi,
Qua tulit occisus spineaserta Deus.

ALITER H. R.

*Q*ui vexit fulgens ex Colchide vellus Iason,
Æternum Græco carmine nomen habet:
Qui pepuli è Solymis, procul agmina Turcica regnis,
An non Godfridus laude vehendus ero?

D y Caro.

CAROLVS V. ROMANO.

RVM IMPERATOR H. R.

Non ego quod virtute minor, sed in ordine vitæ
Quod sequor, extremum spector habere locum.
Nam neq. suscepit me sceptrā potentior vllus,
Hoste nec ex victo plura trophæa tulit.
Africa, quæ semper sitiens, Europaq. vidit,
Auriferog. recens terra reperta solo.
Sic mihi perpetuo fortuna secunda tenore
Adfuit, & captis fauit amica meis:
Assiduus donec curis confectus, & æuo
Inualidus, fratri sceptrā relinquo meo.

ALITER H. R.

CAROLVS vnanimi, mundum cum fratre gubernās:
Romanum cogo vincula ferre patrem.
FRANCISCVS capitur Ticinum Gallus ad amnem,
A me, deuietus dat quoq. Turca fugam.

CHRISTIANVS EIVS NO.

MINIS III. DANIAE ATQVE

Noruegiæ Rex H. R.

Si mihi, quod faciunt alij, memorare liberet,
Quæ fuerit bello gloria parta mihi.

Oppressos:

Oppressos regni motus armisq; referrem
Cum duce te fractam, clara Lubeca, meis
At mea laus maior, non tantum Marte feroci,
Sed praestans etiam quod pietate fui.
Vix princeps, ego quo vixi, me iustior, aeo,
Aut pius aut clemens, aut magis aequus erat.
Sic placida seruans populos in pace regebam,
Fama volat mundo, spiritus astra tenet.

ALITER H. R.

Pacis amans, pietate vigens, fera bella perosus,
Et vita talis, nomine qualis eram.
Ergo Deus pugnans pro me, male perdidit hostes:
Felix quem ducit, curat, amatq; Deus.

FRIDERICVS II. DANIAE,
NORVEGIAE ETC. REX H. R.

QVid iuuat & prodest populis imponere leges,
Claraq; per latas sceptras tenere plagas?
Si fluit ignauum, tempus teriturq; quiete,
Vita voluptatis quid pigra ferre potest?
Hoc studium, hac cura est, factis efferre sub astra,
Et supra proanos, tollere auosq; caput.
Ditmarfi domiti bello, & cum Suecus in annum
Iam sextum, arma malo ferret amara suo,
D ij Fractus

*Fractus multiplici subit horrida vincula clade:
Præmia iusta, licet sera, Tyrannis habet.*

ALITER H. R.

ADEVNDEM APOSTROPHE.

*M*acte animo, et virtute noua, & victricibus armis,
Dilecte ô anima plus *FRIDERIC* mea:
Munere diuino vt supplex *Dithmarsia* venit,
Sic *Sueci* pacem te petiere tuam.

*IOHANNES PISCATOR
HEINRICI RANTZOVII.*

*Q*uod me, pictoris, magnis heroibus illis,
Docta manus iunxit, non ratione caret.
Hi velut in terris quærunt distantibus hostes,
In fluuijs hostes sic ego quæro meos.
Et capio insidijs & aperto Marte trucido,
Inuigilans studio nocte dieq; meo.
Si quis erit nostras penitus cognoscere laudes,
Qui cupit, has vnum distichon illud habet:
*Squamigeros vndis reti velut extraho pisces,
Pocula sic pleno gutture sicco bibens.*

ALITER.

*ἡμὶ τεύχεναί & πάντας ἔκ ἐγὼ τεύκτης,
ἔκ δ' ἐκ τῆς φρονέῃς ἔκ τῆς δεξιότης.*

ἔπι μὲν μακρόβωμοι, ἐγὼ δὲ μικρὸς μεταληρῶς,
ἤρωες πολεμεῖν λῶσται, ἐγὼ δὲ πίνω.

H O C E S T.

TRes cubitos vix dat statura, tricongius haustus
Est meus: hac sola dux ego Rexq; via
Magna, illi magni fecere, ego magna pusillus,
Illi pugnantes saepe, ego saepe bibens.

HAec ita Herôes picti in porticu de se ipsi lecto-
ribus ingerunt. Verum paradoxon & fri-
uolum tibi lector non videatur, quod piscator sit
heroibus mixtus, & velut anser inter argutos olo-
res strepat. Quia, quod is occupauit spacium
non est, vt reliqua, capax lineamentorum iustæ &
virilis staturæ, quæ cæteris propter decorum est
attributa: Proinde quàm vacuum pictoris arte
relinqueretur, maluit D. HEINRICVS
RANTZOVIVS id suo piscatori, longè
infra communem hominum staturam posito di-
care. Nam quod attinet ad Carolum & Chri-
stianum, præterquam, quod non extremas inter
celeberrimos Reges ferunt, etiam gratitudinis de-
clarandæ causa, hic ab hero sunt ascripti.

Etenim hic vicarium Holfatiæ & Slesuici du-
catuum herum elegit, in illius verò aula vnà cum
Illustrissimo

Illustrissimo Holfatiæ duce Adolpho, sexenni-
um vixit & ciuilia negotia & bellica facta cernere,
& imitari afsueuit. Ad hanc porticum solarium
à M. Hieronymo Cypræo est descriptum, ana-
nexo tetraſticho :

*Vmbra horas Phœbi designat climate noſtro,
Nodus quod ſignum Sol tenet, arte docet.
Oſtenditq. domus, quæ ſit ſua cuiq. Planeta,
Et quotus & menſis, ſit quoq. quanta dies.*

Sed & Galaſtothece adiacet ambulationi, alba-
rio opere polita, quā fas haud erat à limine, vt di-
cunt, tantummodo ſalutaſſe, niſi concinniora re-
ſtarent, quæ properantem de hac facere verba
non ferrent. Nam maiorem gratiam habent
ſuperiora, tablinum eorum, qui hero ſunt ab epi-
ſtolis, conclauia, dormitoria tria, & ambulatiun-
cula, quæ verſibus ſententijsq. varijs, fortunæ in-
constantiam & viciffitudinem in rebus humanis
depingentibus collucet. Earum elegantiores ple-
raſq. mox ſubſcribemus. Hæc Adolphæo cubi-
culo eſt contigua, quod tibi, tuoq. nomine Illu-
ſtriſſime Hollatorum dux Adolphe, heros mag-
nanime dicatum, & ſponda artiſcioſè tornata, nec
non aulæis ſericis magnificè eſt adornatum.

Sententiæ

SENTENTIÆ ET VERSVS

VARIORVM AVTHORVM.

CICERO IN OFFICIIS.

Illud magni ingenij est, cogitatione percipere,
& antè constituere, quid euenire possit, & quid
agendum sit, cum euenerit.

SENECA AD LVCILLIVM

EPISTOLA IIII.

Adversus omnia, quæ accidere possunt, te ad-
hortare & indura. Neminem enim eò fortuna
prouexit, vt non tantum illi minaretur, quantum
promiserat. Noli huic tranquillitati confidere,
momento mare concutitur.

TERENT: IN PHORM:

OMnes, cum secundæ res sunt maximè, tum
maximè meditari secum oportet, quo pacto
aduersam ærumnam ferant, vt ne quid animo sit
nouum, si quid præter spem euenerit.

DION.

Nihil in rebus humanis fixum ac perpetuum,
sed & ij, qui florent maximè, & ij, qui humiles
& abiecti sunt, exitus incertos habent, ac pariter
pro fortuna ipsorum, laude, vituperio, honore &
ignominia afficiuntur.

E

Anto.

ANTONINVS EX EVRIPIDE.

MVltæ sunt rerum fatalium formæ, Dñq̃ multa præter spem conficiunt, minimèq̃ facta sunt ab his, quæ sperata fuerant, & tamen Deus desperatis & inopinatis rebus, exitum inuenit.

INCERTI CVIVSDAM

AVTHORIS.

VBi Mars sæuit maximè, ibi fortuna & plurimum dominatur, & facillimè fallit.

M. TULLII IN RHETO.

SOla virtus in potestate sua est, omnia præter eam, sub fortunæ subiecta sunt dominatione. Errant autem qui in prosperis rebus, omnes impetus fortunæ fugisse se putant, sapienter autem cogitant, qui in temporibus secundis aduersa re-
formidant.

HILDEBERTVS.

HEu mihi nulla fides, nulla est constantia rebus
Ipsaq̃, fors, quid sit, mobilitate docet.
Res hominum, atq̃, homines levis alea versat in horas,
Et venit à summo summa ruina gradu.

Cuncta

*Cuncta ideo ancipiti pendent mortalia casu,
Et spondent propria mobilitate fugam.
Quicquid habes hodie, cras te fortasse relinquet,
Aut modò, dum loqueris, desinit esse tuum.
Has ludit fortuna vices, Regesq; superbos,
Aut seruos humiles non finit esse diu.
Illa dolosa comes, sola leuitate fidelis,
Non impune fauet, nec sine fine premit.*

OVIDIUS.

*Crede mihi, miseros prudentia prima relinquit,
Et sensus cum re, consiliumq; fugit.*

DION IN EANDEM

SENTENTIAM.

Metus tempore ratio omnis & consilium deest:
quibus rebus si quis antè animum suum
præmunierit, metum omnem superare, egregiè
potest: Sin minus, facile vinci, vt nec consilium
vllum opportunum, aut spem firmam in periculis
habere possit.

ISOCRATES.

Puta rerum humanarum nihil esse firmum:
Ita nec in prosperis lætitia gesties, nec in aduer-
sis dolore concides.

E ij Hein

HEINRICVS RAN.

TZOVIVS.

*C*Edunt fata Deo, precibus Deus ipse piorum.

Hactenus cursim, lector candide, percurri, ea quæ sunt ad dextram intra vallum, et mihi visa sunt digniora relatu, nunc iter ad laeuam deflecto, ante tamen puteum, qui prior est loco, audiamus. Is octo angulis & tecto gibboso, scandulis pictis vestito, surgit altitudine ad cubitos vicanos: aquam duo situli, ferreis catenis ab axe trusatili & binis trochleis suspensi, alternatim in summum efferunt, vbi vncis hamis retenti se ipsi inuertunt, & id aquæ, quod extulerunt, in castellum effundunt: Vnde siphunculis obuersis, cum voles, emanat, aut alnis in tubos cauatis ad hypogeum cereuisiarum deducitur. Hic aqua fit Hippocrene, Cerere ei incocta, & spiritu Poetas pota afflat. Quin & ipse puteus D. Heinricho Rantzouio docente, affatim scatet numeris, quos si nunc commemorare hic velim, quam non communi vena sint tornati, quamq; pij, verè equidem possum, nisi te ex ipsis id magis cognoscere aueam.

*F*ons ego communem scateo secundus in vsum,
Tota domus de me commoda multa capit.
Nec

*Nec pretium posco, nec egenti denego cuiquam,
Gratuitas ex me quilibet haurit aquas,
Vtq; queam semper dare, nunquam copia dandi
Deficit, & damnis augeor ipse meis.*

*Cum prior egeritur, semper noua prosilit vnda,
Dum successura cedat & illa locum.*

*Si licitum est magnas, paruis componere rebus,
Hi domini mores, qui meus author erat.*

*Is patriæ talis, (fas est laudare sepultum)
Exstitit, & multis munera larga dedit.*

*Eius erat domus, vt portus communis, habebat
Hic sibi speratam, quisquis egebat, opem.*

*Vt faceret, vires & opes fortuna merenti
Contulit, & larga præbuit vsa manu.*

*Sic patriæ, dum vita fuit, seruiuit amata,
Ereptam multis asseruitq; malis.*

*Nec mercede caret, nunquam licet ipse petiuit,
Gloria defunctum sponte secuta manet.*

*Ad patris exemplum sese componere natus,
Hunc qui me cultum iussit habere, studet.*

*Sed mihi vinentem pudor est extollere verbis:
Qui legis hæc, illi fausta precare, vale.*

*Vides opinor elegantiam putci, qui ipsi fonti
caballino fortasse non admodum cesserit. Ad
sinistram, vt promisi, accedendum. Hic officina*

est fabri ferrarij ante annum ædificata primùm,
quæ præterquam quod superbior est, ac oportuit,
& epigrammate exornatur huiusmodi:

Non opus est, quis sit locus hic, exponere verbis,
 Ipsa graui produnt verbera clara sonò.
Haud secus Ætnæo, quàm cum Cyclopes in antro
 Informant manibus fulmina sæua Ioui.
Nec satis hoc, quosuis quod præmollitur in vsus,
 Inq. omnes ferrum cogitur ire modos.
Et validi subiguntur equi, vinctiq; catenis,
 Sessori præbent crura tenenda suo.
Vt soleis ferro plantas armentur opertas,
 Aspera per duros ne via lædat agros,
At nihil hoc mirum: quid nunc homo linquit inausum?
 Illius ingenio, quicquid in orbe, subest.

AD hanc etiam est Andronitis, tectorio inducta
 & à plaste imagunculis lepidis exornata, vbi
Meccenatis mei, hospitumq; famuli confluunt.
In eius parietibus hexastichon hoc est pictum:

Quinous hic nostris succedis sedibus hospes,
 Esto bonus, mensam consulitoq; boni.
Craterem de more lubens philotesion hauri,
 At litem moueas ebrietate, caue.

Pocula

*Pocula amicitiam faciunt, & pocula solvunt :
Si bibis, vt valeant mensq; pedesq; sapis.*

REliqua pars huius lateris vsibus macerandi & torrefaciendi hordei, vnde Zythum coquunt, & tribus dormitorijs hospitum cubiculis detinetur. Quemadmodum vero Reges fama celebratissimi, in porticu ad dextram sunt depicti : Ita ad sinistram duces, memoria patrum atq; nostra bellicosissimi habiti, conspiciuntur, vt arx, cum temporis acti, præsents laudatrix, non immeritò possit videri. Murus interior, qui ad pedem valli est excitatus, & aream, qua ædificia discontigua sunt, cingit : is, vt supra attigi, per interualla arcubus fornicatur, in quibus exentiles tabulæ ducum, luculentis imaginibus & Elegijs pictæ, suspenduntur. Quantopere autem hæ imagines blandiantur voluptati oculorum, vix narrari potest. Ego quoties Martiorum viros arma, quasi flammæ vomentia, & hinc inde coruscantia medius intueor, ceu Gorgone visa hæreo, expleri & nequeo, atq; oculos per singula voluo. Cuius voluptatis & imaginum te, lector mi, participem lubens reddiderim : At quando in manu mea non est, vt illas videas, vt audias, quæ de se loquuntur, faxim.

In no

IN NOBILISSIMOS BELLICA
VIRTUTE EODEM FERE TEMPORE
duces H R.

Q Vos hîc stare vides sua fortia facta loquentes,
Indomito clari Marte fuere duces,
Vnâ tulit nostris ætas vicinior annis,
Clarius hac armis vix prius vlla fuit.
Non satis est ipsos virtute extollere Reges,
Et fortes illic expedit esse duces.

CONSALVVS FERDINAN-
DVS CORDVBA COGNOMEN
to Magnus, Ferdinandi
Hispaniarum Regis
dux. H R.

Quod gero præclarum cognomen ob inçlyta facta,
Hoc mihi concordî est militis ore datum.
Bella meo victor confeci ingentia Regi,
Terra sub imperio cuius Ibera fuit.
Effrenes domui Mauros, armisq; subegi,
Quâ rigat Hesperios flumine Bætis agros.
Adieciq; nouum regnum, quâ mœnia cultæ
Parthenopes falsum verberat alta fretum.
Quæ non inuidiæ virtus patet? vltima fecit,
Hæc me priuato sub lare fata pati.

Aliter

ALITER H. R.

Magnus ego vero Consalvus nomine dicor,
Hoc pater, aut illud strenua dextra dedit.
Exegi Gaditana feros trans æquora Mauros,
Asserui regi Bætica regna meo.

MAXIMILIANVS COMES

BVRENSIS CAROLI V. IM.
peratoris dux H. R.

Vl gravis, armorumq; fui spectatus in usu,
Nec virtute minus, consilioq; potens.
Vt fuit eiectis erepta Bolonia Gallis,
Anglia, quam tenuit, dux ego regis eram.
Hinc tibi belligerans semper victricia signa
Auspicijs duxi, Carole Quinte, tuis.
Cumq; ingens gereres bellum per Teutonis oram,
Inferiorq; tuo viribus hoste fores:
Agmina traducens Rhenum, tibi Belgica iunxi,
Nec fuit absq; opera palma parata mea.

ALITER H. R.

Expugnata fuit captis Bolonia Gallis,
Cum ferrem auxilium flauæ Britannæ tibi.
Hessus, & inuictus septemuir pectore Saxo,
Me duce dant palmam Carole diuæ tibi.

F

Georgis

GEORGIUS FRONSPER.

GIVS SVEVVS EIVSDEM

Caroli V. dux H. R.

Corporis ut præstans superabam viribus hostes:
Sic animi pollens robore ductor eram.

Militiam didici teneris perductus ab annis,

Armaq. sub magno Casare prima tuli:

Quo sene defuncto, sectanti castra nepotis,

Vix quisquam belli par mihi laude fuit.

Prælia iusta manu promptus ter quinq. subiui,

Bis decies pugnas sustinuiq. leues.

In patria morbo morior serpente per artus,

Dum petitur signis Martia Roma meis.

ALITER H. R.

Promptus eram, nulli veterum virtute secundus,

Seu res consilio, seu peragenda manu.

Stans ego equum potui frenis inhibere volentem:

In valido tantum corpore robur erat.

ODETTVS FVSIVS LOTRE.

CHIVS. COPIARVM GALlica

rum in Italia Imperator.

Non habuit virtute parem mihi Gallia quenquam,
Quo data sunt vitæ, tempore, fata mea.

Horror

*Horror eram Latio, fama notissima cælo
Oppida sunt armis multa subacta meis.
Hinc nomen, quod Rex meruit Demetrius olim,
Mira expugnatis urbibus arte, tuli.
Qui bellis inuictus eram, me sæua subegit
Acriter insurgens per mea castra luës.
Et cineres fortuna meos afflixit iniqua,
Dum tumuli expertes bis duo lustra iacent.*

ALITER.

*Sunt quia capta meo quàm plurima mœnia ductu,
Expugnatorem me vocitare solent.
Claruit hac olim Macedo Demetrius arte,
Participem laudis nunc habet ille tuæ.*

MARTINVS ROSHEIMIVS

*GELDRENSIS, PRIMO GALLIA-
rum Regis, deinde Caroli v. dux H. R.*

*Q*uis fuerim, longo non est opus edere versu,
Quod subit, hoc vno carmine scire potes.
Fulmen eram belli, ferro grassabar & igni,
Oppida militibus diripienda dabam.
Id satis est: testes Belgæ, Moriniq; remoti,
In mare, quæ Scalde, Dilia, Mosæ, fluunt.
Illa viris, opibusq; potens Antuerpia testis,
Quæ mihi victrici panè subacta manu est.

F ij At sibi

*At sibi me sicut tunc Gallia sensit amicum,
Sic eadem clades me tulit hoste graues.*

A L I T E R.

*Cæsareis inbiens opibus spe diuite Gallus,
Me duce pænè suis excidit ipse bonis.
Argentoratum petit hic, Campania per me,
Vulcano passim, Marteq; damna facit.*

ANTONIUS LEVA, DVX

CAROLI V. H. R.

*N*on leue momentum est magno didicisse magistro,
Militiæ leges & graue Martis opus.
*At mihi cum nemo belli præceperit artes,
Plurima natura dona fuere mea.
Nec me vlla indecorem ventura redarguet atas,
Maxima sunt ductu bella peracta meo.
Meq; ideo Insubrum præfecit Carolus ora,
Propugnata manu fortiter illa mihi est.
Quod nisi fregisset vires, dolor artubus harena,
Essem magnorum gloria magna ducum.*

A L I T E R H. R.

*A*stutus, sapiens, felix, belliq; peritus,
Impiger, intrepido pectore Leua fur.
*Et licet æger eram articulos vastante podagra,
Nullam aciem fugi, munia nulla ducis.*

Andreas

ANDREAS AVRIAS CÆSAREÆ

CLASSIS PRÆFECTVS. H. R.

ENego, quem spectas, Latiae fama incluta terræ,
Et Ligurum quondam lausq; decusq; fui.

Quis pelago gessit me, bella, peritior alto?

Quis patriæ adduxit commoda plura suæ?

Vt mare purgavi prædonibus, & mihi classem

Ducenti semper terga dedere Scythæ:

Sic patriam asserui, pulsus sine cade Tyrannis,

Et stabilem iussi legibus esse suis.

Hinc statuam patriæ patri mihi grata locavit,

Hæc mihi virtutis posthuma testis erit.

ALITER H. R.

QVi mihi marmoreum Ligures posuere Colossus,

Me patriæ patrem voce, manuq; colunt.

Et terris, & nota mari spectataq; virtus,

Cum Mahometigenas classe fatigo Scythas.

SEBASTIANVS SCHERTE

LINVS VRBIS AVGVSTAE

Vindelicorum belli dux. H. R.

VIndelicis insignis agris belloq; togaq;

At melior valido dux ego Marte fui.

Cum celebres, iunctis sociarent vrbibus arma,

Pro defendenda religione duces,

F

ij

Agmis

*Agmina præfectus duxi, vicinaq; celfo
Alpibus arx cliuo, me duce, capta fuit.
Victor ob id mutare solum me Cæsar adegit,
Præmia decernens in caput ampla meum.
Obtinuit generosa locum clementia tandem,
Et pius ignouit, restituitq; meis.*

ALITER.

*Cæfari ubi iuffus feci socio agmine bellum,
Quod tum Auguftana religionis erat,
Capta Fieffa mihi eft Alpini ad flumina Læchi,
Aëriog iacens arx Ereberga loco.*

SEVERINVS A NORBV CHRI.

STIERNI II. DANORVM REGIS

in Scandia præfectus H. R.

*R*ex licet effugit meus, & turbante tumultu,
In loca quæfitum tuta receffit opem,
Non ego proieci tamen arma, sed impiger hosti,
Conferui, euentum Marte negante, manus.
Indulfit veniam virtutis in hoste probator,
Inq; fidem accepit victor, amore fouens,
O mihi si tantum libuiffet fallere nunquam,
Nec tua trans Alpes, Carole, castra sequi.
Liber ab hac effem macula, nec morte luffem
Perfidia pœnas, dum tua signa fequor.

Aliter.

ALITER

VT tuear valido fugientem milite Regem,
Vendo domos, vendo quicquid vbiq. meum est.
At Deus exosus saturatum cæde Tyrannum,
Non fuit nostram pondus habere fidem.

GVLIELMVS THVMSEVNVS

PROTESTANTIVM BELLO DVX.

QVid terrore carens, docui, constantia possit,
Inuictosq. malum pectore posse pati.
Vt stetit insenso victoria tristis ab hoste,
Maxima pars victos deseruere metu.
At mihi fæda fuit res visa relinquere fædus,
Et victas vna tendere clade manus.
Arma recollegi subito discrimine belli,
Mœnia quæ Bremæ lata Visurgis adit.
Nec pius euentum causæ Deus abnuuit illi,
Fortunæq. meæ victor in hoste fui.

ALITER

CVm quateres validæ tormentis mœnia Bremæ,
Vt coleret Latij dogmata spreta Papæ,
Piscosum tranas desertus Ericæ Visurgim,
Victori palmam porrigis atq. mibi.

Iohannes

IOHANNES RANTZOVIVS TRI-
VM DANIAE REGVM, FRIDERICI I. CHRI-
stiani III. & Friderici II. summus consiliarius
& bellorum dux, huiusq. arcis
fundator.

NON sine re magnis Heroibus inferor illis,
Quos volui tantos hoc ego stare loco.
Nam nec eram virtute minor, nec fortibus ausis,
Sive toga spectes edita, siue sago.
Regibus assedi tribus, imposuiq. coronam,
Exuias victo bis quater hoste tuli.
Effera submitit, duce me, Dithmarsia collum.
Libera bis ductu Dania facta meo est.
Sic satur inuictae fama virtutis, & armis,
Succubui fasces, nunc habet aula poli.

ALITER

QVIS fuerim bello, quis pace referre recuso,
Invidiam conslent ne mea gesta mihi.
Dicet id inuicto Dithmarsus Marte subactus,
Bisq. asserta mea Dania clara manu.

DANIEL RANTZOVIVS DVX
EXERCITVS REGIS DANORVM
Friderici II. in Suecos. H. R.

ME quoq. viuentem complexus amore propinquus
Illustres inter iussit habere locum.
Nec res

*Nec res, quas recitem desunt mihi fortiter actæ,
Sed prohibet iustus cuncta referre pudor.
Hoc dicam saltem, ter aperto Marte Suecum
Expertum nostras non sine clade manus:
Tres belli amisisse duces, quos cepimus arte,
Quid moror? ipse opera fert quoque vincula mea.
Sex licet inconstans Maiors mutauerit annos,
Vtring insignes perdideritque viros.*

ALITER.

*Q*uod me inter tantos Heinrici propinque reponis,
Si non iudicio certè id amore facis.
Dent vitam mihi fata, & nulla redarguet ætas,
Ille ero iudicio, quem cupis esse, tuo.


GVNTHERVVS COMES

SVARTZBURGENSIS.

*E*gregia natum generis descendere stirpe,
Ingenio visum est non satis esse meo:
Sed claris etiam factis extendere nomen,
Et studijs belli, cura, vigere tenet.
Sic contra Gallos multa cum laude feroces,
Et Mahometigenas fortiter arma tuli.
Sic tibi suscepi bellum, Friderice, gerendum,
Cum peteres armis Suecica sceptris tuis.
Vnde mihi post hæc surgit noua laudis origo?
Pænè subit, votis fata fauere meis.

G

Aliter



ALITER.

Quod Friderice olim tibi opima stipendia feci,
 Sueco cum Danis Teuthonibusq; liquet.
 Quid ventura dies trahat, id scit, qui omnia novit,
 Quæ venient, quæ sunt, quæq; fuere, Deus.

GEORGIVS AB HOLLE

EQVES BRVNSVICENSIS.

Stemmate, quæ tantum celebri se iactat auorum,
 Nobilitas dici non mihi vera potest.
 Sed quæ virtutem superatve æquatue parentum,
 Et meritis ortum comprobat ipsa suis.
 Hic labor, hic animus teneris mihi sedit ab annis,
 Inde mihi aduerso vulnus in ore tuli.
 Hoc mihi sternenti Gallos infertur honestum,
 Dum tua præfectus castra, Philippe, sequor,
 Et me cognouit Suecus, nec proximus illi,
 Quisquis eris, tardas experiere manus.

ALITER.

Martis opus primis toleraui semper ab annis,
 Militia & statui multa trophæa mea,
 Grandia diffundit, nec dedecet, ora cicatrix
 Me docet intrepidi pectoris illa ducem.

Post

POst has tabulas fortissimorum ducum, sequuntur ordine quorundam illustrium principū & comitum imagines, quas herus ex Iconibus sibi ex Belgico transmissis effingi, atq; exprimi curauit: Principes autem, quorum formam imagines referunt, hi sunt: Ferdinandus Toletanus Albanus, Ludouicus Borbonius Condæus, Gulielmus Vranienfis, & Vuolfgangus Palatinus. Comites vero hi: Iohannes Arnsburgensis, Lammiralis Eggemontanus, Nauarcha regis Galliarum Admiralius, Anglottus, Ludouicus Nasouiensis, Petrus Ernelstus Mansfeldensis.

Quod autem horum imagines, postremo ferè loco constitutæ sunt, non eo consilio factum est, quod reliquis, quos supra enumerauimus, gloria rerum gestarum inferiores ab hero habeantur. (Non enim latet herū, nonnullos ceterorum, ab his laudibus bellicis etiam superari) Sed quod cum illi, summis laboribus bellicis perfuncti, iam maxima ex parte extremum vitæ suæ diem obierint, hi omnes ferè sint superstites, & adhuc in graui bellorū discrimine versantes, acerrimis prælijs inter se de victoria dimicent, strenuamq; Regibus suis in armis operam nauent.

Cum autem Mars sit communis, & bellorum casus ancipites atq; incerti, deniq; cum vulgus hos duces, pro fortuna ipsorum, laude, vituperio, ho-

nore, & ignominia afficiat, ideo herus inuidiæ & suspicionis euitandæ causa, nulla carmina, quæ res gestas eorum complecterentur, picturis subijcere voluit, sed spatium ibidem satis amplum, quod posterius sui epigrammatibus poterunt exornare, reliquit. Eo tamen in loco dictum Ciceronis conspicitur: *Quicquid eiusmodi est, in quo non possunt plures excellere, in eo plerumque fit tanta contentio, ut difficillimum sit sanctam seruare societatem.* Et aliud item dictum C. I. Cæsaris. *Si ius violandum est, Imperij causa violandum est, in alijs rebus pietatem colas.* Veruntamen cum inter comitem Iohannem Arnsburgensem & herum, summa semper coniunctio et amicitia extiterit, deberi à se, tanto viro, quem inopinata Martis vis perculit, putauit, ut breui carmine memoriam nominis ipsius consecraret. Itaque sub effigie amici sui carissimi, in semperiternum amoris beneuolentiæque pignus & monumentum hos versiculos extare voluit:

IOANNES COMES ARNSBUR.

GENSIS IN PHRISIA CAESVS H. R.

Si quibus inconstans peperit fortuna dolorem,

His ego me socium dicere iure queo.

Et mihi natales genus, & connubia magnum

Nobilitas factis quæ fuit aucta, dabant.

Cum gereret bellum Germanide Carolus ora,

Bureni

*Bureni consors strenuus arma tuli.
Vt noua turbauit fortes discordia Belgas,
Regis ab Hispani partibus ipse steti.
In Phrisia vitam mihi mors ita flebilis aufert,
Sic rapiunt claros tristia fata viros.*

ALITER.

*Non moror, in bello cecidi quod victus ab hoste,
Pugnando fortes claudere fata decet.
Hoc queror, obscuro perij quod milite casus,
Nec laudem de me strenuus hostis habet.*

*I*Am videntur adhuc tres togati, sub quibus versiculi sequentes leguntur. In vna autem tabula sunt duo cardinales depicti, vt Antonius Peronetus Atrebatensis, & Lotharingicus: In altera vero nobilis Iohannes Fresius, Serenissimi Regis Danorum Cancellarius.

*ANTONIUS PERONETVS ATRE-
BATENSIS ET LOTHARINGI-
cus, Cardinales.*

*D*Esine mirari hic armatis esse togatos
Immixtos, ducibus cardineosq; patres.
Bella manu haud gerimus, mens est armata sub omnem
Fortuna casum consilij validis.
Consilij nostris motus componimus orbis,
Impia cum Reges bella mouere student.

*Non decet, vt patria patres certamina neſtant,
Magnosq; irritent ad fera bella viros.*

APOSTROPHE H. R. AD IOHAN.

NEM FRESIVM, CANCELLARIVM

Regis Danorum. Friderici I I.

N*Ec tu carminibus nostris indictus abibis,
Fresi, canicie sparſe decenſe caput.
Nam tua Rantzouio certè de ſanguine creta
Eſt auia, vt verſu te quoq; iure canam.
Addo tamen maius, duplici vt te iure nepotes
Rantzouidum hos inter me poſuiſſe legant.
Nam tua te virtus ad ſummos vexit honores,
Insuper & ſtudij præmia larga dedit
Id quod erat geminis facundus Neſtor Atridis,
Dania te ſenſit Regibus eſſe ſuis.
Externum bellum bellè non ceſſerit ulli,
Si non ſit Neſtor, conſiliumq; domi.
Longa igitur tibi nent fatales ſtamina Parca,
Implentes vitæ luſtra bis octo tua.*

S*Vnt autem ibidem adhuc quatuor collocati,
quibus proprius & ſingularis locus eſt attributus,
ceterisq; quaſi exempti videntur.*

MAVRITIVS SEPTEM.

VIR SAXONIAE.

A*Rma, animus, virtusq; meis maturior annis,*

Carole

*Carole nota tibi, Turca fuere tibi.
Namq; in Pannonicis, quod gestum est fortiter agris,
Omne manu nostra consilioq; stetit.
Tu quoq; Landriscy ad muros es Galle repressus,
Exutusq; armis, non sine clade, tuis.
Ergo mihi in septem procures Germanidos ora
Ascito, Cæsar bella gerendū dedit.
Huic etiam clausis bellum feci Alpibus, arte
Hessus ab Albano cum duce captus erat.*

ALITER.

*PLurima nunc pacata forent, nisi stamina vitæ
Rupisset medio tempore Parca mihi.
Namq; meo decreta animo sententia stabat,
Marte mori, aut pacem Marte parare meis.*

*ADOLPHVS DVX HOLSTÆ
TIÆ ET SLESVICI.*

*Vix mihi prima genas vestibat flore iuuenta,
Te procul vt patria, Carole Quinte, sequor.
Vsq; aded mea mens iuuenili ardebat amore,
Nosse vrbes, claros militiaq; viros.
Nec votis fortuna meis bona defuit vnquam,
Signa tirocinij plurima Metis habet.
Inde domum rediens Dithmarsorum agmina fudi,
Vltus auos, animum dedocuiq; trucem.*

Nec

*Nec nostras Gotha, nec Grimsthenia saxea vires,
Imperij socio milite cincta, tulit.*

A L I T E R.

*Q*ui toties lecto, Reges, cum flore inuenta,
Holsaticos toties qui repulere duces.
Seruati nostra gens imperterrita palma,
Dithmars, victas Marte dedere manus.

*HEINRICVS IVNIOR DVX
BRVNSVICENSIS.*

*N*ulla humanarum quàm sit constantia rerum,
Collige ab exemplo, qui legis ista, meo.
Hilsheimense solum primo sub flore iuuenta,
Per valida adieci finibus arma meis.
Gaudentem spolys, Hesus cum Saxone, partis,
Armata patrio vi pepulere solo.
Vt niger hos vicit Iouis ales ad Albidos vndam,
Felix amissos occupo rursus agros.
Perpetuum at nihil est, & ab omni parte beatum,
Fortuna alternans datq; adimitq; datum.
Nam geminos natos vna Mars impius hora
Abstulit, hos letho machina dira dedit.
Haud quenquam dubie fas est confidere sorti.
Vita aloës multum, mellis habet minimum.

PHI.

PHILIPPVS LANDGRA,

VIVS HESSIAE.

ME belli, varia afflixit fortuna procella
Optatos portus inueniente Deo.
Exul in vndecimum Vlrucus Wirtnbergicus annum,
Inuito nostram Casare sensit opem.
Et mihi pulsus agris Leo Brunsviganus auitis,
Captus cum nato post sine cade suo.
Nec Carolum fuerit mihi turpe laceffere bello,
Sed nocuit temerè nos habuisse fidem.
Vincula simplicitas parit: en custodia seruat,
Dum quing Autumnos Pleiās orta facit.
Quod nisi Mauricium dolor armauisset acerbus,
Tam mea non fuerat pœna futura brevis.

HUc vsq viri egregij & celebrati. Occupa-
runt autem hi loca honestiora, & sub aspectum
cadentia. Tenebricosiora verò concessa sunt hisce
sequentibus, Christierno, & Erico Sueco, q
malè à plurimis audiant, & à præstantiorum ima-
ginibus, nisi dehortandi causa spectatores mini-
mè debeant auocare.

CHRISTIERNVS REX DA-

NORVM QVONDAM.

Non mihi si centum linguæ sint oraq centum,
Dicere facta satis pro ratione queam.

H

Innocuos

Innocuos mactare viros, & humata sepulcris
Eruiere, & flammis ossa verenda dare.
Non tondere pecus, totam at deglubere plebem,
Vxore exclusa, te Siebrechta, frui.
Delitia illa fuere mea, stabileq; fuissent,
Ni priuauisset me Deus ipse throno.

A L I T E R.

Discite iustitiam moniti & non temnere Christum,
Quicumq; in vultus figitis ora meos.
Carcere in vndecimam ferme trieterida captus,
Sanitia magnus Rex luo supplicium.

ERICVS XIII. EIVS NOMI-

NIS SVECORVM REX, IN VIN-
cula coniectus.

Q Vid memorem mea facta miser? reticere luberet,
Cade & coniugio notus vbiq; meo.
Sexaginta meis manibus sine iure peremi,
Pars mihi magna horum sanguine iuncta fuit.
Quoquò ergo aspicio, diri mens conscia facti
Occurrit, miseris excruciatq; modis,
Nunc mihi præceptor Dionysius ilia crudo
Traiectus ferro, tristis Erinmys adest.
Nunc procures Orcomissi, atq; innoxia bello,
Ante meos oculos perdita turba volat.

Aliter

ALITER.

ME quis Alexandro similem inficiabitur unquam.
Obtruncat procures ebrius ille suos.

Sobrius ipse etiam satior vel cæde meorum,
Perfossi manibus, qui cecidere meis.

SVB D. HEINRICI RANTZO.

VII IMAGINE AD LECTOREM.

SI quis erit, quem fortè iuuat sic quærere, quare
Hi tabulis præbent ora videnda viri?

Is sibi virtutis proponi exempla probatæ,
Quàm vitæ spretis discat amare, sciat.

Quamq; sit instabilis vitæ fortuna caducæ,
Quàm varios seruent lubrica fata modos.

Quam subito magnæ spes euanescere casu,
Et soleant labi grandia cæpta virum.

Quisquis es, incertæ diuersa pericula vitæ,
Et dubiæ sortis spernere fata, caue.

Nam caro ceu fœnum est, & gloria nostra velut flos,
Mane viget primo, vespere lapsa iacet.

IOANNISCVS MORIO RAN.

TZOVIORVM.

QVid prohibet si me viuentem semper amauit,
Nunc Domino hoc iunctum me quoq; stare loco.

Stat quoq; piscator, stomachum si piscibus ille,
Iucundis animum paui ego sæpe iocis.

H

y

Morio

Morio non vulgaris eram, iuuenesq; senesq;
Luxerunt raptum funere, luxit herus.
Illi mordaces poteram depellere curas,
Ridentemq; iocis exhilarare meis.
Aut illos imitare, iuuat si perdere vitam,
Aut me, si cordi est viuere dulce tibi.

ALITER.

HVC ades ô quicumq; venis nouus hospes in arcem,
Pieturis oculos pascaris atq; tuos.
Quid mirare duces miser ardescisq; tuendo?
Nescis quale tegat splendida vita malum.
Lerna periclorum, & certi sentina laboris,
Prudentum vita est: stultus at hisce caret.
Ergò agè stultitiam simula, sic nulla subibis
Munia: donantur pectora stulta rude.
Vt fugeret longi malesana negotia belli,
Sisyphides litus fertur arasse maris.
Aut flue delitijs, & duc inglorius æuum,
Aut mercare graui, grande, labore, decus.
Ingreditor, quodcunq; velis iter, vnus vtriq;
Finis, Mors fatuum cum sapiente rapit.
Viui non tibi vis, alieno vt tempore viuas?
Quid num post vt edas, antè fame moreris?
Ab nimio fallax emitur, me iudice, nomen,
Viue tibi, nimium nec sape, tutus eris.

Vive

*Vine tibi, nec te crucia, neq; crastina cura,
Hoc ego prudentes admoneo fatuus.*

Absolutis ijs, quæ ad latus vtrunq; intra vallum sunt, locus admonet, vt aduersa fronti aggrediamur: quæ etsi vt speciosissima in vestibulo narrationis Rhetorculo cuiuspiam ponenda videri potuissent, quo elegantia & dignitate omnes in admirationem sui raperent, ego tamen ordinis rationem prius habui, quàm venustatis. Dandam enim operam putauì, ne obscura & intricata eua-deret narratio, quod nulla æquè re vitari potest, ac ordine & consequentia.

Proinde vestibulum & cochlis, quia ipsis ædibus prominent, earum quoq; delineationem ante subiiciemus. Quanquam vestibulum nullum hic esse Philologos quispiam dixerit, quod hūc semicirculum Cochleæ gradibus vacuum, eo nomine appellare dedeceat, is tamen si in hoc stantes clientes cum ad Patronum cupiunt admitti, neq; intra ædes, neq; sub dio esse attenderit, eundem, quem veterum vestibula præstare usum, non negabit. Sunt autem ante pagmenta saxea, & superius limen eminentibus expressionibus biuinorum capitum & racemorum inauratorum est exornatum: ei vero saxum latius est impositum, quod incisa insignia Illustrissimi Septemviri Augusti Saxoniae ducis tuetur, & eius donum, cochlidis

H iij gradus

gradus, candida gratitudine huiusmodi versibus celebrat.

HEINRICVS RANTZOVIVS IN
COCHLIDEM SVAM LAPIDEAM.

HÆc Cochlis, excisis, quam conspicis, ardua saxis,
Magnanimi donum principis illa mihi est:
Saxonicam qui frena tenet Septemuir in oram,
Et pius Augustum nomine regē refert.
Hic mihi donauit lapides, cum missus ad illum,
Dania cui paret, nomine Regis, eram.
Ipse suum munus commendat muneris autor,
Grataq̃ sunt magnis dona profecta viris.
Ergò etiam nobis dono data principe tanto,
Gratior hæc nostra stabit in arce Cochlis.
Et spectaturis sero testabitur auro,
Nobile se munus Saxonis esse ducis.

IPsa Cochlis est octagonos, & instar penè publicę
turris attollitur gradibus septuaginta vno, septen-
nis pedibus longis, dextante crasis, quorum re-
tractiones plus quam sesquipedales sunt factæ, ne
aliȝ aliȝs obuiam venientes incurrere cogantur, &
vt honestæ mulieres aut senes, prehensio brachio
per cochlidem deducantur. Retractiones post
nouenos gradus plerunq̃ sunt ampliores, in qui-
bus subsistentes fessi, velut in arēola respirare que-
unt, si pergere velint. Nam sola cochlide ad
omnes

omnes contignationes, & conclauia conscenditur,
nimirum gradu sexto, ad podiũ, quod circa coch-
lidem fornicatur, delumbato ad arcum lacunari,
sic tenuiter, vt quaquaversus Lunæ à coitu rede-
untis effigiem repræsentet.

Id podium, cum ius dicitur, quātumuis clatratis
fenestris & valuis obturetur, propter aeris sæuiti-
am, tamen constanter audit & reddit ludiciorum
præsidii voces eorum, qui ad hoc, sub conscio æthe-
re, vt moris est Holsatis, lites dirimunt. Ea oppor-
tunitas & alias familiam in officio continet, quæ
nunquam præsens & absens eadem est, si sperat fo-
re clam. At dum videt vocales muros verba re-
ferre auersis dominis, arundinem, vt habet fabula
aures Midæ clamare, fenestras Argo ipso oculatis-
ores, nequitiam, desidiamq; coarguere, effrenes
animi motus pudore & metu tantisper constrin-
git. Ad podij orientalem partem, sedile siliceum
est, quod simul basis existit arrecti illic ad parie-
tem saxi, inducentis Bredenbergam, versus hos
loquentem:

*C*um sterili tumulus stare in fecundus arena,
Nilq; meus, sentes præter, haberet ager:
Me Satyri tenuere rudes, Faunig bicornes,
Et quæ vipereo sanguine monstra scatent.
Quos ubi Iohannes submouit, nobilis heros
Rantzouius, cæpi cultior esse locus.

*Ille valens animo, & victricibus inclytus armis,
 Eſſem munita, ſecit, vt artis opus.
 Quam modo, Piërides complexus mente venuſta,
 Filius Himricus perpolit arte ſua.
 Sic mihi pro Faunis Manors, atq. innuba Pallas
 Mænia tutantur: cætera habent Charites.
 At te Chriſte precor, qui nutu cuncta gubernas,
 Vt tutelaris Iuppiter eſſe velis.
 Rantzouiumq. mihi & natos carosq. nepotes
 Cum longa ſaluos poſteritate dare.*

HOc podio hyeme, aut nubilo die nihil magis
 fuerit ex uſu: Vbi verò cœlum hilarius captare,
 apricari, tueri, & odorari plantarum floſculos
 crit animus, gradus vigefimus quartus cochleæ te
 ad ſubdiale podium ferat. Id ſuper hyemali eſt
 amœniſſimum, & ne vitium faciat, pauimentum,
 rudere veteri affuſa calce ſolidatum & feſtucatū,
 atq. binis ordinibus figlinarum teſſerarum, plum
 bo uſto incruſtatarum complanatum. Eius oræ
 peribolis ferreis, quarum perticæ arrectoriæ lilia
 ex ferro operoſè referunt, cinguntur, vt ſecurus
 prolapſionis in illo ambulare, terramq. tutò de
 ſpicere, imò caput inter nubila condere, errantem
 Lunam, Solisq. labores ferè digitis attrectare li
 ceat. Etenim ſupra ſubdiale eſt podiolum, tabu
 lis auro, varijsq. coloribus diſtinctis auguſtum,
 in quo

in quo artificiosum & subtile automaton horologium, cuius denticulati orbes interius libramenis sic impelluntur, ut exterius in Australi tabula planetæ sensim emergant, & dierum nomina ostendantur: In Septentrionali duo styli horas, atque earum quadrantes discriminant: à fronte ad Orientem cataphracti equites, hastis ad singulos horarum quadrantes, seruatò elapsorum quadrantium numero, alternatim iucundo spectaculo minori campanæ incurfent, velut præmonentes, maximam latè iamiam boatum daturam, horasque discriminaturam. Quid vero ab ipsa Tabula orientali sit expectandum, haud faciliè dixerim, si rationem, structuramque operis desideres scire, sin usum qualemcumque tantum exoptes, satisfacient tibi hi in illa scripti versus:

*H*Oc opus æquales spacijs distantibus horas,
Lapsaque sub terras, orta que signa docet.
*Q*uæ mediam cæli labentia sydera & imam
Obtineant verso cardine signa domum:
*L*unaque quo Phæbo iungatur tempore monstrat,
Oppositum teneat Lunaque quando locum.
*F*elices animæ, quibus hæc sapientia curæ est,
Lucidaque immotis legibus astra colunt.
*I*llas posteritas meriti memor, inseret astris,
Astrorum monstrat, fabrica mira Deum.

Verum cum hoc opus sit ornamentum arcis, & ceu vexillum, quo exulantes Musæ conuolent, propositum, iniurium fuerit, etsi me subtilitas operis, meaquæ infantia multum deterreant, reticere structuram, atque ingenuum Domini studium sua laude, Philomusos verò Meccenate beneuolo de fraudare. Neque enim non fateri coguntur æqui censores idem, quod Aristippus, qui naufragio in Rhodiensium littus eiectus, cum vidisset Geometrica Schemata, ad suos conuersus, exclamauit: Salua, ô comites, res est, hominum vestigia hîc apparent. Aestimabat enim ex opere studium eorum, & in artifices egregiam voluntatem, illisque solum nomen hominum asserens, ceteros inanem titulum turpiter gerere ratus, qui nunquam os, in hoc à Deo sublime datum, ad iucundissimum cœli theatrum attollerent.

At vos Rantzouius sanguis, quos patri in arcis gubernatione succedere fas est, & patris animum & eruditionem æmulamini. Date operam, ut tantæ arcis opus, quod estis possessuri, intelligatis, terram, mare, cœlum, Solem infatigabilem, Lunam, reliquaquæ astra, quibus cœlum coronatur, Pleiadesque hyadesque & robur Orionis, immu- nemque æquoris vrsam, noscatis. Hæc in clypeo Achillis fecit Vulcanus, his Arx vestra exultat, his patris felix anima nobilitatur. Vos domestici
cum

cum, & cum tanto commune viro exemplum, cum
adoleuerit ætas, sat scio extimulabit. Vtinam mi-
hi quàm calcar sponte sua currentibus addere, tam
describere tabulam promptum esset. Sed quid
tempus non necessaria dicendo tero?

Marginem tabulæ orientalis complectitur im-
mobilis circulus, in quatuor & viginti partes,
quæ horas designant, æqualiter distinctus. Hunc
duæ aureæ lineæ per centrum traiectione secant, quæ-
rum eam, quæ dextrorsum sinistrorsum ducitur,
& orientem & occidentem constituit, Mathema-
tici Horizonta dicunt: Illam, quæ sursum deorsum
vergens, summi & imi cœli cardinem definit, Me-
ridianum vocant. Per centrum porriguntur tres
axes caui, versatiles, alius alij ita inclusus, vt vnus-
quisque dentatis rotis moueatur. Extimus axis fert
orbem, in quo Zodiaci duodecim signa sunt figu-
rata: medius radium, qui in circulo immobili ho-
ras, in signifero menses, signa & eorum gradus in-
dicat: Intimus autem axis rotat aureum Draco-
nem, qui præterquam, quod quotidie quasi cum
primo mobili semel circumit, etiam amplius, vt
plurimum, intra dici spacium, tredecim partes, bi-
nisque horis singulos gradus percurrit.

Ob oculos autem ponit horas Lunæ, in limbo
maioris circuli, tarditatem item et celeritatem mo-
tus, discessum & reditum ad Solem, quando Sola-

res radios subeat, nouumq; hauriat lumen, quando ex Diametro Soli obijciatur, plenoq; refulgeat orbe, quem deniq; signiferi locum pererret. Complectitur etiam hians os Draconis globum, trinas *φάσεις* formas, crescentis aut senescentis Lunæ euidenter ostendentem, modò, vt Plinius loquitur, curuatae in cornua, modò æqua portione diuisæ, modò in orbem sinuatae. Etenim alterum hemisphaerium est inauratum, alterum denigratum, partem Lunæ opacam nobis, Lucidam vero Soli obuersam innuens. Obuertitur autem hic globus à rotula, quæ est in ventre Draconis in summo eius axis, secundum quam rotulam & alia est collocata plana, cuius axis transit centrum Lunaris globi. Hæc impulsæ dentibus eius rotulae, quæ est in extremitate axis Draconis, cogit sensim fieri circinationem globi totius, quod contingit in vnde triginta diebus, horis duodecim, & dodrante.

Quid verò de ea ratione dicemus, qua expressit artifex, vt vertigine primi mobilis radius denotans Solem circumuoluatur singulis diebus, hoc est, vicens quaternis horis, vltius tamen in Zodiaco trigesimam signi partem, quem gradum appellant, ferè emetiatur? O diuinæ particula auræ, scrutatrix & æmulatrix superarū domuum. Dentata rota mediæ axis, cuius radium aiebamus
horas.

horas & signa monstrare, habet denticulos tercentum & sexaginta. Totidem & hæc, quæ circumagitur Zodiacum, minus tamen vno. Harum duarum rotarum curriculum est idem & vnum quindecim dentium, quod singulis horis circumagitur. Vbi itaq; quater & vigesies circumuoluitur, rotas has duas protrudendo semel circumagitur. At quia Zodiaci rota habet minus vno denticulo, ac solaris radij rota, temporius quoq; vno denticulo, qui vni ferè gradui æquiparatur, circummeat vicenis quaternis horis, oportet, vt amplius trecentis sexaginta diebus, totus Zodiaci orbis emensus videatur.

Hæc vt oculi testantur, quia cum motu cœlesti congruunt, & quasi imaginem admirandioris operis sculpunt, laudandi sunt, qui, reliquis luxu aut auaritia insanis, delectantur ingeniosis inuentis, nec in his comparandis ullis sumptibus parcunt. Maçti ingenio ac virtute viri, sic itur ad astra, foris nunc ea scrutamini & imitamini, quæ sub vestris pedibus olim sunt futura. Hæc de automato breuib; dixisse suffecerit. Nam quæ omisi, intricatiora sunt, nec tam verba, quàm Geometrica lineamenta, quæ locum hic non habent, requirunt. Describamus itaq; & Cochleæ tectum, quod restat: Id gibbosis tignis constat, laminisq; cupreis rubrica coloratis vestitur, super fasti-

gium ἀνεμόστροφος inauratus versatilis, ita est collocatus, ut à ventis circumactus, octo ventorum nomina in singulis lateribus octagoni designet, quod etiam in marmorea turri Athenis Andronicus Cyrrhestes, quem Varro nominat Cypresten, fecit.

Est quoque sub tecto coenaculum lepidissimum, ad diuersas cœli partes, tanquam specula prospectus habens, alijs fenestris despiciens armenta, greges, arua, agricolas, scœnisectores, Storam & in eo remigantes: alijs templa, syluas, prædîa, domos, hortos, iter præter arcem facientes, & item alia, quæ oculos iucundè feriunt. Agite vero lectores benigni, superatis cochleæ gyris decorsum nos demittamns, ædesque collustremus, ab Hypogeio exorsi. Id intergerinis est interseptum, quibus ab usu nomina dixerunt, carnario, apothecæ, cellæ butyrariæ, caseariæ, familiaricæ & cereuisiariæ, ubi quidem & panem faciunt, zythumque coquunt, & in cupas recondunt. Aqua autem eò ex puteo deducitur alnis in tubos excauatis, terraque obrutis, quod baiulis non minimum est leuamen. Ex hypogeio ad ædes decurritur. Hæ sunt lateritiæ, ut cetera pleraque, ad perpendicularum factæ, pedibus centum & viginti longæ, sexaginta latæ, altæ totidem, quatuor contiguorum tecti fastigiorum. Namque ea si fuissent vna, quod oculis blandiri magis

gis poterat, necesse fuisset, longè supra vallum &
minerent, & tormentorum curulium globis expo-
sita, noxam facile caperent: quod conuenienti hu-
militate nunc est vitatum. Qua itur ad ianuam
ædium, in saxo parieti inserti hi versus incisi cer-
nuntur:

B R E D E N B E R G A.

A Rx ego sum vallo & fossa munita profunda,
Nomen de lato monte vocata gero.
Sex & ter centum Sol lustra peregerat ingens,
Ex quo natus homo Christus in orbe fuit,
Cum patruele suo Fridericus bella gerebat,
Illo qui profugo Danica sceptrâ tulit:
Hoc me tunc statuit Iohannes limite terræ,
Rantzouio natus sanguine clarus equeſ.
In Domini, stirpisq; ſtruens, & proliſ honorem
Condidit, hæc illi maxima cura fuit.
Reddidit ille animam ſuperis, ego duro ſuperſtes,
Et mecum illius nomen honosq; ſimul.
Sic immota loco ſeros hoc ſpector in annos,
Et tanti eſſe viri nobile teſtor opus,
Quo ſine, nulla ſatis ſunt propugnacula firma,
Tu me præſidio Chriſte tuere tuo.
Vbi ad ianuam deueneris hoc diſti-
chon occurrit:

Ianna

*Annua sinceris ego nunquam claudor amicis,
Ofores semper clausa subire veto.*

VERUM hæc exiliora, atriò nostros animos pas-
scamus. Etenim hoc est amplissimū, clientesq̃
quàm plurimos, patrono publica iudicia exercen-
te, capit, ne quid quotidianam æstiuam diætam
commemorem. Laquearia, parietesq̃ mediani se-
camentis vestiti, oleo tripla portione ad succinum
admixto, miris modis radiant, quinimò colore,
crispoq̃ macularum discursu aceri certant. Ad
decorem maiestatis, accedunt imagines viuæ con-
ditoris huius arcis, Iohannis Rantzouij, picturæq̃
venustæ, sententiæq̃ multæ, quarum quasdam
annotasse, non inutile, reor, fuerit.

*XENOPHON IN ŒCO.
NOMICO.*

DEUS, vt mihi videtur, ab initio naturam mu-
lieris ad opera, curasq̃ domesticas idoneam
fecit: at corpus & animum viri, sic condidit, vt
tolerantius frigora, æstus, itinera, militiam ferre
possit. Huic igitur, quæ foris agenda, illi domum
administrandam attribuit. Prudentis verò &
frugi cū viri, tū mulieris esse, sic agere, vt quæ
parta sunt bona seruentur, & bene habeant, & alia
iusto honestoq̃ labore quæsitā quàm plurima ac-
cedant.

Marfilius

MARSILIUS FICINVS.

Vtrum sapiētem, felicemq; eum puto, qui cum ex solo pendeat Deo, medijs calamitatibus uiuit lætus, quem nec metus exanimat, nec dolor excruciat, nec voluptas corrumpit, neq; libido inflammatur, & cui ad vota cuncta succedunt, qui omnia, quæ vult habet, Ille singula habet, qui nihil desiderat, sorte sua contentus, & eo, quod natura postulat.

ALIUD DICTVM EX XENO.

PHONTE PAUCIS NONNIHIL

mutatis desumptum.

Qui tolerantia antecellit, vbi laborandi est tempus: & robore, vbi fortitudinis est propositum: & mentē, vbi consilij opus adest, hic profectò videtur mihi iure optimo vir bonus apprimè putandus: Is qui ab amicis decipitur, haud vituperandus: Qui vero ab hostibus, maximopere accusandus est. Qui nil credente s decipit, sapiens est iudicandus: Qui vero credentes fallit, impius est habendus.

ISOCRATES.

Conare inprimis vitā in tuto collocare, Quod si tamen contigerit in periculum te deuocari, quære in bello salutem cum honesta opinione, & non cum pudenda fama. Mori namq; cunctis pro-

K

uidentia

ni

uidentia diuina decreuit, sed honestè vita decedere,
re, id bonis tantum viris proprium natura concessit.

IN PRIOREM IMAGINEM IO-

HANNIS RANTZOVII, EQV

tis aurati.

HAc est Rantzouij depictus imagine vultus,
Qui decus Holsaticæ nobilitatis erat.
Consilio bonus, & præstans illustribus ausis,
Pro patria gessit maxima bella sua.
Omnia non dicam, sed & hoc te scire volebam,
In magno, virtus, corpore magna fuit.

IN ALTERAM.

Felix quem virtus generosa exornat anorum,
Et virtute suis adijcit ipse decus.

IN TABVLAM ROMÆ

RVINAM OB OCVLOS

ponentem.

URbs ego Roma, patrum quam scripta corona regebat,
Crescebam, vt Phæbe dimidiata solet.
Ast vbi me demens & cæca iuuenta gubernat,
Huius consilij funditus heu pereo.
Quisquis adhuc populos sceptro, verbisq; coërces,
O discas casu cautior esse meo.

Ex

EX alia parte atrij suspensa visitur alia non dissimilis precedenti, subscriptis notis versibus quatuor, quibus postremum distichon est adiectum:

*Roma vetus, veteres dum te rexere Quirites,
Nec bonus immunis, nec malus ullus erat.*

*Defunctis patribus successit praua iuuentus,
Quorum consilijs præcipitata ruis.*

*Ne similis similem casus, da rector olympi,
Adducat nostræ perniciem patria.*

Spectatur hoc loco etiā tabula ab Episcopo Lubecenſi Andrea de Barbi regis Danorum Christiani II. cancellario, dono data Heinrico Rantzouio, in qua depictæ sunt tres mensæ: huic pontifex, Imperator, reges & septem uiri: Illi principes Germaniæ & Italiæ: tertiæ nonnulli Cardinales, inter quos Lotharingicus & Atrebatensis, & Episcopi, omnes ludentes & ad viuum depicti, ut agnosci possint, accumbunt. Hos autem circumstant consules ciuitatum Imperialium, comites & nobiles. Alloquuntur illos ingressi Turcorum & Muscouitarum Imperatores ipsi, qui sequuntur, versibus. Fecialis item ad defensionem communis patriæ adhortatur.

IMPERATORES TURCA

ET MOSCOVITA.

K ij

Ludite

*L*Vdite securi, dum nos hostilibus armis
Hungaricum rapimus, Sarmaticumq; solum.
At nisi prospicitis, quid res, quid tempora poscant,
Hic ludus vobis exitialis erit.

F E C I A L I S.

*L*Vditis ô procures, & vos fera bella mouetis?
Pace quibus debet gratius esse nihil.
Interea Turcæ, si cesserit Hungarus armis,
Et celer à Moscho Sarmata iura petet:
Quid superest, proprios postquam sæuistis in artus,
Quin reliquum corpus barbarus interimat.
Mittite nunc ergò ludos, coniungite vires,
Donec in afflicto corpore robur inest.
Inq; hos infestis agmen conuertite telis,
Sic vestra & patriæ gloria salua manet.

*I*Nitium verò tabulæ pingendæ fuit, heri mei de
statu Europæ habitus cum Episcopo sermo, qui
postea in testimonium sermonis eius tabulam he-
ro transmisit.

Pastis hoc spectaculo oculis & animis, tabli-
num, quod est ad atrij sinistram, introëamus. Id
verò est, quo Dominus plurimum gaudet, & in
quo exornando operæ non pepercit, ob rerum in
magistratu gestarum monumenta, quæ ibi multa
asseruantur. Omnia scetilibus laminis singulari
arte

arte operiuntur, pigmenta acer, quod pauoninum
 vocant, mētuntur, rosæ alternatim, aureis argen-
 teisq̃ bracteis satiatae, ex omni parte lucent. Non
 satis est vidisse semel, iuuat vsq̃ morari, atq̃ oculos
 explere suos, adeò omnia rident, aurumq̃ ar-
 gentumq̃ opusq̃ intestinum, macularumq̃ discursus,
 nunc lachrimosè crispī, nunc sinuosè serpentes,
 nunc gemmas explicatae pauonis, caudæ aut pan-
 therinam cutem referentes. Quid verò memorem
 horologium eiusdem artificij cum superius descri-
 pto, etsi minus, in quo sequens iudicium de Astro-
 logia depictum est hisce versibus :

*Sydera corporibus præsumt cælestia nostris :
 Sunt ea de vili condita namq̃ luto.*

*Coger e sed nequeunt animum ratione fruentem,
 Quippe sub imperio solius ille Dei est.*

*Sed quia terrestri mens aurea mole grauatur,
 Sub iuga sæpè sui corporis acta venit.*

Quid dicam inauratum automaton viatoris
 um, quod quanquam subtilitate rotularum
 ea constet, ne collum gestantis & quidem theca
 munitum, grauet : nihil minus tamen, ac maxima
 quæq̃ opera, horas cœliq̃ faciem totam quouis
 momento stupenda arte representat ? Quid men-
 sam Mathematicam totius Astronomiæ, vario-
 rumq̃ eius instrumentorum ideam floridis colo-

K iij ribus,

ribus, sic luculenter exprimentem, vt prius ne miseris artificis ingenium, an pictoris felicitatem ad dubites? Quid tabulam ex argento solidam margine deaurata, continentem ascensiones signorum Zodiaci singulis horis per totū annum, item introitum Solis in signa Zodiaci, verum locum ad singulos mensium dies, præterea quantitatem dierum et noctium, ortum et occasum Solis ad eleuationē poli nostri 55. graduum? Etsi ea tabula ob materiam poterat sibi laudem comparasse, tamen à cælatura et argumento magis celebrari meretur. Censetur enim ab Astrologiæ, in hac cymbrica ora peritis artificiosissima, quod à nemine ante hanc diem res amplissima & diffusissima, tanto compendio sit tractata, verum nuper à meo hero adinuenta primū, post Astrologis consultis, & operam mutuam dantibus perfecta. Herus enim, quanquam regijs negotijs, quibus plus quàm dici potest, distrahitur, multum temporis nequit suffurari: Tamen sæpiuscule ad Astronomiam diuertit, & illa honestissima recreatione, & homine libero dignissimo delectamento fruendo, tædium ac nauseam discutit, tantosq; in ea progressus fecit, ac si ei soli perpetuò vacasset. Nam præcedenti anno, regi Danorum Friderico, multisq; alijs literis affirmavit, Ericum Regem Suecorum, iudicio ex Genesi eius factō, propediem captum iri, quod

quod nunc euentus comprobauit. Verum hæc quia præfens non intueris, nec ego arcis ornamenta exornare, aut oratione assequi possum, non te moueant, votum certè, & alia D. Heinrici Rantzouij hîc & alibi scripta fuisse digna, quæ non in tablino delitescerent, sed innotescerent omnibus, si candidè leges, clamabis, & me, qui hoc opellæ desumserim, non ambitionis, aut vanitatis, opinor, argues.

HEINRICI RANTZOVII VO.

TVM AD IMITATIONEM

Xenophontis.

EGo, quanquam anteponerem vitæ securitatem
clarioris fortunæ periculis: Tamen cum Deus
opt: Max: trinus & vnus, nos non tantùm nobis,
sed cùm sibi, tùm Reipub: propinquis ac amicis,
nasci voluerit: ijsdem adductus causis, me ipse vltro
laboribus offero, deuoueoq; & vasto negotio-
rum mari lubens committo, atq; ita impotentis
fortunæ procellis & fluctibus caput expono atq;
obiicio. Illud verò ab ipso Deo immortalis precibus
serijs semper contendi, & contendo: Primum,
vt mihi, meisq; integram donet corporis sanitatē:
deinde in rebus agendis circumspectam celeritatem,
in consultando piam prudentiam, in dicendo
beneuolam auctoritatem, contra hostes mitem victoriam,

etoriam, à maioribus gratiæ constantiam, ab equalibus amicitiam minimè fucatam, ab inferioribus obseruantiam meritis conciliatā, à subditis spontaneam et fidam obœdiētiam benignè mihi et clementer conferre dignetur: deniq; vt relicta à parentibus bona conseruet, rem familiarem prospere ret, augeatq;. Postremo senescentibus nobis cymbam nostram ex tempestuoso hoc mundi pelago, æterni numinis amore sensim perducatur, corporiq; vitæ molestijs defuncto, in religiosis maiorū monumentis requiem, & in extremo aduentus sui iudicio, gloriosam resurrectionem ac beatam immortalitatem largiatur.

IDEM BREVIUS OCTA.
STICHO EXPRESSVM.

*Si mihi pro votis libeat traducere vitam,
Sectariq;, animus quod mihi suadet, iter.
Malim ego priuatam securus degere vitam,
Quàm vitæ illustris mille pericla sequi.
At quoniam nostri partem sibi vendicat ortus
Publica res, partem poscit amicitia:
Me curis expono lubens, subeoq; labores,
Da Christe, vt faciam grata tibi & patriæ.*

AD FVNDOS SVOS HEINRI.
CVS RANTZOVIVS SVMTIS
ex Flaminio plerisq; versibus.

Venuste

Venuste agelle, tuq; pulcra villula,
Saltusq; & amnes vberes;
Salieta, & vmbra sibilantium arborum;
Et vda rivus pascua,
Tuq; arx honos soli, decusq; Cymbrici,
Stora propinqua flumini,
Dignis satis quis efferet vos laudibus?
Mei parentis optimi
Olim voluptas, & quies gratissima
Fuiſtis, at postquam ſenex
Laboribus domesticis & bellicis
Perfunctus & periculis,
Terras reliquit, & beatus cœlitum
Petiuit oras incolæ:
Vos alter appetiuit vſq; plurimum
Fundum daturus alterum,
Rogatus & quidem ſapiſſimè
Mutare ſic decreueram.
Nunc non reliquam. Iam iuuabit arbores
Manu paterna conſitas
Videre, iam libebit in cubiculo
Dulces inire ſomnulos,
Vbi ſenex ſolebat artus languidos
Molli ſouere lectulo.
In Vellula capreas iuuabit ſternere,
Cervuſq; rete tendere,

L

Et

*Et glandibus fues agrestes pascere,
Quid esse dulcius potest
Gaudete prata, rinulq; lympidi,
Stora, atq; culta Vellula,
Latiq; ruminantium bouum græges,
Hæri vetusti filius
Vos possidet, Deo volente maximo,
Suisq; tradet posteris.
Tibi ergo laus, perennis & sit gloria
Inseparata Trinitas,
Verbum, paterq; spiritus sanctissime,
Qui condidistis omnia.*

IDEM EX THEOGNIDE.

*Nemo hominum viuit, qui parte beatus ab omni est,
Qui sapit inuicta spe sua damna leuat.
Alternis fortuna bonis mala plurima miscet,
Vtraq; sunt æqua mente ferenda pijs.
Si mereor, te summe Deus rogo pectore toto,
Rebus ut auertas tristia fata meis.
Attulerint sed quando graues aduersa dolores,
Des animum, firma qui ferat ista fide.*

*E regione horum Heinrici Rantzouij carmi-
num, sequentia penicillo, in sectilibus parietum
operimentis ligneis visuntur :*

Philippus

PHILIPPVS MELANCH.

THON EX ANTIGONE

Sophoclis.

Non pectus ullius potest introspecti,
 Urbis magistratus priusquam gesserit :
 Ego, si quis in graui periculo ciuium,
 Verè salutare sciens sententiam,
 Eam, timore victus, occultat tamen,
 Hunc iudico ciuem esse malum ac inutilem.
 Et si quis antefert saluti patriæ,
 Priuati amici gratiam atq; munera,
 Hic omnium est mortalium iniustissimus.
 Ergo Deum testem inuoco, si patriæ
 Discrimen impendere videro meæ,
 Me voce dicturum, atq; mente libera
 Sententiam, verissima quæ videbitur.
 Nec ullus hostis ciuitatis publicus,
 Priuatim amicus esse ducetur mihi.
 Sed naus hæc, quæ seruet omnes vnica
 Sit ciuitas, qua cum vehemur integra,
 In ipsa amicos quærere florentes licet.

In tabula argentea, quam suprâ depinxi, sculptæ sunt hæ notiones temporum, à signis Zodiaci, mensibus, diebus Sanctis consecratis, & è terra nascentibus desumptæ :

L ij

Zodiaci

*Z*Odiaci caput est *Aries*, & *veris*, & *anni*,
Æstatis cancer, *Autumni pendula libra*
Incipit ex imo pluuiialis Hyems capricorno.

I T E M:

*M*artius à medio ver ducit, *Iunius æstum*,
Autumnū September habet, *Brumamq; December.*

Et hæc mutata & emendata paululum
ab Hero in hunc modum :

*F*estum *Clementis* caput est *hyemis venientis*,
Incipit at tempus Veris Petrus Cathedratus
Æstatem Urbanus, *Autumnū Symphorianus.*

Ouidius.

*U*er præbet flores, formosa est messibus ætas:
Poma dat Autumnus, igne leuatur hyems.

Nunc persequemur reliquas sententias parietibus tablini ascriptas:

Terentius.

*I*ta vita est hominum, quasi cum ludas tesseriis,
Si illud quod est maximè opus iactu non cadit,
Illud quod cecidit sorte, id arte vt corrigas.

Xenophon in œconomico.

Cum

CVm didicisse mihi viderer, Deos hominibus
rei bene gerendæ potestatem non dedisse, sine
cognitione rerum gerendarum, & perficiendi
quod opus est diligentia: Prudentibus verò &
rem diligenter administrantibus, alijs prosperita-
tem, commoditatemq; dare, alijs negare: his re-
bus adductus, equidem Deos colere cœpi, ac pre-
cibus impetrare contendi, & hodie contendo, vt
prosperam mihi valetudinem, viresq; corporis
tribuant, honorem in ciuitate, beneuolentiam in a-
nimis amicorum, salutem non inhonestā in belli
periculo, incrementū sine crimine in re familiari.

I D E M.

CVm animaduertērem ab actionibus iisdem,
alios admodum pauperes, alios perquam di-
uites esse, admiratione captus hæsi, & hoc quid
esset, inquisitione & inuestigatione dignum iudi-
caui. Cumq; perscrutarer, propriam peculiarem-
que, cur hæc ita fierent, rationem esse deprehendi:
Qui temerè & inconsultè negotia gerebant, dam-
num facere videbam: qui statuto consilio rem
diligenter administrabant, eos expeditius & fa-
cilis agere cum quæstu animaduvertebam.

Aristoteles.

Quatuor observare oportet patrem familias circa
pecunias: Nam & quærere posse conuenit, &

L iij quæsitæ

quæ sita tueri, alioqui nulla quærendi foret vtilitas: esse præterea talem, vt & frui præsentibus & ornari sciat, & negotia sic sunt moderanda, vt omnium simul periculum non subeat.

PRæter hæc autem, viua imago Ioannis Ranzouij, Henrici & Pauli filiorum, coniugumq; eorum: Andouerpia item, atq; immanis gigas in tabella ibidem conspiciendus exhibetur. Hic lector, mihi in memoriam redigitur prodigiosum quiddam, quod Cornelius Grapheus Andouerpianorum à secretis scripsit, & multum ad colligendam gigantis vastitatem facit: Cathenis ferreis suspensa visi in senatu Andouerpiensi coxam, dentem, brachium, scapulam & tibiam, insuetæ magnitudinis integra ossa, quæ putentur Antigoni, eius loci quondam Tyranni: Anatomices peritos ex dimensione eorū colligere, octodecim pedum hominem fuisse. Monstruosa me hercule statura, duabus ferè partibus amplius procerior, quàm nostra, & cuius vmbilicus verticem Golix in Biblijs ab Israëlitis tantopere formidati superemineret. Sed hæc hæctenus, nunc quod porro instat, de ærario tablino proximè adhærenti, agamus.

Prominet hoc ex Australi ædium parte denis & quinque pedibus, ab hinc biennio, valido muro extructum, & testudine concameratum. Eius fenestræ

nestrae, hamatis ex ferro claustris, valuisq; ex aere
solidis, nihil non arcet, humus, praeterquam q̃
asarotis, in varios colores & formas tinctis, strata
gaudet, etiam foribus ex aere, quibus ad Cryptam
aerarij secretam itur, fulget & illustratur, ne ab in-
cendio & vi noxam facile capiat. Ipsius autem ae-
rarij fores sunt ferreis laminis stanno incrustatis
obductae. Foruli exquisita lectissimorum libro-
rum supellectile onusti vestiunt parietes, ac si bibli-
otheca, non aerarium esset: quod vacuum libris
est spacium, id exotica pretiosa electri, corallio-
rumq; genera, in varias figuras tornata, rhythmicq;
Germanici occupant. Horum, quod ex Syracidis
secundo & quadragesimo capite est desumptum,
id dimetris, quia Germanica latinis inserere reli-
gio erat, verti potest:

*V*bi manus sunt plurimae,
Seclude sedulo tua,
Seruaq; ne mala inuolet
Harpya aduncis vnguibus.
Quae traditurus es tuis,
Horum velim explores prius
Numerum, atq; mensuram probe,
Et pondus ijs presentibus
Nam sic ministris consulēs,
Rebusq; prudenter tuis,

Ansamq;

Ansamq; præcides dolis,
Et suspicaci pectori
Vanissimum adimes metum.
Accepta verò & data refer
In Codices demta mora,
Nam quisq; proximus sibi,
Et de tuis, ni videris,
Augere rem studet suam,
At tu, tenaci glutino
Qui perfidissimas manus
Vinctas habes, vt quicquid hæ
Tangant, velut acetabulis
Sit polypi absorptum hæreat
Statim, malisq; calculis,
Dolisq; aliena intercipis,
Nunquid supremi, non times
Iram verendam iudicis?
Quamuis ocellos fascinas
Hominum, haud Dei tamen effugis.

SVB EFFIGIE CAROLI V.

IMPONENTIS FRATRI FERDINAN-
do coronam, circumstantibus Germa-
næ Septemviris, & hæc tabula do-
no data hero.

Si tibi plus vltra placuit contendere Cæsar,
Ad fossas Metis non bene castra locas:

Hic

*Hic positus limes fatalis Carole sortis,
Quæ tibi tot bellis obsequiosa fuit.
Admonet ad metam te peruenisse, nec ultra
Victrici, cursum posse tenere, manu.
Ergò siste gradum, capiat Ferdnandus habenas
Imperij, reliquum iure Philippus habet.*

Hic caluaria quoque ex alabastrite mellei coloris
est sculpta, quæ Symmetriam ossium, septem
futuras, & meatus, per quos venæ & arteriæ as-
cendentes cerebrum nutriunt, & item alia sic re-
præsentat, vt in ea nihil, nisi quod non maior sit, &
osseæ, desideres. Quid illa, in ærario dicis? vt ani-
mum contemplantis aurum, futuræ & cum omni-
bus æquata sortis admoneat. Adiuncta est æra-
rio cochlis lateritia æquæ atque saxeæ illa, quæ ad
ædes orientem versus est maxima, qua ad omnes
contignationes ferè conscenditur, Bibliothecæ
tamen subseruit plurimum, quæ supra ærarium,
non minus ac ipsum, testudinata iucundissimè &
opportunè surgit.

Etenim matutinum lumen transmittit, meridi-
anum seruat continuè, aut excludit, si vereris vt hu-
midi venti, quibus situs squalidus & tincæ pro-
creantur, volumina corrumpat. Ea omnium gene-
rum authorum, pro diuersitate scripti, diuersos oc-
cupant forulos, & in classes septem sunt digesta:
Hæc logices, illa Mathematū, ea Physices, proxi-
ma medi-

ma medicinæ, illa Iurisprudentiæ, isthæc Theologia, nec non historiarum, quæ ex omni orbis parte magno ære & labore conquistæ sunt, censetur & inscribitur. Quo ordine quid vtilius, quid pulchrius reperiri potest?

Etenim, quod herus dicere solet, vti insanus agricola habetur, qui hordei, fabarum, pisorumque acervos tritico commiscet, sub satiatione seligit rursus: ita extremæ est insanix, indigestos & inexplicatos possidere libros. Sed men verba, quibus te pro merito erga me tuo, bibliotheca depingam, posse inuenire? Saluete delitiæ, requies nauscantis, & omnium rerum saturi animi, medicina ægri, quæ torpentis orexim potionibus melle Hyblæo suauioribus facis & exacuis. Salue bibliotheca, ter quater salue. Præ te mihi sordent omnia conclauiæ, sunt ergastula, latomiæ sunt, tu theatrum, tu paradysus mihi. Iuuat profecto, iuuat cum tot virorum illustrium monumentis conferre pedem, more apiculæ per tot forulos volitare, bellissima quæque decerpere, à philosophorum familijs ad Theologos, ab his ad medicos, vna aut altera hora interdum deficere.

Delectat præclara inuenta, si non assequi, certe admirari, & ignarum rerum imagine gaudere. Mira voluptas est ænea Astrolabia, globos Astronomicos & Geographicos inter manus &

brachia

brachia versare. Aduocant, pascunt, tenent, animoq; mcesto demunt angores graues, pictæ in pariete terræ, Aphrica, Asia, Europa, & his quarta accedens America. Non parum etiam gratiæ addunt specularia, Andouerpia delata, quæ septem artium elementa fictis in id personis representant, cuilibet inusto disticho.

GRAMMATICA.

Grammatica os tenerum pueri, balbumq; figurat,
Scientiarum ceterarum sanatrix.

DIALECTICA.

Vti hominem ratione docet Dialectica, quare
Merito artium apicem magnus hanc Plato vocat.

RHETORICE.

Rhetorice gratos sermoni astuta colores,
Quo dulcius fluat is ad aures, adycit.

MUSICA.

Concentum inter se discrimina grata canorum
Aure erudita deprehendit Musica.

ARITHMETICA.

Hæc contemplandis numeris ars gaudet, eorum
Occulta solers eruens mysteria.

ASTRONOMIA.

Astrorum Vranie cursus, variosq; recursus
Oculis notans, futura mente præuidet.

M y

Geometria,

GEOMETRIA.

*Vestigare Geometriae intervalla locorum est,
Quamq̃ alta, longa, lata, rerum corpora.*

AT ne ego, lector mi, egregiè impudens tibi videor, qui meum in conterendis heri voluminibus studium tibi in os eructem? Ne videar quæso. Vir bonus est publicum bonum, et riuuli fontis eius deriuantur foras, nulli negantur. Ego benignitatem heri in me claudi nunquam sensi, imò, qua est humanitate, me sæpiusculè inuitat in bibliothecam, nec me, vt sic dicam riualem lectitandorum librorum respuit, illo præsentè, absente, mihi hæc patet. Ingratus sim, ni hoc beneficium agnoscam & celebrem. Atq; vtinam tales viros nostra secula plures tulissent, minus furorum, minus bellicorum esset, minus bonæ literæ malè audirent, & negligenterentur: Etenim sint Meccenates, & erunt Marones; sint Antonini & erunt Oppiani. Felices respublicæ, quarum principes, tempora, quæ negotijs suffurantur, non aleæ, non luxui, sed studijs honestis, sed libris impertiunt, ijs animos expoliunt, ijs sua ocia, ijs negotia condiunt; quin eiusmodi honorem habent, vt cum hero meo de ijs, sic sentire & dicere non pudeat:

Ad libros

AD LIBROS BIBLIOTHECÆ

SVÆ VERSICVLII HEINRICI RAN.

tzouij, ad imitationem Flaminiij.

Saluete aureoli mei libelli,
 Mea delitiæ, mei leporès,
 Quam vos sæpe oculis iuuat videre,
 Et tritos manibus tenere nostris,
 Tot vos eximij, tot eruditi,
 Prisci lumina seculi & recentis,
 Confecere viri, suasq; vobis
 Ausi credere lucubrationes.
 Vos estis requies honesta mentis,
 Iucunda ingenijs bonis voluptas,
 Rebus persugium minus secundis,
 In latis decus & nitor resurgens.
 Vos atate puer virente, magno
 Sum complexus amore, nunc vir autem
 Multò prosequor impotentiorè,
 Et quam fata diu sinent amare,
 Vobis immoriar mei libelli.
 Ac cum rege lubens fatebor illo
 Alphonso egregio, esse cariores
 Vestras diuitias mihi, benigna
 Quàm sors, quas mihi contulit caducas.
 Hac est vera beatitudo vitæ,
 In casto thalamo, pia bonaq;

M ij

Que

Quæ sit nupta viro comes laborum,
Iunctum coniuge, functione certa
Inseruire Deo, brevisq; vitæ
Semper munia sedulum subire,
Et caram sobolem sibi educantem
Lectis moribus emulam, parare
Multis commoda, nemini nocere.
Tū si quando graues premunt dolores,
Et curæ subeunt laboriosa,
Iucunda recreatione mentis,
Tristes pellere cogitationes
Aut euoluere, plurima refertos
Priscorum sapientia, libellos.
Et sic tam bene colloqui disertis,
Æternog, viris honore claris,
Quamuis secula multa iam sepultis.
Aut pernicis equi subire tergum,
Venariq; feras & in dolos
Nunc paruum leporem fugare casses
Et ceruum cane persequi sagaci,
Nunc vrsū truculentū, aprumve toruū
Ferro sternere transeunte corpus.
Hæc post difficiles grauesq; curas
Optata ingenij quies, honesti,
Hic vitæ tenor est beatoris.
Saluete aureoli mei libelli,

Saluete

Saluete, ex quibus hæc mihi voluptas

Æuum percipitur per omne, grata.

Quàm vos intueor, libenter & quàm

Lubens colloquor, Eequid æstimādū est

Curis esse beatius solutis?

*Posthæc grauis sententia Senecæ ex Octa-
uia act. 2. scripta exhibetur.*

Pulcrum eminere est inter illustres viros,

Consulere patriæ, parcere afflictis, fera

Cedere abstinere, tempus atq; iræ dare,

Orbi quietem, sæculo pacem suo,

Hæc summa virtus, petitur hæc cælum via.

QUæ in ærario & bibliotheca conspicienda
exhibentur, ea hæcenus: restat applicitum
ærario valetudinarium in interiore domus parte,
quod familiæ voces, hinnitus equorum, carrorum
stridores, tempestatūq; motus non sentit. Huius
etiam parietes intestino opere sunt intecti (vt om-
nia quæ infra primam contiguationem) & aste-
riscis auri bracteis subtenuibus oblitis radiant.
In forulis stillatij plantarum vapores, atq; vt
chymistarum voce vtar, quintæ essentiæ, nec non
efficacissima alexipharmaca, atq; exquisita ad va-
rios morbos remedia, ordinatim disponuntur.

Est & ibidem blandissima imago Redempto-
ris no-

ris nostri Iesu Christi affixa, tres digitos in iurantiū morē sustollentis, & Ezechielis illud proferentis: Viuo ego, nolo mortem peccatoris, sed vt conuertatur, & viuat. Hæc imago vmbreis, lincis & comminutis angulis spectatorum oculos ita fascinat, vt longè quasi ex tabula æqua, & ad regulam planam prominere, & sub tactum cadere videatur. Concauum mundi orbem, is Christi manum implet) & in eo urbem velut vltra tabulam ostendit. Quæ extantia videri voluit pictor, ea corpus vmbre dant ex sese. Sunt autem circa hanc vtrinque descripta.

Ex psalmo nonagesimo.

O immense et eterne Deus, erudi et doce nos, vt assidue meditemur nobis moriendū esse, et q̃ vita nostra sit quasi herba, quæ mane floret et succrescit, vespere succiditur & arescit. Anni vitæ nostrę septuaginta sunt, si ad summum processerit, octoginta. Cumq̃ præstantissima fuit, labor fuit & molestia; quia celeriter præterit, quasi auolet.

Syracides capite 40. & 41.

NE metuas mortem, sed cogites à Domino ita constitutum esse, super vniuersam carnem, & eorum, qui ante te fuerunt, & qui post te venient. Et quid recusas te voluntati diuinæ submittere, siue decem, siue centum, si mille vixeris annos?

Quicquid

Quicquid terra oritur, in terram redigi oportet,
quemadmodum flumina omnia mare influunt.

Idem capite tertio.

QVi honore prosequitur patrem, eius delicta
non puniet Deus, et qui honore afficit matrem,
bonum thesaurum colligit. Qui reueretur patrē,
& ipse ex liberis suis voluptatem capiet, cūq; orat,
preces eius exaudientur. Qui honorat patrem,
vita longiore fruetur, & qui propter Dominum
prestat obcedentiā, in hoc mater habebit solatiū.

VIsuntur hic & alia, vt Christiani III. Daniæ
regis defuncti delineatio, & Heinrici Rantzouij
sub patris iam tum mortui ante octiduum
imagine epigramma scriptum, Lamentatio syluæ
Vellulæ, & Nymphæ infidentis pisci, cui Storæ
nomen accolæ faciunt, & Gesnerus acipenserem
veterum interpretatur, & dicta quædam non in-
utilia: Postremo æneæ quinque tabulæ, secamenti
parietum affabrè insertæ, in quibus monumenta
quorundā Rantzouiorū Itzehoæ humatorū sunt
sculpta: quæ omnia sigillatim recensēda duximus.

HEINRICVS RANTZOVIVS.

Hic pater exhalans animam, concessit ad umbras,

Hinc mihi semper erit lugubris ille locus.

Ingressi carum mortem lugebo parentis,

Dum reliquus nostro corpore sanguis erit.

N

Cumq;

*Cumq̃ quid humanum eueniet, si fata probabunt,
Tu locus agroti, tu morientis eris.
In te confugient, (quoniam secretus es) omnes,
Accipiet morbus quotquot in arce meos.*

V E L L V L A.

R Antzouius postquam crudeli funere raptus
Cessit ad Elysij regna beata soli.
Fleuerunt montes, fleuerunt pascua, & amnes,
Atq̃ pharetrata candida turba Deæ.
Aruit immenso viridissima sylua dolore
Vellula, glandiferis culta cacuminibus.
Squalet ager, latisq̃ carent nunc frugibus arua,
Cuncta dolent, tanto depereunte viro.

S T O R A.

R Iuule, cur præter solitum tuus humor abundat,
Dic Stora, lucidulam quis tibi turbat aquam?
Rantzouij miserum me tristia funera turbant,
Cresco ego de lacrymis perditus ipse meis.
Ille erat heu summi viuens mihi causa decoris,
Ille mihi moriens abstulit omne decus.
Ne mihi quis lympham violaret, condidit arcem
Me prope depresso, Palladis arte solo.
Extinctum plangent pax & cum Marte Minerva,
Religio, Charites, Cimbrica terra patrem.

Cicero 2. officiorum.

Valetudo

Valetudo sustentatur notitia sui corporis, & obseruatione earum rerum, quæ res aut prodesse soleant, aut obesse, & continētia in victu omni atq; cultu, corporis tuendi causa, & prætermittendis voluptatibus.

Idem de Senectute.

Meditatum ergo esse debet ab adolescentia, vt mortem negligamus, sine qua meditatione, tranquillo animo nemo esse potest. Moriendum enim certè est, et id incertū, an eo ipso die, sapientissimus quisq; equissimo animo moritur, nec cū vix ille, pœnitet, quia ita vixerit, vt nō frustra se natū existimet, et ex hac vita discedit, tanquā ex hospitio non ex domo. Commorandi enim diuersorium natura nobis, non habitandi dedit.

Visuntur & eodem loco quæstiunculae, quas cur omitterem, ratio nulla fuit: Quid est vita? Beatorum lætitia, miserorum mœstitia, expectatio mortis. Quid est homo? Mens incarnata, phantasma temporis, speculator vitæ, mancipium mortis, transiens viator, anima laboriosa, parui temporis habitaculum.

MONUMENTVM IN HONOREM
ET MEMORIAM PROGENITORVM SVORVM

positum ab Heinricho Rantzowio anno

1568.

N ij

In ænea

IN ænea hac tabula Henricus Rantzouius, pio
 erga maiores ductus affectu, sculpti & describi
 curauit nomina, annosq; obitus progenitorum su-
 orum, quorū in memoriam lapides & monumen-
 ta collocata visuntur, in primario D. Laurentij
 templo Itzehoæ, ad altare sanctæ trinitatis: quod
 altare ab ipsis Deo trino & vno, non paucos ante
 annos dicatum, annuisq; & perpetuis in hunc vsq;
 diem prouentibus liberaliter dotatum est. Multi
 verò ex eadem familia eodem loco humati quies-
 cunt, quibus hæredes, posteri q; parum grati in
 eos, nullum ad memoriā honorem impenderunt.
 Quare liberis suis mandat, nepotes posterosq; ex
 ipsis orituros rogat, ne quē in auita inferre sepul-
 cra sinant, cui à suis aliquod non statuatur sepultu-
 re monumentum, nomenq; ætas, dignitates gestæ,
 & obitus in hanc tabulam annotata referantur.

ANno 1 4 4 0. obiit Breida Rantzouius, pæ-
 tre natus. Domino Castelli Crummendick,
 proauus Henrici authoris huius tabulæ. Hic
 multorum pagorū possessor fuit, qui postea mo-
 nasterio dicti templi partim precio venditi, par-
 tim religionis nomine dono dati sunt. Plures
 quoq; liberos genuit, eorū qui Petrus fuit dictus,
 eius posterī hac ætate Domini sunt prædiorum
 Nienhoff & Vvammendorp, quorum ex nume-
 ro Daniel Rantzouius, qui nunc summus belli
 dux.

dux contra Suecum, Danorum regi militat.

Alij præterea duo, alter Hermannus Hamburgensis, alter Bartoldus Bremensis Canonici fuere, quem canonicatum illis, familiæq; ipsorum certo præfinito tempore, singulari quadam indulgentia anno 1489 contulit Pontifex Innocentius III. Undecimo post anno obiit vxor eius Druda Ratlouia, die Bartholemæi. Qui ambo eodem loco ad latus Australe chori, eo in templo sepulti sunt, sub lapide albo, in margine quadrata, annotationem annorum obitus vtriusq; in medio insignia familiarum continente. Supra huius caput alter eius frater cum coniuge sepultus iacet, lapide cum vtriusq; insignibus ita inscripto: Anno 1450 obiit Caius Rantzouius, & anno 1439. Anna vxor eius, die Francisci. Supra Caium tertius quiescit frater sub lapide huiusmodi inscriptionis: Anno 1459. die Petri & Pauli obiit Caius Rantzouius. Insigne additum nullum est, spatium tantum, quo includi posset, relicto.

Ex aduerso eius lapidis, sub quo prior Caius conditus est, chorum versus, iacet saxum, nullam imaginem, sed nudam hanc inscriptionem, cum vtriusq; insignibus leuiter incisiss, continens: Anno 1465 obiit Brejdeke Rantzouius. Anno 1460 Margreta vxor eius. In medio inter hunc & illum quiescit Metta soror germana Breidæ

N. iij. proau.

proauī Heinrici viuentis. Hæc nobili ex Reuent-
lauiorū familia viro nupsit, ex quo cū prolem nū-
lam sustulisset, aliquam bonorum suorum partē
monasterio largita est.

Lapis imaginem habitu ornatae nobilis ma-
tronæ eleganter incisam præfert, ad cuius pedes
vtriusq; familiæ insignia spectantur. Inscriptio
verò hæc est: Anno 1 4 8 9 dominica cantate
obiit nobilis Domina Metta Reuentlauia, quæ
contulit huic monasterio quinque millia marcarū.
Ex aduerso lapidis eius, sub quo posterior Caius
humatus est, versus altare S. Trinitatis, sepultus
cum vxore beatā resurrectionem expectat Hein-
ricus Rantzouius, primi Breidæ filius, Heinrici
posterioris auus. Is fuit præfectus Hamburgensium
in arce Steinburg, nec sexagesimum æta-
tis annum excessit. Vxorem habuit Oligardam
à Bockvuolden filiā Domini i Borstel, Sirhauen,
& Neuerstorp, quæ multos ipsi filios filiasq; genu-
it. Post obitum viri, cum per 4 1. annos vidua
vixisset, octuagenaria ferè peste obiit. Lapis duob.
viri, femineq; simulachris insignitus, hanc inscrip-
tionem habet: Anno 1 4 9 7 die Sabbati, post
Viti obiit Henricus Rantzouius filius Breidæ.
Anno 1 5 3 8 die Sabbati post Lætare Oligar-
da vxor eius.

Inter hunc & Caium in medio tertius iacet la-
pis viri,

pis viri, item feminæq; & puellæ affabrè incisas
monstrans imagines, sub quo requiescit Paulus
Rantzouius primi Heinrichi filius, patruus poste-
rioris, vnà cum vxore Abela & filia Anna. Fuit
consiliarius Friderici I. Regis Daniæ, præfectusq;
& administrator aulæ eius, Inscriptio talis est:
Anno 1521 die Viti vesperi vita excessit Pau-
lus Rantzouius, filius Heinrichi. Anno 1526
die Mercurij post pascha Abela vxor eius. Anno
1533 octaua Martini Anna Rantzouia. Ad
idem latus chori, vbi angulume fficit, lapis facit
subniger, duplicem referens imaginem, matris, cū
infante linteis, fascijsq;, vt defuncti solent, illigatæ,
informi præterea circumscripto spatio, quo viri
viuentis adhuc, post mortem, imago incidi possit.

Sub hoc Magdalena, Ioannis Rantzouij equitis
filia, soror Heinrichi posterioris, à patre, fratribus-
que honorificè primum condita est, deinde in pa-
ternum monumentum per fratres translata. Nup-
serat viro nobili Oseuualdo à Vvische, cumq; an-
nos vixisset 29 & menses circiter quinq;, diem
suum in puerperio clausit, ante tamen puerulum
enixa, cum quo tumultata est. Lapidis inscriptio
hæc est: Anno 1557 die S. Augusti obiit Mag-
dalena à Vvische, filia Ioannis Rantzouij equitis.

Iuxta columnam, cui contiguum est altare, se-
pultus est Caius Rantzouius, primi Heinrichi fi-
lius,

lius, patruus posterioris. Discessit anno 1560. cum vixisset annos 72. Fuit à consilijs Christiano II. regi Daniæ, duciq; Holsatiæ Adolpho, & præfectus Tritouienfis, Dominusq; castellorum Hannorou, Clekamp & Cherubi. Vxorem habuit Idam ex familia Blomen, quæ viro defuncto, annum non superuixit. Ex hac multas suscepit filias, filiosq; quorum nonnulli, eo viuente, impuberes mortui, duo in bellis periire, hic in Caroli V. Imperatoris Germanico, ille in eiusdem expeditione Metensi, reliqui in matrimonium pro statu suo honestè sunt elocati.

Anno 1564 die Ianuarij 23 obiit Catharina filia prioris Heinrici, amita posterioris, quondam Abbatissa eius monasterij, cum id 20 annos prudenter admodum, fideliterq; rexisset, iamq; octogenaria maior ætatem ageret. Sepulta est in peristyllo eiusdē cœnobij australi in angulo, quo loco ei frater Ioannes Rantzouius eques, monumentum lapide parieti iniuncto statuit. Anno 1565. 13 die decembris obiit strenuus heros Ioannes Rantzouius eques auratus, cui viro ætate illa, in re militari hæc regio aquilonaris vix parem habuit. Fuit summus bellorum dux, & intimus à consilijs, tribus ordine Danorum Regibus. Friderico II. Christiano III. et Friderico II. ducibusq; Holsatiæ Ioanni & Adolpho fratribus.

Octies

Octies iusta acie semper victor cum hostibus
confluxit. Danicos subinde exortos, & intestinos
& externos tumultus, virtute singulari & felici-
tate admiranda repressit. Dithmarfos ob hostes
sæpe prosperè profligatos, totq̃ annorum liber-
tate ferocientes, iugum accipere coegit. Cuius me-
moriæ sempiternæ, quam rebus ipse à se gestis
promeritus est, grati erga parentē filij, Henricus
& Paulus Rantzouij, pro se quoq̃ consulere vo-
lentes, haud tenui impensa elegantissimum ipsi
monumentum, tribus amplius vlnis prominenti-
us, ad idem latus templi prope clatros chori posu-
ere, ex lapide affaberrimè inciso atq̃ ita læuigato,
vt procul spectantibus candidi marmoris speciē
reddat, cui impositæ ex marmore, vtriusq̃ paren-
tis imagines, miro artificio viuos exprimunt. Ad-
dita præterea diuersa & illustria vitæ eius elogia,
Cryptaq̃ subtus ædificata, quam perpetuum fa-
miliæ suæ monumentum esse voluerunt.

Hæc ita in æneis tabulis, post has aliæ vacuæ,
in quas posteriorum dignitates & vitæ sculpan-
tur, relictæ sunt.

ADhæret valetudinario amplum vaporarium,
Diceta hyemalis, penicillo picta, cui culina est
proxima, è qua tubuli maceratorum piscium, sal-
suginem, colluuiemq̃ naribus noxiam excipien-
tes, deducuntur in structiles sub area, cloacas,
O quæ

quæ aquam pluuiam exonerant in fossam. Inde gynæconitis thalamus, amphithalamus, apodyterium & balnearia ad atrij dextram porriguntur, quæ omnia quod similiter sunt pauimentata, & abiegnis secamentis vestita, sigillatim volui attingere. Prærogatiuam tamen thalami, peripetasma ta versicoloria, & ex Phocylide Olij versus in eo scriptos non omiserim:

*C*oniugij decus est sancti hand præstantius vllum,
Quàm si casta viro coniunx est mite leuamen,
Curarum, alternas & alit concordia flammæ,
Alter & alterius solamen & vnica spes est,
Donec vtrunq; senem non cura, aut lite, sed annis
Effectum, placido componant fata sepulcro.

Nostra narratio quasi præteruolauit ea, quæ circa atrium sunt: nunc Cochlide ad primam contignationem ascendimus in Orchestram, quæ præterquam quod Asarotis pauimentata, & eius specularia varia, orbiculata, exagona, quadrata, triquetra & alius figuræ, atq; duodecim mensium labores muta & loquenti poësi decantantur, etiã studio antiquitatem æmulandi gratiam promeretur. Etenim partem Orchestræ sibi vendicat *λογος* quod pulpitum est cancellatum, duodecim nos altum pedes, vbi scenici, & qui fidibus, tibia, pneumaticisq; organis sciunt, consistent, Infra logeum

geum pocillatorum est statio, & abacus ductilis.

E laquearibûs suspenditur candelabrum ex ære, multorum brachiorum, admirandæ magnitudinis, artis & constructionis, quod duo robustissimi baiuli non faciliè manibus loco moverint. Focus alarijs, ante quos Leones ex cupro ficti, canemq; Molossum æquantes, & elegantissimè quasi exurgentes, resplendet. Parietes varijs tabulis, præcipuè vitam aulicam, & diuæ pecuniæ bigas, sub oculos ponentibus, exornantur. Aula autē sic est depicta ex Luciani *οὕτως ἡ τοῦ βασιλέως αὐλὴ* adumbratione, interspersis uersibus: Palatium in fastigio montis abrupto situm est, vestibulo inaurato, lubrico & præcipiti aditu. In interiore parte domus *OPULENTIA* sedet, tota, uti apparet, aurea, desiderabilis, et sui amore inflammans intuentes. Porro amatorem aulæ stupefcentem, & aurum oculis deuorantem, *SPES* versicolor introducit. Recentem aulicum excipiunt duæ mulieres, *FRAUS* ET *SERVITVS*: hæ labori per manus tradunt: Ille confectum & morbidum senectæ committit. Post contumelia adigit ad desperationem. Ex hinc spes auolans euanescit.

Tum verò miser extruditur non per aureas, quas ingressus erat, fores, sed per posticum quoddam tenebrosum & occultum, pallens, tremulus, ventriculosus, annis pannisq; obsitus. Deniq; eie-

cto occurrit Poenitudo. Postremo tot modis
confectum, & iam trepidum, inturuum, in ipso
contumeliæ dolore, sagitta interemtum, Mors op-
tatissima, sola foederis tenax, præcipitat in egestã
scrobem.

HEINRICI RANTZOVII

EMBLEMA DE AVLA.

Moenia, quæ summo spectant de vertice montis
Sydera, dic, quodnam nomen & omen habent?
Aulam Roma vocat, sedes regumq; ducumq; est,
Luxu, diuitijs, ambitione potens.
Lubrica mortalis vitæ, & sinuosa palæstra,
Excipiens prauos non minus atq; bonos.
Cur iuuenis Lauri residens viridantis in umbra,
Tristia defixus Lumina spectat humum?
Ille operum patiens mæsto sub corde volutat,
Quam malit vitam, quod studiumq; sequi.
Ne trahat ignauam lasciua per ocia vitam,
Molliaq; ætatis tempora ducat iners.
Spes Dea, cur niuea iuueni stat proxima palla,
Commonstrans digitis regia tecta suis?
Allicit incantas iuuenum respublica mentes,
Et splendor nimias qui comitatur opes.
Sed cur astat honor Tyrio velatus amictu,
Cui levis ambrosio spirat odore coma?

Nominis

Nominis & fama cunctis fulgore trahuntur,
Ambitio multis exitiale malum est.
Cur fortuna astat lato blandissima vultu?
Adiuuat audaces forsque Deusque viros.
Ergo quisquis amat vitam traducere in aula,
Continget votis aula petita tuis.
Fata hominum cedunt interdum prospera caeptis,
Irrita nec semper fert pia vota Notus.
Quid de nocte struunt Bacchusque Ceresque Venusque
Ocia latifero condita melle fouent.
Haec capiunt fluxa iuuenum dulcedine mentes,
Vt se regna, Deos inter habere putent.
Interea luxu, transacta corpora noctes
Attenuant, animis & vigor omnis abit.
Cur abiecta iacet Pallas? cur aliger ille
Hanc leuat, & pietas non finit ante fores?
Nil animum formasse iuuat pietate, bonisque
Artibus, & mores addidisse graues:
Si non eloquio polles, versatile si non
Afferis ingenium, multiplicesque dolos.
At iuuenem excipiens aurata compede vincetus
Dic cur regales stat labor ante fores?
Sit licet immenso circumdatus aulicus auro,
Sustinet immensi grande laboris onus.
Successusque dolens hominum, cur iuncta labori
Squallida pipereo felle stat INVIDIA?

Nemo fuit, nec erit tam præstans fortibus ausis,
Ut valeat morsus effugere INVIDIÆ.
Ut comes est, radios per solis euntibus, umbra,
Virtutem liuor sic comitatur iners.
Aulæ in medio cur torua CALVMNIA picta est,
Et quam præterea, cetera turba, vides?
Quo non sacrilegæ penetrant mendacia linguae,
Iacta quæ sub blandis, scommata falsa, iocis?
Nam quicumque sua virtute emergere nescit,
Obrectare alijs, crescat ut ipse, solet.
Dic cur PERFIDIA assistit? quia tempore nostro
Sub blando est fidei nomine rara fides.
Pessimus is certè est inimicus, quisquis amicus
Creditus, occulta subdolus arte nocet.
Quid fallax media vult ASSENTATIO in aula
Mollia caudatæ tegmina vulpis habens?
Quisquis adulari, palpumque obtrudere nescit
Blandius, hunc aulam non adijisse velim.
Nam parasitus edax regum dominatur in aula,
Principibusque placet dulcior ore colax.
Semper adulator vescens popularibus auris
Blandiloquus Domino, quæ placuere, probat.
Cur iuuenem rursus NEMESIS deturbat ab aula,
En quam non magnis eiciens foribus?
Admonet hæc Nemesis ne quis nimis alta requirat,
Est aliquid, paruam posse habitare casam.

Multos

Multos aula viros ad summum euexit honorem,
 Aulaq; permultis attulit exitium.
 Ferre moram, moderari iram, contemnere risum,
 Dura pati, cunctos aulica vita docet.
 Cur morbus pallens regali limine pulsum
 Excipit, & tremulo tarda senecta pede?
 Debebant multi, posito bene fine malorum
 Viuere, non vlllo sollicitante metu,
 Quos vbi iam subeunt morbi, tristisq; senectus,
 Deijcit extremo tramute caussa leuis:
 Despectiq; iacent, & dulcia limina saepe
 Eiecti mutant, exilioq; domos.
 Nil fulsisse iuuat meritis insignibus olim,
 Nil rerum molem sustinuisse grauem.
 At cur asistit tumultum prope noxia torquens
 Spicula, funesta mors violenta manu?
 Fallit spes & honor, fallit fortuna, laborq;
 At Lachesis certam seruat vbiq; fidem.
 Rebus ab immodicis animum subducito semper,
 Ante oculos vita, sit tibi meta, tua.

HEinricus Rantzouius in imaginem pecuniae,
 iunctis eius currui duobus viris trementibus
 & pallentibus, velut bijugis, quorum iugum cir-
 cum circa mucronibus aculeatis est adornatum,
 semita spinis sparsa. Ipsa pecunia, reginae habitus,
 supplicem latronem cor pugione trañcientē chla-
 myde

myde tegit, Pandemia muliere globum terræ fe-
rente, & festiuè insequente:

Regina, quod nomen tibi? Pecunia.
Qui te vehunt Diua: paupor & periculum,
Cur panditur Chlamys tibi, quis de tegitur?
Tremens crumenifeca, latro, atq; morio.
Quid illa, quæ Sphæram suo fert vertice,
Notat, cor humeris bulliens tuis locans?
Pandemia est, quæ, quia scelestos protego,
Me sequitur, atq; cum orbe toto ad me ruit,
Si me potitur, amplius quærit nihil.
O misera, compararis & periculo,
Periculo & retineris, & tecum aduehis
Innumera vitia Tun' beata crederis?

Post hanc de Phaëtonis casu tabula
sequitur. H. R.

Aspicis vt Phaëton rapido Iouis occidat igne,
Nil mirum, punit corda superba Deus.
Hic veros habuit Clymenen, Meropemq; parentes,
Iactauit Phæbo se tamen esse satum.
Quin etiam conscendit equos Solisq; quadrigas,
Atq; suis impar viribus vrsit opus.
Sed mortalis vbi, temerè cælestia captat,
Neutrum habet, at fastus præmia fulmen habet:
Te modulo metire tuo, qui talia spectas,
Ne grauet infirmum sarcina magna caput.

Qui

*Qui fueris hic esse velis, sublimia vites,
Vltra qui peram non sapit, ille sapit.*

*In duodecim mensium labores in speculari-
bus figuris expressos Henricus Rantzouius.*

I A N V A R I V S.

*Iane biceps, anni finis, redeuntis origo,
Lætus ad igniuomum decoque parta focum.*

F E B R V A R I V S.

*Qui Februo mihi nec pelles, nec ligna reseruas,
Falleris, hæc currum, quæ ratis ibat, ages.*

M A R T I V S.

*Vomere scindit agros, noctesq; diebus adæquat
Martius, & veris nuntia hirundo redit.*

A P R I L I S.

*Cana viret tellus, se frondibus induit arbor,
Aprili gemmans eliciente decus.*

M A I V S.

*Salve ter felix ô Maie Smaragdine salve,
Temperie certent tempora nulla tibi.*

I V N I V S.

*Iunius æstiuo detonsa tempore lana,
Defendas pecori solstitium iubeo.*

P

Iulius

I V L I V S.

*Sub brumam ne fortè pecus moriatur Iuli,
Prospicis, & curua gramina falce secas.*

A V G V S T V S.

*Iam maturescunt Augusti munere fruges,
Cumq; amplo sortem fœnore reddit ager.*

S E P T E M B E R.

*Augusti Ceres est, Septembris munus Iachus,
Vnde homines viuunt, nos duo perficimus.*

O C T O B E R.

*October mustum calcatis exprimit vuis,
Et serit hæc, anno quæ redeunte, metat.*

N O V E M B E R.

*Autumnus quæcunq; dedit consumo November,
Et pinguem hyberna glande trucidò suam.*

D E C E M B E R.

*Haud auis, haud fera venanti deest vlla Decembri,
Quamuis ningat atrox & gelet vsq; vadum.*

AD meridiem pinacotheca, quæ eadem domitorium regis Daniæ dicitur, cetera conclauias asarotis, camino, alarijs ex orichalco cælatijs, & leonum hiantium specie fictis, peristromatibus, lectisq; preciosis longè vincit, tabellis etiã ad certas

ad certamen vsqꝫ luxuriat. Nam Carolus, Ferdinandus, Maximilianus Germaniæ Imperatores, Sigismundus Sarmatiæ, Franciscus Galliarum, Philippus Hispaniæ, Iacobus Scotiæ, Eduardus Britanniæ, Christianus Daniæ, reges, Solymanus Turcarum Tyrannus, Ioannes Septemuir Saxonæ, atqꝫ alij reguli, nostro tempore fama apprimè noti, ad viuum expressi hîc conspiciuntur. Ioannis quoqꝫ Rantzouij sua inaurata arma induti icon, ex membris eius similitudine tota ita est in cupro, à Ioanne Lündensi Dithmarsiæ pictore, expressa, vt nescio quid maiestatis heroiçæ, ac si viueret, spirare ac eiaculari videatur. Sub ea aureis literis hæc sunt scripta: Icon Ioannis Rantzouij equitis aurati, qui tribus regibus Septentrionalibus, cum ceteris proceribus Danicis ac Cimbricis, nempe Friderico I. Christiano III. & Friderico II. Diadema regium victrici manu, singulariqꝫ prudentia imposuit: Econtra Christiernum II. Friderici auspicijs, tribus regnis, Danico, Suecico & Noruegico auertit, oramqꝫ Cimbricam à Lubecensibus Duce Alberto Megapolitano & comite Christophoro Oldenburgensi, in libertatem vindicauit: Episcopos in Dania nonnullos, ditionibus eorum ad regnū translatis, in ordinem redegit: Dithmarsiam cum rege ac principibus suis Holsaticis vltimo dux istius

belli subegit. Hodie, qui est annus à natiuitate Ie-
 fu ex Maria sesquimillesimus secundus & sexa-
 gesimus, est septuagenarius, cum tamen cani im-
 portuni non sint, ac superest illi animi vigor, cor-
 poris robur, celeres ingenij motus, habet & adhuc
 pertinacem & amplam rerum præteritarum me-
 moriã, & ex his futurarũ summam prouidentiam.

SVB PYRA DIDONIS SE FER

RO SVB AENEAE NAVIGATIONEM TRA-
ijcientis, & morientium affectu planè ser-
uato expirantis H. R.

A Mor venenum dulce, quem non illicis?
 Primo suauior quidem melle Attico,
 Sub fine vincis fellis amaritudinem,
 Quam non voluptatem videbat Elissa, cum:
 Maneret Æneas? ubi is littore ratem
 Soluit, quid illa miserius? quin pectoris
 Crates sui disrumpit ense Troico,
 En musta qui bibit, ebibat facem quoq:

SVB LVCRETIÆ STVPRO

S. TARQVINIVS LVCRETIÆ H. R.

SI clamas, ferro moriêre Lucretia: vincam
 Sic pugnans: sin das, quæ volo dona feres.
 Abnuis? interimam, cum quo dormisse feraris
 Scruum, & adulterij testis adulter ero.

Lucretia

LUCRETIA TARQUINIO.

*S*Exte, quid o facis? o frænis inhibeto furorem,
Ante fores Nemesis sanguinolenta cubat.
*V*iuat adhuc idem, qui punijt Ilion ingens,
Ad tua conminet nec malefacta Deus.
*S*cilicet vnus noctis peritura voluptas,
Expellet regnis teq. genusq. tuis.

R E X. Qualis autem sit picturæ forma
ex versibus Sole clarius apparet.

*S*tat **R E X** in medio nudus, quem cingit vtring.
Ciuis, Sacrificus, nobilis, agricola.
*H*oc monet, vt regi sint publica commoda curæ,
Et colat imprimis numina sancta Dei.
*N*amq. vbi rex nimium luxuq. addictus & armis
Nec populi memor est, nec pietatis amans:
*E*uertit miseros talis petulantia ciues,
*E*uersis princeps, ciuibus, ipse perit.

S E N E C A.

ERrat, si quis existimat ibi tutum esse regem, vbi
nihil tutum est à Rege. Remissius enim impe-
ranti melius paretur.

I D E M.

Regibus boni, quàm mali suspectiores sunt, sem-
perq. his aliena virtus formidulosa est.

P iiij

Dion

Nemo credit eos, qui vim inferre possunt, si Iudicum munere fungantur, ex Iusticia agere: Verum hæc omnium est opinio, speciem eos, ac quasi adumbratum quoddam exemplar Reipub: propter verecundiã, veritatem actionum suarum prætere, ac sub Iudicij nomine cupiditatem suam explere.

Prope dormitorium regium est, conclaue cubiculariorum, in quo raptus Proserpinæ, & Ceres mater eam quæritans eleganter exprimitur. Huic contiguum est sacellum sanctum & augustum, in cuius ara marmorea, miri candoris, interlucente auro bracteato sculpta est Evangelica parabola de filio prodigo, Lucæ 15. Quid ego tibi laudem pauimentum emblemate vermiculato stratum, quid æreum baptisteriũ, candelabra, auream Redemptoris nostri crucem, diuitem ad sacra facienda ornatum, pulpitem, conuersionem D. Pauli, quid deniq; baptismum Iohannis iucundum spectatu, & vnde te vel repentina inceserit religio? Videas λόγον Θεάνθρωπον immergi aquis, cœlo aperto, & comitibus angelorum aliquot myriadibus Spiritum sanctum corporali specie, tanquam columbam descendere: æternum patrem dicere, in hoc filio ipse mihi placui: Cernas hos induere vestimenta, stillare illos, alios contremiscere frigida perfusos

perfos, alios magno nisu discingere sese, & vt abluantur lauacro regenerationis ipso vultu præ se ferre. Eò loci, vbi herus meus sacris interesse consuevit, patris Ioannis Rantzouij epitaphium è Dania missum in æs luculenter incisum visitur:

Cum placido vitæ mutasset tempora fato
Ioannes heu Rantzouius.

Luxerunt nati, coniunx, Holsatica tellus
Vno ore plangenteis patrem.

Mars tumulo imposuit Laurum, Zonamq; trophæumq;
Et hostibus demtas opes.

Pax etiam, aut concors huic, aut contraria Marti
Amantem laudauit sui.

Fama hinc dispergens latè ore manuq; secuta est
Virtutum testimonia.

Qualiter hunc igitur vixisse putabimus annis
Lustrorum bis septem & tribus?

Tot, namq; hic vixit, quem Mars, pax, fama perennis
Requirant, laudent, efferant.

Et pia cum natis coniunx viduata marito,
Et patria, lugeant patrem.

AD FORES HENDECASYL.

LABA HEINRICI RANTZOVII
conspiciuntur.

Hinc, quicumq; subis locum, resiste
Paulum, si placet, atq; paucula audi.

Votium

*Votuum Domini vides sacellum,
In quo res peragit sacras, & ore
Nostra percipitur salutis autor,
Fundunturq; preces, piaq; voces
Et dicuntur & audiuntur. Ergo
Arcem si venis huc videre saltem,
Illius studium bonamq; mentem,
Qui poni voluit sibi, probato,
Aut si res ita fert tua, æmulare,
Et semper pietatis esto cultor:
Sin huc ingrederis, sacris vt ipse
Inter sis simul, ad fores, prophanas
Omnes exue cogitationes,
Et mentem indue sancta cogitantem,
Præsentemq; puta Deum videre,
Ad quem verba facis, precesq; fundis,
Illi corde pio, piaq; lingua
Pro donis age gratias benignis,
Collauda, venerare, concine, atq;
Dictis suppliciter precare votis.
Huic soli est operi locus dicatus,
Illud te monitum prius volebam.*

IN TABULAM DE CONVER-
SIONE D. PAULI.

EX operum meritis non pendet vita salusq;
Per Christum acceptos gratia parta facit.
Exemplum

*Exemplum est Paulus, quo vix crudelior alter,
Qui populum Christi persequeretur, erat.
Is tamen errorem edoctus, gratisq; receptus
Iusticiam fidei viuificantis habet.*

Conspicitur in pariete etiam hæc sententiâ Senecæ: Si scirem Deos peccata ignoscituros, & homines ignoraturos, adhuc propter vilitatem peccati, peccare erubescerem.

Quâ domus ad Caurum vergit, Gynæcium est nobilium, & hoc conuenientissimis, vt cetera pleraq; tabellis exornatur. Etenim supremum prouerbiorum Solomonis caput, Ideam & quasi normam vitæ mulieribus proponens, distributū est in sex quasi partes, quarum quæuis in totidem vitreis laminis, stanno, ne pelluceant, incrustatis, tam exquisito picturæ & colorum genere, nec non auri argentiq; subtenuibus bracteis est expressa à Iohanne Londenſi Dithmarsicæ pictore, vt rethorculum efficaciori orationis fulmine, mentem femineam sua sede & statu dimouere & informare vix posse, in animum inducam. Pro suo cuiusq; tabulæ argumento Dimetra lambica annexa cernere est.

Felix, proba qui coniuge

*Dei potitus munere,
Vincit Smaragdos India,
Laborat & net impigrè,*

L

Hæc

*Hæc, institoris fortibus
Est conferendaq; manibus,
Vestem parauit, vendidit,
Victum manuq; quæsit.*

*De nocte surgens dat suis
Pensum, cibumq; ancillulis,
Lucerna non extinguitur,
Huic vir breui ditabitur.*

*Domus negotia inspicit,
Agros emitq; & conserit,
Non ociosa deuorat
Panem, nouum sed præparat.*

*Pascitq; egenos largiter,
Non cogitans inaniter
Perire: Quæ Deum colit
Dans pauperi cælum accipit.*

*Dos est quibusdam plurima,
Et forma vultus splendida,
Sed quæ laboris & Dei
Amans, corona hæc est viri.*

AD orientem æstium est cœnaculum, quod
venatorium dicunt: Nam suspenduntur in eo
venantium tabulæ duæ, plurima ceruorum, pla-
tycerotumq; cornua, quorum pleraq; inaurata, v-
num etiam clauo fixum in tabula, reliqui corporis
lineamen-

lineamentis in ea sic grauiter afflictis, vt ridendo
 terriculamento, speciem cerni iam iam impetum
 in intrantem facturi, præbeat. Est quoq; cernere
 Venerem cū Cupidine apprimè venustā, et suspen-
 sa è lacunari candelabra ex ramis ceruinorum cor-
 nuum orichalco circumdatis, & in modum coro-
 næ iunctis. Pauimentum (vt ab omni parte no-
 men agnoscas) canum, venatorumq; cornu inflan-
 tium imagines figlina arte inustas repræsentat.
 Quæ i tabula venatoria priore reperi, huc ascripti.

L Audibus eximjs ars est decoranda Diana,
 Si non exsuperet cum feritate modum.

Reddit enim timidos procures ad prælia fortes,
 Anxia lætificans corda dolore graui.

Mollitiem pellit, scuiq; cupidinis arcus,
 Languida incundo membra labore leuat.

Sternit apros, ceruosq; premit, qui damna colonis
 Tristia dant rudibus, dum malè farra terunt.

Suppeditatq; dapes, nigræq; alimenta culinae,
 Pellibus hirsutis corpora nuda tegit.

Ergò venandi ne tu contemne laborem:

Hic tibi quandoquidem commoda dicta feret.

Hoc studium patribus Cultū quoq; teste probatu **R**

E bræi vatis Religione sacr **A**

Nomine Esau venandi Insignis laude quid? an no **N**

Robustus Nimrod Sic quoq; clarus era **T**

Q ij Infestus

<i>I</i> nfestus si non sis	<i>T</i> risti clade coloni	<i>S</i>
<i>C</i> ur refugis studium?	<i>I</i> ure fruare tu	<i>O</i>
<i>V</i> enari quisquis	<i>N</i> on gaudes <i>Zoile</i> lux	<i>V</i>
<i>S</i> is mollis licitum est,	<i>A</i> ut piger vsq. sit	<i>V.</i>

SUB ALTERA TABULA.

S i spartam, Christi quæ munere contigit, ornes
Et facias pura conficienda, fide.

*N*unc leporem catulo quid obest, excire sagaci?

*N*unc in frondoso tendere rete iugo?

*A*rdua nunc in apro venabula condere diro?

*N*unc vario cernos exagitare metu?

*I*pse Deus generi dedit hæc animalia nostro,

*Q*uis tibi concessum ius prohibere potest?

*Q*uid quod ad arcendos faciat Venatio morbos?

*Q*ui bene venatur, sanior esse potest.

*Q*uid quod sollicitis arentia corpora curis

*L*atificet, vires suscitet atq. pigras.

*Q*uid quod militiæ species sit magna tremendæ,

*H*orret si quis apros, horret & ille viros.

*Q*uid quod Oristæ radiantia tela Diana

*E*xcutiant arcus sæue Cupido tuos.

*P*raterea nigræ quod fert alimenta culinæ

*N*udaq. detracta corpora pelle tegit.

*H*actenus Exiguus Immensa Negotia Rhythmis

*E*xplico, Ieiunis Cantoq. Vasta Sonis.

*R*estringas

*Restringas Autem Nimium, Temnisve Sequenda
Occino, Venator Ius Violare solet.*

APOLLO ARBITER, CORAM QVO
DE PRAESTANTIA DISCEPTANT, VENVS,
Iuno & Diana Venationis Dea, cuius ceruo, secun-
dum eam causa iudicata, corona, praemium,
decernitur H. R.

M*Argaridum niueam neſtens Eris atra coronam,*
Quæ minus ô Diua, noxia, tollat, ait.
Tum Iuno: Paridis dirimantur iurgia voce
Num Venus hoc etiam iudice ſerta feret?
Phæbus ad hæc: Animos Iuno, ſed corpora Cypriſ
Corrumpit virgo hæc ambo, Diana ſouet.

QVERIMONIA LEPORIS
RITHMICA,

F*Leuit Lepus paruulus,*
Clamans altis vocibus,
Quid feci hominibus,
Quod me quærunť canibus?
Apertis oculis dormio,
Parum iuuat id quod video,
Quid feci hominibus,
Quod me exagitant canibus?

Q ij Longas

Longas aures habeo ,
Nec prodest, quod audio,
Quid feci hominibus
Quod me vexant canibus?

Breues pedes habeo ,
Cursu velox abeo,
Quid prodest? sequuntur homines ,
Et canes incitant celeres .

Paruus sum & placidus,
Et nemini noxius,
Quid feci hominibus ,
Quod indignant canibus?

An in hortos quod irruo,
Olusq; quod comedo
Nonnunquam & tenuem
Quod proculco segetem?

Hanc hanc iustam scilicet ,
Causam putat quilibet
Ut canibus agitet,
In cassibus lancinet.

At quid non atrocius ,
Quid non & damnosius,
Lupus facit rabidus,
Et sus valens dentibus.

Hos

Hos rarus prosequitur,
De me præda petitur,
In me canes aluntur,
Et retia neſtuntur.

Adde dum me canibus
Seſtantur velocibus,
Sapè ſic proterunt ſegetes,
Quod centum nequeunt lepores.

Ego petor indies,
Mibi nunquam eſt quies,
Quid o quid feci hominibus,
Quod me lacerant canibus?

Pellis eſt ignobilis,
Ad nullam rem utilis,
Quid feci hominibus,
Quod me agunt canibus?

At caro mea dulcis
Et quæ ſapiat multis,
Hæc eſt, hæc cauſa hominibus,
Quod me inſeſtantur canibus.

Postquam vident me fugam capere,
Hiſce, hiſce ab omni latere
Inclamant: quæ illis eſt maxima
Voluptas, mihi Mors eſt pallida.

Canes ubi tenent me,

Dentibus

*Dentibus laniant me ,
Lator, si effugio ,
Si non, malum aufero.*

*Captus in aulam deferor ;
Cum gaudio excipior ,
Vere infixus torreo ,
Inde in mensam collocor.*

*Lætis animis me comedunt ,
Vinoq; dulci, se proluunt ,
Quid est, quod feci hominibus ,
Quod me persequuntur canibus.*

Nunc accedo ad secundam contignationem, quæ etsi paululum cedit inferiori, tamen tam munda est, ut hospites elegantes accipere possit. Etenim paupimētata est, et albario opere polita vndiq;. Intergerinis autem intersepitur & discernitur in cubicula quatuor, ambulationem, & (si licebit ab usu nomen notam rei ponere) sphæristeriū oblongum: in quo pilari lusiuncula, palæstricæq; hironomia liberi heriles reficiuntur, & grata vicissitudine nunc literis, nunc progymnasmatibus bellicis imbuuntur, ne remissiones negatæ odium studiorum faciant ingenuis. In hoc labores Herculis cum Mythologijs à patre, tanquam irritamenta virtutis, liberis propositi cernuntur, quos ob raræ & reconditæ sapientiæ & eruditionis significat

nificationem præterire non debeo. Sunt autem inter septem columnas lapideas distributi, super has ex lapide albo virtutes feminarum habitu conspiciuntur, Iustitia, Temperantia, Fortitudo Patientia, Charitas, Fides & Spes.

HERCVLIS ACTA PRÆCIPVA

CVM MYTHOLOGIIIS.

I. HERCVLIS FACTVM.

INfans in cunis geminos à Iunone immisso ser-
pentes, manibus præhēsos extinxit: Cū vnà cu-
bās Iphichus frater territus, parētes fletu excitasset.

MYTHOLOGIA.

Serpens antiquus ijs maximè, de quibus ex be-
nigna propaginis, aut syderum inclinatione vir-
tutis opinionem concipit, ab ipso ortu tendit insi-
dias. Hos econtra tum sancti angeli suscipiunt tu-
telari præsidio defendendos, tum ipsa virtutum
semina, & igniculi naturæ insiti, sese nec volunt
nec possunt deserere.

SECVDVM.

A Dolefcens hydræ colubris & capitibus bul-
lulantem, in Lerna palude telis et claua oppu-
gnavit, tandemq; facibus & igne consumpsit, cum
cancrum hydræ suppetias ferentem, pressu pedum
interemisset.

R

Mytho

M Y T H O L O G I A.

Adoleſcentia violenter à prauorum ſubinde re-
naſcentium appetituum impetu infeſtatur, qui-
bus mundi delitiæ cauſam & materiam ſubmini-
ſtrant: Contra hæc in tali ætate lubricis initio ve-
ſtigijs, tanquam in paludinoſo ſolo conſiſtit ratio,
donec virtutis & pictatis ſtudio exercitioq; confir-
mata, hydram appetituum, cum mundi peſſundet
& conſumat.

T E R T I V M.

Leonem inuſitatæ magnitudinis in Nemæa ſyl-
ua inter Cleonas & Phliuntem, cum omnem eam
regionem infeſtaret, iugulauit: Cuius ipſi pellis
poſtea fuit pro indumento.

M Y T H O L O G I A.

Leonem iugulauit fortiffimum, quiſquis repug-
nantes rectæ rationi appetitus, non modo ſanis
deliberationibus & conſilijs refrænauit, ſed ijs om-
nem omnino ferociendi detraxit facultatem, atq;
mētis & rationis iudicio effecit obcedientes. Quid
hoc indumento pectori generoſo pulcrius eſſe
poſteſt?

Q V A R T V M.

Diomedem Thraciæ regem hominem durum &
ſanguinarium, qui inhumaniffima crudelitate
equos ſuos aduenarum paſcebat carnibus, occidit,
cumq;

eumq; vicissim iumentis suis obiecit deuorandum.

MYTHOLOGIA.

Generosus animus non potest non odisse & execrari Tyrannos, vt infestissimos libertatis & societatis humanæ hostes: qui tamen, vindicante in eos iusto æterni Dei iudicio, in ea plerumq; incurunt mala, quibus alios ipsi affligerunt.

QVINTVM.

In hispidis Erimanthi montis iugis, aprum terribilem & Arcadiam vastantem cepit, & viuum humeris impositum detulit ad Eurystheum.

MYTHOLOGIA.

Magistratus in mōte positus est, edito videlicet & illustri loco, & in manu tyranni atq; improbi reipub: apri instar, vastat & conuellit. Sed quisquis cum legitimè adeptus est, & recte gerere vult, viuum conseruare debet, neq; committere, vt ipsius culpa & ignauia salutare eius in reipub: exercitium intermoriatur.

SEXTVM.

Acheloo pro Deianira Oenei Calydonum regis filia, cum ipso certanti, seq; initio in serpentem, mox in taurū vertenti, alterū auulsit cornu: sicq; ille victus, in sui nominis fluuio sese occultauit.

MYTHOLOGIA.

R ij

Qui

Qui mente praua et malis artibus ad Reipub: gubernacula aspirant, in omnes se. formas callide vertunt, quo magis voti fiant compotes. Tales consilio mouendi, aut authoritate coërcendi sunt, vt sua sorte contenti, in sui nominis fluuijs occultentur, & in ea, quam nacti sunt, priuatæ vitæ statione conquiescant.

S E P T I M V M.

IN Lybia apud Lixum oppidum Antæum gigātem, terræ filium à matre duplicatum robur, quoties terræ proiectus esset, assumentem, tandem lucta pectori astrictum suffocauit.

M Y T H O L O G I A.

Qui vulgi fauore euecti, legum septa perumpere, & rempub: turbare nituntur, contra hos non solum legitimo magistratus iure, sed arte quoq; agendum est, vt subtractis, quibus contra patriam abutuntur, præsidijs, improbi eorum conatus, absque tumultu & seditione extinguantur.

O C T A V V M.

Interemto Dracone peruigili, aurea mala Hesperidū, quæ Atlantis filia fuerunt, ramis decerpit, & ad Eurystheum detulit, vt his frueretur.

M Y T H O L O G I A.

ANon Draconis instar auari peruigil est animus

mus, qui dies atq; noctes sola opum cupiditate inflammatus, angitur & æstuat. An non hoc extinguitur animi morbo, Hesperidum aureis malis fruitur, quisquis indulgentis fortunæ beneficijs, consistente intra suos fines utitur moderatione & liberalitate. An vero, Dracones hi sunt, qui tum ad Reipublicæ labem, tum ad priuatorum detrimentum monopolia instituunt. quibus utinam Herculeæ claua reges & principes aurea monopoliorum mala, cum tanta publica, priuataq; calamitate plerumq; ematurefcentia, è faucibus eriperent.

N O N V M.

Atlantem fessum Syderib. ferendis, laborum parte, leuauit, cum humeros astrorum ponderi submisisset.

M Y T H O L O G I A.

Cum Atlante verò an syderum pondus sustinet, qui omni cogitationum, actionumq; suarum vi, ad cœlestia tantum contendunt. An potius ij, qui regibus, alijsq; magistratibus consilia recta, & ferendis imperij oneribus idonea subministrant.

D E C I M V M.

Gerionem tricipitem siue triformem fulguris filium in Gadib. superauit, eiusq; arma in Latium transtulit.

M Y T H O L O G I A.

Qui parasiticis artibus se dedunt, triformes efficiuntur

R iiij

ciuntur

taurorum animos induant, minusq; cæteris hominibus se delinquere existiment, si rapinis rem augeant familiarem, aut alienas temerent nuptias. Hi continendi sunt, vt ab illicita animum reuocent cupiditate.

DECIMVM TERTIVM.

Alcesten Admeti Theſſaliæ regis vxorem, quæ pro mariti ſalute vitam ſponte depoſuerat, ab inferis ad preces Admeti reduxit, cum Cerberum claua ſuſtulifſet.

MYTHOLOGIA.

Nihil in coniugio dulcius perpetua amicitia, & ad omnia honeſta conſentiente voluntate, vbi, quod alteri graue eſt, alter in ſe præoptat deriuari. Proinde tales procliuius ex aduerſis eripit ille, à cuius omnia dependent voluntate.

DECIMVM QVARTVM.

Heſionem Laomedontis Troianorum regis filiã beluæ marinæ expoſitam, & ad ſcopulos religatam, occiſo ceto liberauit.

MYTHOLOGIA.

HEſionem ſpectas? Virgo eſt, nuda eſt, vinctæ eſt, beluæ obiecta & crudeliſſimæ morti propinqua eſt: ecquid illa calamitoſius? in eius perſona pupillos, viduas, orphanos, omnesq; adeo oppreſſos, &

ciuntur. Nam simul adulatoris, falsi amici, & decoctoris personam induunt. Hos deuincit, & armentis spoliatur, quisquis eos à mensa & conuictu suo, atq; ab omni adeò consuetudine, & familiaritate, penitus facit alienos.

V N D E C I M V M.

CÆcum Vvlcani filium in vasta spelunca degentem, & Latium infestantem latrocinij & incendijs, cum mugitu bouum interuersi pecoris receptaculum deprehendisset, in speluncæ vestibulo claua interemit.

M I T H O L O G I A.

FVres, sicarij, latrones, incendiarij & similia humani generis stercora, in cauernis degunt, bonorum fugientes conspectum & societatem: In horum speluncas atq; latibula quocunq; modo inquirere magistratus debent, vt infamibus supplicij plectant comprehensos.

D V O D E C I M V M.

Centauros Xionis & Nubis filios semihomines & semiequos, Hippodamen Pirithoo nuptiarum die eripere volentes, bello superauit.

M I T H O L O G I A.

Est non raro, vt qui inter equestres homines indolgentius aut negligentius educati sunt, centaurorum

fos, & tuæ opis egentes, mente considera. Hos ut tuearis atque subleues, id eò magis tibi incumbit, quò plus & tu potētia, opibus, authoritate, gratia, consilioq; vales, & illi periculo atq; ærumnis sunt viciniore.

DECIMUM QUINTUM.

Veste indutus, quam ipsi Deianira conciliandi amoris ergò accepta de Iole fama, per errorem miserat, quum pestifero Nessi centauri sanguine imbuta esset, veneno totū corpus inuadente, grauiſsimorū cruciatuum dolore atq; impatiētia, penè in rabiem actus, semet in structam pyram in Oeta monte coniecit, sicq; expirauit, ætatis suæ anno 52.

MYTHOLOGIA.

Quam luctuosus exitus viri fortissimi. Sic fit, ut qui vagis feminarum congressibus per omnem vitam ludunt, aut ab ijs, quibus excellunt artibus, deferantur, aut eorum fructu, nec diu, nec verè gaudeant, quæ fortiter & præclare agendo optimè administrauerunt.

Quod ad uersus & picturas attinet, reliquorum huius tabulati conclatium, non adeo multæ visuntur, Graphica tamen oppugnata à Turca urbis in Melite Rhodiorum militum Insula, mirum quam tremefaciat intuentes. Deinde versiculi quoque sequentes ibidem leguntur.

Virtutis

Virtutis vincenda voluptas viribus.

Non alijs, sed virtutum vincenda voluptas

Viribus, eximia si tibi laudis honos.

ITEM MVSCÆ EPITAPHIVM

SVBSCRIPTVM VRNAE EIVS CALI-

ci, in quo submersa fluitat.

Gustatrix iacet hic lautorum Musca ciborum,

Et conuiuia frequens Caesaris in tabula.

Non volucris rostro, stimulis nec Araneæ aduncis,

Cretica sed gustans pocula, pota cadit.

Nil opus est luctu: quis enim tam nobile fatum

Lugeat? est auro condita, mersa mero.

HActenus arcem & præcipua, quæ in ea spectantur, quod potui delineavi. Tertiam enim contignationem, frumentarium tabulatum, atque item quæ ad has ædes sunt, magnum granarium & equile temporis minimè securo inserviens, indicanda tantùm duxi. Itaque rectâ ex alto in portum inueherem, terrisque defessam proram aduerterem, nisi ædificia & hortos prædij addere animus gestiret quasi corollarium, quod dum lego, paululum te mihi des etiam atque etiam beneuole lector, rogo. Prædij ædificia ad orientem arcis collocantur, & in duas partes, rusticam et fructuariam, & si interdum concurrunt, diuiduntur: quæ omnia, vnâ cum horto consepita sunt querneis arboribus

S

ribus

ribus runcina dissectis, sic editis, ne quisquam alterius humoris subleuatus, eas transiliat.

Agger viæ editior, silicibus ab arce usque ad viam publicā est constratus. Equile quinquaginta plus minusve equorum capax est, ne quid stabulariorum cubicula & ephippiorū, phalerarumque conclauia commemorem. In eius prima contiguatione, frumentum, secunda, paleæ reponuntur. In foribus hoc scriptum visitur: Oculus domini pascit equum. In bouilis utroque latere ultra centū vaccæ, præter tauros & iuencos stabulantur. In fronte eius est villici habitatio, & bubulcorum cellæ, ubi vulgare hoc: Vestigia Domini pingue faciunt agrum. In area excutiuntur è spicis grana, & acus euannatur. Haud procul à bouili sunt hæræ, ouilia, *χλωροκορνέιν*, & columbaria tria: eorum duo binis palis, ferreis laminis indutis, ne quis feli, alijsue bestijs aditus pateat, suspenduntur, & plurima loculamenta recipiunt.

Fructuariam partē occupant fœnilia, & quatuor horrea pensilia, quæ montes Holsati à similitudine appellant. Ordinantur autem sic: Sex trabes in hexagonon dispositæ, & perpendiculariter surrectæ, in terram adiguntur, quibus fastigiatum culmen imponitur, cuius tignis ferreæ fibulæ clauis affiguntur, quæ amplexæ trabes, faciunt ut culmen attolli, aut demitti, ut horreum vacuum

aut re-

aut repletum fuerit possit, vecte in bigarum temo-
ne posito. Porrigitur autē temo per axem ad tres
pedes, in qua parte vectis ille surrectus colloca-
tur: Longiorem vero, quia iungi solent equi, in-
cumbentium pondus ad terram deprimit, surgen-
te ab altera parte vecti, & culmen attollente, vti fit
in librarum lance propendente. Bigæ etiam rura-
sum prorsum actæ magno sunt vsui, vt altius vel
subsidiat vel emergat culmen.

Terebratæ autem sunt per interualla trabes,
vt traiecto per fibulam & trabes ferro, culmen pē-
deat immotum. Longum esset & non necessariū
dicere cortes & ædificia, quæ pilentis inauratis, ar-
ceris, plaustris, retibus, plagis & ceteris, quibus
cælum pluuium est inimicum, sunt facta. Hort-
um amoenissimum ingrediamur, qui non solum
suauitate odorum, qui efflantur è floribus, sed gu-
statu fructuum, aspectu pergularum, vitium, topi-
arij, herbarum rararum, arborumq; in quincunces
positarum, ludentium piscium, cygnorum, can-
tuq; auium neminem non allicit & tenet. Bene igitur
dicere memini, nobilissimū genere, eruditi-
one, & virtute virum Heinricum Rantzouium,
sibi vel marmoreas domos sine hortis latomias vi-
deri, nec illusa auro laquearia ægrum suum ani-
mum tantum recreare, quantum in horto amaraci-
vnicum puluinum. Proinde in quinque præcipue

discernitur partes, pomariū, topiarium, pergulas,
aluearium & olitorium. Verum malorum, pyro-
rum, cotoneorumq̃, persicorū, mespilorū, pruno-
rumq̃ genera nil attinet recensere. Oleam tamen,
castaneas, iuglandes, corylos, moros, ficus, thymo-
læam, iuniperos, sabinam, buxos tonsiles, Laurus,
Cymbricum frigus ferre addiscentes, Item Illicem
aquifoliam non aculeato sed leui folio, & in iustæ
arboris magnitudinem crescentem, nō reticuerim.
Quod si eodem modo omnium fruticum & her-
barum huius horti contexerem catalogum, inex-
putabilis & tædiosus emergeret numerus.

Rariores tamen, quæ mihi in mentem veniunt,
nequeo, quin recitem, elementorum secutus ordi-
nem. Abrotanum mas & femina, quam hic cha-
mæcyparissum vocant, Aquilina, Angelicacosti
vires supplens, Aron, Bistorta, quæ limonium est,
vt quidam volunt, Bellidis variæ species, Buglos-
sa, Chalta, Calendulam vocant, Caryophylli flo-
res, Carduus Mariæ, & qui benedictus nuncupa-
tur, Crocus verus, Colutea, à solo Theophrasto
descripta, quam hic perperam Senam Arabum fa-
ciunt, Cucumeres, Cucurbitæ, Chamæmelon odo-
ratu nobile, Glycyrrhiza, Helenium, Hemionitis,
Helleborus, Intybum, Iris, Lilia, Lybisticum,
Lichnis coronaria, Leucoia, Menthæ Corymbi-
fera, Melanthion, Pimpinellæ genus acetarijs ex-
petitum;

petitum, Sanguisorbam hic dicunt, Pœonia femina, Phyllis, Pulegium, Rosarum multæ species, Rosmarinus, Samoluchus, Scholymus esculentus, Pseudonardi duæ species sylvestres, Staphilini tres, Satureia, Thymus, Violæ. Omitto Apium, rutam, hyssopum, lactucas sessiles, maluam, raphanum, napos & olerum genera plurima.

Herbarum, quas recensuimus, multæ in mille formas descriptæ, modò D. Iohannis & Henrici Rahtzouiorum, eorumq; coniugum nomina dicunt, modò in animalium, modò in eorum Labyrinthorum, qui acu pingi consueuere, formas effigiantur, multæ in puluinos ordinatim disponuntur. Vua autem crispa & Ribes vulgo appellata (quarum hanc læuem, illam asperum Ceanothon veterum (Gesnerus interpretatur) arcolas in sepiis modum cingunt eleganter; Latissimis vitibus pergulæ coloratæ opacantur topiato opere vtrinq; & veluti in testudinatum porticum iugantur, vbi non secus ac in nemore vmbroso sedas, obambules, cœnites, & proiectilibus æreis pilulis seu orbiculis in mensa oblongiori ludas, & collusoris orbiculos metam præoccupantes vel mensa detrudas, vel præcas, quin etiam Solstitium atq; ardorem Syrii, imbremq; capiti defendas. Præterea super pergulas ædícula turrita, scandulis tecta surgit, pere fenestras in Diketam capreoli serpunt,

pampiniq; eam inumbrant. Subter hanc Vertū-
nus Amaltheæ cornu ferens, cum versibus in lapide
incisis conspicitur.

HEINRICVS RANTZOVIVS.

Pomiferum quicumq; venis nouus hospes in hortum,
Ne mea miratus quæ sit imago, roga.

Est mihi Vertumno nomen, quia vertor in omnes,

Quas animus formas gestit habere meus.

Nunc habitu messor, nunc sum robustus arator,

Nunc manibus iures gramina secta meis.

Nunc frondes poterunt credi, vitisve putata,

Mollia nunc ramis poma reuulsa suis.

Quæ lubet, hanc sumo faciem, res nulla repugnat,

Qualibet in vultus apta figura meos.

Hinc est primitias anni, quod grata vetustas,

Inq; meas aras lactea dona dabat.

Seu patulis surgens ramis produceret arbor,

Seu varijs cingens floribus herba caput.

Nunc adeo, toto quæcunq; leguntur in horto

In manibus spectas munera prima meis

Poma, nuces, vuas, pyra, pruna, Cydonia, mora,

Quæq; nimis longum cuncta referre foret.

Si lubet è multis aliquid, quodcunq; lubebit,

Accipe, larga manus nil tibi nostra negat.

Hoc saltem oro vnum, pleno si ventre recedes,

Dicas, Vertumni munere vado satur.

Non

NON procul apiario sphæristerium, arboribus et
vitibus pulcerrime virentibus opacū spectatur
Ad ipsum vero lapis est erectus, phalæcijs eiusmo-
di in eo scriptis.

HEINRICVS RANTZOVIVS.

Quam spectas, apibus domus dicata est,

Ex magna ratione. Nam propinqua

Quondam examen apum resedit arce,

Huc latos procul aduolans per agros,

Cum vix vndiq̃ iam parata staret,

Quod faustum ratus omen esse, paruum

Hanc illis Dominus Domum locauit,

Et ne deiciant, iubet, nepotes

Ne quisquam moueat loco, precatur.

EXamen autem illud, ex quo ceteræ apes iam
quadraginta annos, minus duobus, omnino
sunt propagatæ, domi arcis in candelabro æreo, è
lacunari catenis demisso resedit, cunctis nouitate
rei suspensis omnib. his ἡδοναῖς (sic enim appellare
libet) elegantia sua & situ non est inferior. Quippe
qui piscinam ponte iunctam, hortos, syluas, & ar-
ua despicit, & sine aëris nocumento Solem exori-
entem, meridianum, occidentemq̃ admittit, aut cū
voles excludit. Nec satis est cœlo hunc liberio-
re frui, ni & pinacothecæ, quæ in arce est, dubiam
faciat palmam.

Ostentat

Ostentat enim cum stupore omnium præstantissimi & incomparabilis heroïs Iohannis Rantzouij & coniugis Annæ Icones, ab artificioso lithoglypho ex alabastrite, iussu heri mei elaboratas: ex candido verò saxo & ex parte deaurato septem planetas, Nympham pharetratam & stando dormientem, Priapum verecundum, atq; equum instratum, puparum enim & sigillorum mirifico desiderio herus tenetur. Iconi Iohannis Rantzouij, & postremis tribus, sequentia epigrammata subscribuntur.

SVB TOGATI IOANNIS RAN-

TZOVII ICONE EX ALABAS-

trite H. R.

<i>H</i> Oc Ego Non, Ratio Illius Cum Vera Subitu	R
<i>Esse decus magnum statuo, tractata per arm</i>	A
<i>Non etiam pacis studio sibi quærere nome</i>	N
<i>Recte agitur sumtis, cum pax componitur armi</i>	S
<i>Id decus est verum. Sic tu pater optime bell</i>	A
<i>Cum gereres regum, hoc peragebas omnia fruct</i>	V
<i>Vt stabiliretur pax & concordia regni</i>	I
<i>Sic & ego contendo, meo pax vt bona suas</i>	V
<i>Regnet Agris Nostris, Seq̃ Addat Vt Inclita Virtu</i>	S

NYMPHA VENATRIX, HOR-

TI ET MEDICINAE CVSTOS H. R.

Huius

*Huius Nympha loci, parui custodia stagni,
Dormio dum stando fessa reclino caput.*

*Parce meum, quicumq; ades hic abrumpere somnum:
Seu tibi stare lubet, siue sedere, tace.*

*Me meus Henricus Dominus cognomine Rantzou,
Excubias horto iussit habere suo.*

*Si strepitum facis, & somnum mihi rumpis, in horto
Clamabo furem te posuisse pedem*

P R I A P V S.

*Ut reor, indignum nemo scelus esse putabit,
Quod uolui pulc'ra uirginis esse comes.*

*At mihi ne iunctam thalamo, quis credito: non est,
Non adeo sordet libera vita mihi.*

*Stulta meum rapit officium, seq; ingerit vltro,
Inq; meo custos vult vigil esse loco.*

*Stultus ego contra seruo vigilantior illam,
Et pariter mentem pasco oculosq; meos.*

*Victa iacet somno, tu sis quicumq; caueto
Rumpere, soli hoc est fas licitumq; mihi,*

*Si non obsequeris, sustem falcemq; recuruam
Non frustra sumtos experiere mihi.*

E Q V V S S Y M B O L O N H E I N .

R I C I . R A N T Z O V I I .

*Fidus ego Domino, Domini feror acer in hostes,
Dumq; libens alijs seruo, sic pereor.*

T

Prady

PRædij ædificia, quæ dixi tabellis querneis sæpi-
ri, ea hæcenus: nunc agros & pagi formam in-
uolo. Verum quemadmodum animo concepī,
sic verbis, vt exprimam, vereor. Imagina-
re oblongam quadraginta stadijs aream Smarag-
dinam, transuersim folsis intercissam, per medium
qua via regia est, continuis salicibus vestitam, in-
termisissis villarum tectis ornatam, vtrinq; verò ag-
geribus & aquis inclusam. Etenim pagi Bredens-
bergæ septentrionale latus cingit in longū Stora
fluuius nauigabilis, qui:

δις μὲν γὰρ τ' αἰήσιν ἐπὶ ἡμᾶν, δις δὲ ἀναποείδοι,

hoc est: his dierum noctiumq; singularium inter-
uallo vi Albis in Oceanum se exonerantis, tumes-
cit, & in se ipse residit, nec vltra trecentos & quin-
quaginta passus distat ab arce. Itaq; Oceani diui-
tias nauigijs cōmodissimè ministrat, et thuris co-
pias quoq; versum exportat. Hic fluuius cele-
bris quoq; est ob munitionem à Carolo Magno,
(vt Francorum historiæ testantur) in eius ripa ad
retinendum vicinos populos subactos in officio
exstructam. Ad oram verò australem incum-
bunt ei paludes decliues, scaturigines & aquas,
pluuijs collectas euomentes.

Egregiè dicat quis, munitus est natura hic pa-
gus, sed quem depresso solo, totum pcenè innatare
aquis, paludiq; quam terræ frugiferæ similiorē
esse

esse necesse apparet, & in quo ornando à Iohannē Rantzouio longè celeberrimo & prudentissimo habito, tantum operæ sumi nō debuisse videatur. Id mediis fidiis (ignoscite falso) ipse cum viris in magno pretio eo tempore habitis affirmassem, si tum natus, & præsens intuitus loca, & interrogatus fuisset, operæ pretium ne esset hic munitiōnem condere, & pagum illum stagnantem Lerānam ductis fossis in melius prouehere. Etenim pagus ante annos 38 speciem stagni ferè perpetuæ stāte præbuerat, hyeme speculi & præter pisces & fœnum rarò quicquam incolis suppeditarat.

Illi Cræso ditiores colebantur, qui tantum pecoris alebant, quod frugibus annuīs commutarēt. Reliqui fœnum, annuū terræ censum, Itzehoam, quæ Bredenberga distat duo millia passuum sæpe deportabant, & drachmis aliquot uenditum non ita multis compotatiunculis insumebant, interdum & instantis anni spem dubiam decoquebant. Quod ni ad hamos & retia ad extremam anchoram fugiebant, mendicando stipem corrōgare cogeantur. Pedes ob aquarum copias rarò ædem sacram uisus est ingredi, æstiuo tempore nisi vadasset. Proinde eo recusato, aut equo, aut lintre ueheretur oportebat, qui sacra facere in animo haberet.

His tamen incommodis tantis paterfamilias

T ij

sapientis

sapientissimus, & dux felicissimus Ioannes Rantzouius nihil terreri, sed totus in amorem patriæ effundi, vela animi sui pandere, ad auxilium terræ inertæ omnem animi aciem intendere. Itaque territorium Bredenberganum consentiente ob egregiè nauatam in bellis operam primo Friderico Daniæ rege, à Borsholmensium monachorum collegio emit, & in adiacentia rem bello partam collocauit, aggeremque quasi obicem Storæ validiorem obiecit, fossas septenis pedibus latas, quinque altas per quoduis iugerum excitari iussit.

Hæ stagnantes aquas ad Storæ aluè deducunt, positæ super aggerem cauatis arboribus, et earum ualuis sic libratis, ut tuescete et impellente æstu claudantur, eo residete patefcant, et collectas ex agris aquas expuant. Ne uero ex paludibus meridians recentes aquæ subinde scaturirent, & ibi duxere aggerem. Hac admiranda & diuina industria uir sagacissimus, qui ad arma tantummodo natus videbatur, omnium opinionem præclare vicit. Nunc enim Bredenberganum solum frumenti & leguminis nullum genus recusat, triticum, olyram, triangulare illud in modum fagæ glandis frumentum, farina triticeæ simile, folijs hederæ, rubicundis et bipedalibus geniculis, quod, quia latinum nomen uetus adhuc sub iudice pendet, ad imitationem Germanorum Fagotriticum dixeris: auenam, item milium,

miliū, fabas, pīsa, & alia huiusmodi. Atq; vt solidum & perpetuum præstaret hoc beneficium *χωμετισκόπων* collegium instituit, quos ne quid vitij facerent aggeres & fossæ, circumspicere, & desides noxæ dedere imperauit.

In ore omnium est Hercules, nec seculis sex & viginti aboleri potuit, quod Lernæam hydram quinquaginta capitum debellarit, hoc est, paludē auram pestilentem eructantem ingesta terra solo æquarit, quam reris laudem sibi comparabit suorum subditorum pater Rantzouius. Et nati natorum, & qui nascentur ab illis in astra ferent. In cuius laudem reges & principes conspirant, quem viuētem subditi in oculis ferebāt, cuius defuncti sacrosanctam memoriam habent, cuius cum beneuolentia & honore mentionem faciunt exteri, cuius pietatis, beneficentiæ & exultationis buccinatores sunt sacri ministri. Neq; id immerito, aut enim re aut consilio iuuabat omnes: Cuius locus pletissimus testis, vt cetera taceā, Munsterdorpia est constituta, in qua venerandi huius regionis D. pastores conuentus agunt, de doctrina, & coniugiorum quibusdam intricatis negotijs, qui diu iam fieri desissent, nisi hic regē deprecatus fuisset, ne reditus sacros in profanum bellum conuerteret.

Quid quod ædem sacram, & turrim Bredenbergæ suis sumtibus ædificauit, & restaurauit,

quam rude iam donatus à rege, frequens adiit, il-
lud sæpe recitans: Vnum rogavi à Domino, ut
inhabitem in domo eius cunctis diebus vitæ meæ.
Ad eius exemplum nullus non subditorum se cō-
ponebat. Memini tamen, cum ad ædem propera-
ret curru desilire eum, & cuiusdam casam irruere,
quem sacra negligere præ somno solitum, depre-
hensum in lecto, malè hasta multavit, & impieta-
tem dedocuit. In hac æde Iacobus Qualiùs eques,
peste occumbens, est sepultus. Ei Henricus Ran-
tzouius monumentum fecit saxæum, cum eiusmodi
di inscriptione;

*Q*ualius ante diem crudeli vulnere raptus
Mortua in hoc tumulto membra Iacobus habet.
Cumq; noua postquam sex tantum coniuge menses
Proh dolor, vnanimis vixerat, occubuit.
At memor Henricus fidei, quam præstitit olim,
Hac Rantzou statuit triste doloris opus,
Vt sit perpetui lacrymabile pignus amoris,
Et simul vt capiat præmia rara fides.

Lapis etiam parieti insertus à D. Henrico Ran-
tzouio aureis literis hæc ostentat: Huius templi
reparatori, turris nec non arcis vicinæ Bredenber-
gæ fundatori, Daniæ quondā liberatori & Dith-
marsia domitori Ioanni Rantzouio equiti auro
to, filius Henricus gratitudinis ergò posuit.

Restarent

Restarent adhuc plurima, quæ appellatione præ-
dij, in quo describendo versamur, comprehen-
duntur, vt mola aquaria, ἀνέμόμυλον quod decussa-
tim craticeis & lino intectis alis à leni vento circū-
agitur, piscationes, venationes, et alia. Verum si his
longius immorarer, in immensum cresceret liber,
nauseamq; tibi, lector, mouerem, quam metuo vt
sæpius concitarim, dum omnia sine delectu & splē-
dore, quod nihil non accumulanti euenire oport-
uit, cructo, & impetum continuę orationis, versis
bus infertis retardo. Sed quia omnes angulos ar-
cis & prædij tecum circumire una opera propo-
sui, non narratio, quæ describit, sed arx, quæ de-
scribitur, longa videri debet. Et si verò me non
fugit, quam difficiles Momos sim habiturus, quos
fatieta rerum nostratium cepit, stupore autem ex-
ternarum sic ducuntur, vt eas, quæ ante pedes sint,
non animaduertant, imò has ne quidem faciant
flocci: tamen candidum lectorem, non dubito, de
hac qualicunq; lucubrationcula clementer iudica-
turum, idq; vt faciat etiam atq; etiam rogo.

Nam quanquam non inficias iuerim, plurima
esse, apud exterarum nationes, digna de quibus habe-
atur sermo: tamen ijs operam solummodo impen-
dere, eorum meditatione ceu uisa Gorgone perpe-
tuo obrigescere, de nostratibus profundum agere
silentiū, eaq; debitis encomijs defraudare, id verò
(dicam

(dicam quod sentio) viri forte sua non contenti, si
niqui, & ingrati Deo & hominibus, vel si opus sit
pluribus contenderim. Sunt enim & apud nos vi-
ri aliaque opera, quae plerisque exterorum prae-
ant palmam, aut dubiam relinquunt. Vide enim
mihi (ne meum negotium semper non agam) quam
delectabilis, quam utilis patriae & domino sit mu-
nitione Bredenbergensis, quibus duobus aedificandi
rationem Socrates apud Xenophontem metitur:
vide etiam mihi carmina, dignave ea omnia, quae
inuoluerentur silentio? Ut habeantur, meo nar-
rantis vitio accidere potest.

Nam quid ego illud Cymbricae gentis colu-
men & decus, vindicem libertatis Danicae, heroa
Ioannem Rantzouium, virtutum bellicarum &
togatarum tanquam speculam sublimem positum,
ad quam laudis utriusque cupidi dirigant cursum,
quid, inquam, ego illum commemorem? De illo
orbis mundi loquitur nunc, & loquetur semper,
ut hydram Bredenbergensem exiccavit, ut triumphum
ex ordine regum Danicorum, Ducumque Holsati-
corum a legationibus, a consiliis, a bellis perpetuo
fuerit, & operam inenarrabilem navarit. Ante
marmor gypso illuminauero, ante bellicum toto
audiente exercitu stipula cecinero, quam tuas, le-
ctor, aures militaribus & togatis laudibus hoc vi-
ro & Rantzouidum familia dignis, implevero. Ea
enim

enim, vt paululum digrediamur, in hac Cymbris
ca parte longè ante abauorum memoriam,perpe-
tua & quasi per manus tradita laudum & hono-
rum lampade fulsit præ ceteris.

Verum cum fortiter facere,quàm fari malu-
erint,nec tam stylo luculento,quàm gladio corus-
cante pugnare in delicijs habuerint,nimis serò ad
literas Martium animum post tempora Caroli
Magni, qui primus studia artium, linguarum &
religionis in his oris excitauit, appulere. Quare
factum,vt vestigia huius familiæ, rerumq; in his
oris gestarum, rari annales extent, & difficulter
acta temporum eruantur,nisi in subsidium monu-
menta posita defunctis,& publici codicilli vocen-
tur, cuiusmodi mira est penuria. Credidere enim
nefas antiqui Holsati verbis suis,quàm pellibus
atramento illitis, appensa ceræ massa, fidem mi-
norem haberi. Asseruantur tamen à Ploënen-
sib, literæ datæ,anno post Christi redemptoris nata-
lem millesimo,ducentesimo, trigesimo tertio,qui-
bus iure ciuitatis, quod lus Lubecense hîc appel-
lant,donantur, mentione facta duorum Rantzo-
uiorum,qui actioni interfuisse scribuntur. Hi iam
tum apud Adolphum quartum comitem Cym-
bricæ oræ,qui postea cucillum relictâ gubernati-
onis mole,induit,summos magistratus & nomen
illustre gerebant.

V

Ex illo

Ex illo me hercle tempore, factis & splendore
familiaë, honores, et magistratus affecuti sunt max-
imos, & in pretio ab omnibus habiti, ita ut inde
facile colligi possit, tunc temporis etiam nomen
Rantzouiorum magnum & amplum fuisse. Nāq;
anno, qui fuit à salutifero partu millesimus, tre-
centesimus & trigessimus quartus, Kiloniæ sepul-
tus honorificè est Bruno Rantzouius, Vvolde-
mari ducis Iutlandiæ consiliarius summus: Sicuti
& eodem loco, à suis humatus conspicitur, anno
reparationis per virgineum partum millesimo,
trecentesimo, & nonagesimo, Vvoldemarius
Rantzouius, qui Nicolao comiti Holsatico à con-
silijs intimis fuit. Hæc testantur monumenta bene
meritis à gratis posteris erecta, quorum etiam nō
pauca in primario templo Itzehoënsi adhuc con-
spiciuntur.

Quod autem eorum res gestæ maxima ex par-
te, interciderunt, temporum istorum iniquitati as-
scribendum est, quemadmodū & illud, quod plu-
rimi Rantzouiorum sunt defuncti, in quorum
memoriā nulla sunt cōstituta monumenta, sola
posterorum culpa accidisse videtur. Silentio ta-
men præterire nequeo, hanc familiam Hambur-
gi canonicatum, Kilonij, Segebergæ, Itzehoæ, &
passim in vicinis Ecclesijs aliquot, beneficia Eccle-
siastica ad diuinos cultus celebrandos, ante multa
secula

secula instituisse & fundasse. Nam extant adhuc literæ, in cœnobio monialium Pretzensium, quæ testantur, quempiam ex ea Rantzouiorum stirpe progenitum, eidem cœnobio vnâ cum ceteris donis, militare munus, nempe viginti octo equos obtulisse, ac in memoriam progenitorum & posterorum suorum consecrassè. Quemadmodû & Metta Rantzouia, monasterio Itzehoënsi quinq; millia marcarum dono dedit.

Quod hæc familia etiam in magna semper fuerit existimatione, vel inde colligi potest, quod Holsati à Dithmaris anno 1404., iniquitate loci circumuenti & cæsi, vt Rantzouium & Poggeuiscum captos redimerent, opportunam munitionem Delbruggen, quæ prælustribus viris, vt occuparetur, constiterat, & præsidio valido tenebatur, hostibus Dithmaris, consentientibus principibus, & totius nobilitatis flore, reddiderunt. Nam quod quatuor & viginti Rantzouij, anno 1469. subscripserint ei scæderi, quod a primoribus totius ferè Holsaticæ nobilitatis, in omnes tã ciuitates, quam proximos duces, qui sententijs ab ijs latis minimè acquiescere, sed apud alios competentes iudices eos accusare vellent, ictum est, & præcipuè (quanquã testè) in Christiernum I. Daniæ Regem, fratre eius Gerhardo comite vt vocât Oldenburgensi, tyrannicè Holsaticam rem admi-

nistrante initum, id inquam, notius est, quam vt commemoratione indigeat. Quanquam magnam partem huius familiæ, propter imminens periculum in hoc consentire noluisse, veri simile videtur. Nam rex coniurationem, illi defensionem libertatis autumabant. Id tamen transactione ita sublatum est, vt neutri parti damno & noxæ fuerit.

Hic nequeo, quin recitem Rantzouios, nunc iam arces, pagos, & prædia fertilissima & amplissima vltra quadraginta possidere, & inter eos plerosq; longe censum Senatorum Romanorum, triginta millia aureorum prompta pecunia superare, nonnullis præsertim ad centena millia vsq; Dalerorum, vt vulgo dicunt, signata moneta progressis. Qui arma nunc ferunt, sexaginta inueniuntur: Inter quos Daniel Rantzouius primarius dux belli, quod Rex Danorum cum Suecis gerit: & Mauritius & Paulus Rantzouij, in expugnatione Gothana vnus turmæ ductores fuerunt. Plurimi autem horum apud Regem Daniæ, Ducesq; Holsatiæ consiliariorum munere funguntur. Im puberum masculorum tanta est copia, vt paucis annis numerum Fabiorum Romanorū superare aut adæquare possit. Quare cum hæc familia ante Caroli Magni tempora fuerit, & adhuc nihil aliud sit, quam bellicosorum militum & magnanimorum

morum ducum quasi perpetuum seminarium, & prædictas possessiones sine magna virtute non acquiescit, & tam diuturno tempore fuerit tutata, nonnullis ad principatus Ecclesiasticos, & Episcopales honores euectis: Spero nullum fore tam iniustum rerum aestimatorem, qui hac celebri Rantzouica arce descripta, aliquam mentionem fieri vetustatis & splendoris huius gentis ægrè ferat.

Quamquam ego sane parum de rebus gestis, & dignitate Rantzouiorum, in tam angusto temporis spatio, quo apud eos sum commoratus, explorare potuerim. Nam quod ad me attinet, ingratitude eluendæ maculæ gratia hanc opellam sumsi. Cacoethes scribendi & in bibliopolijs prostandi, non tam animum mihi pruriit, ita ut etiam nunc maximè exoptem, quod exoriatur aliquis, qui me longè à tergo relinquat, prorsusq; obscuret. Interea ego telam debitam, quod facere potui, licijs subactis pertexui. Si quid erit, ut erit, tuberosum, inæquale, minus elegans, te, candide lector, rogatum velim, ut quantum vituperij macies styli promeretur, tantundem veniæ ingratitude eluendæ causam à te impetrare, non grauatiim patiare.

BREVIS NARRATIO
VNA CVM EPISTOLIS ET EPI-

TAPHIIS NONNVLIS, DE VITA, PRÆCIPVIS
rebus gestis, & obitu, nobilis ac strenui viri, DANIELIS

RANTZOVII, copiarum serenissimi Regis

Danorum FRIDERICI II. in

Suecos primarij ductoris.

NObilis ac strenuus vir DANIEL RAN-
TZOVIVS, ex equestri & veteri RAN-
TZOVIORVM familia in Cymbria siue
Holsatia, patre Godtscalco, Regum Daniæ quõ-
dam consiliario, ac Domino castrorũ Nienhoues
& Vvammendorp natus, scientia rei militaris, vir-
tute, authoritate, & felicitate præstans fuit bella-
tor. Hic cum in teneris annis à patre mansuetio-
ribus literarum studijs addictus esset, summa cum
felicitate ijs incubuit, & præter Germanicam quæ
ipsi vernacula ac nativa fuit, linguas Latinam, Ita-
licam, & Danicam exacte & expedite calluit.

Postea verò, vt cum gloria ingenij bellicæ etiã
disciplinæ laudem coniungeret, progressu ætatis,
generosum ac Heroicis virtutibus excellentem
animum, siue diuino quondam instinctu, siue natu-
ræ etiam impetu atq; inflammatione adductus, ad-
rem militarem adiecit. Proinde vnâ cum Illu-
strissimo Holsatiæ Duce Adolpho, in Imperato-
riam Caroli V. aulam profectus est, ibidemq;
per

per triennium ferè commoratus, in Italiam contendit, vbi inter Caroli V. procures ac præfectos per quinquennium versatus, militiæ disciplinam percepit, cumq; ex eo singularis fortitudinis, cum summa prudentia coniunctæ eluceret significatio, vnus cohortis ductor ibi constitutus est.

Ex Italia ipsi reuerso, administratio arcis Peyne in ducatu Brunsvicensi sitæ, à principe Adolpho commissæ est. Cum autem tum temporis ab eodem Holsatiæ principe in Dithmarsiam bello domandam expeditio susciperetur, Daniel Rantzouius eum in vsum copijs vndiq; comparatis, in eo bello primò duabus cohortibus peditum est præfectus: Deinde verò, duce Schonuesio ab hostibus cæso, à legione eiusdem propter strenuam in bello nauatam operam, reiçq; militaris insignem peritiâ, in defuncti ducis locum surrogari postulatus est. Cum autem Dithmarsica gente sub iugum redacta, nouum bellum inter Regem Danorum & Suecos exortum esset, Daniel Regiæ Maiestati suam quoq; operam negare noluit, cum aliis qui iustam excusationem propter natam ex nobili Dammiorum familia sibi iam tum desponsatâ sponsam prætexere potuisset. Itaq; primo viginti quatuor cohortes peditû Regi adduxit, quarû ipse præfectus est designatus, mox autē ob summâ in rebus gerendis prudentiam & felicitatem, totius belli

us belli administrator, copiarumq; militarium in Suecos primarius dux est electus. In quod bellum difficillimum & iam septenne, vir animosus summis laboribus, & sudoribus bellicis perfunctus, pro rege suo, & regno Daniæ vitam, fortunas & omnia reliqua impendit: Diuersa & acerrima prælia cum Suecis, magna hostiū edita strage commisit: In campo Åstorfheide, quatuor millibus, viginti sex millia hostium in fugā vertit s. millib. ex his cæsis. Spacio semestri regnū Suetiæ, ad q; omnis aditus arduus & penitus obstructus videbatur, magna itinerum contentione ac difficultate, admirabiliq; adhibita celeritate, in ipsa hyeme per loca inaccessa, angusta, & ob copiosum numerum hostium, spe Danici exercitus delendi, & ab omni com meatu, reliquisq; copijs intercludendi, eò confluentium, iter faciens peragrauit, multasq; arces, pagos, & agros vastauit ac depopulatus est. Tres hostilium copiarum duces Regi suo captiuos tradidit, remq; singulari dexteritate eò perduxit, vt Rege Suecorum Erico armis exuto, à suisq; subditis in vincula coniecto, dux Findlandiæ Iohannes, frater ipsius, periculi imminētis ratione habita, tractationem pacis à Rege Daniæ per literas petierit, quam ipse Daniel, vir prudens vehementer dissuasit, sedulo monens, cum raro fides ab amicis præstetur, non temerè hosti credendum, sed armis decernens

decernendum, victoriaq̄ vtendum esse. Ideoq̄ Re-
gi periculum ob Suecorum metuendam cunctati-
onem impendens denuntiavit: Quod etiam rei
exitus comprobavit: Nam cum Dux Iohannes
interea exercitū magis armasset, atq̄ instruxisset,
bellumq̄ paulo post renouasset, Daniel Rantzo-
uius, exercitu Danico vnā cum tormentis bellicis
ad arcem Vvarpurgam reducto, vehementissimē
eam oppugnauit, in q̄na obsidione, dum ipse in di-
rigendis machinis æneis est occupatus, caput eius
globo ex hostili tormento exploso traiectum est,
quem ictū confestim mors ipsa consequitur, non
sine gemitu lachrimis & luctu totius exercitus ac
Regis, qui mortuum coram reliquis copijs lau-
dauit.

Et hoc modo vir omnium iudicio generosissi-
mus ac fortissimus habitus, in milites liberalis &
beneficus, acriter pro Rege & libertate Daniæ
pugnans, in ipso ætatis flore, ac splendoris, hono-
rumq̄ fastigio, immatura morte occubuit, & vi-
ctor in ipsa victoria periit. Ad cuius laudem hoc
etiam accedit, q̄ vtroq̄ parente, huius belli tem-
pore defuncto, Regem, paternæ hæreditatis ade-
undæ gratia non deseruerit, sed operam ei suam
vsq̄ ad extremum vitæ halitum præstiterit fide-
lissimam. Exuuiæ mortui duabus turmis equi-
tum vsq̄ ad mare Balthicum deductæ, iuxta teno-

rem testamenti ab ipso, sibi præfagiente, rerumq̃
humanarum fragilitatem perpendente conditi, in
auitum progenitorum ac maiorum suorum sepul-
crum, in æde sua parochiali in Vvestensehe sitū
illatæ, ac à Duce Adolpho, legatus Lubecensium,
& totius Holsatiæ nobilitate certissima & firmis-
sima futuræ resurrectionis spe, sepulturæ honorifi-
cè mandatæ sunt.

Decessit anno Domini M. D. LXIX die
II Mensis Nouembris.

HEINRICVS RANTZOVIVS

IOACHIMO HINCKIO I. V. DOCTORI,

Decano Bremensi S. P. D.

R Eddita mihi hodie ex Lubeca sunt literæ, vir
clarissime, ex quibus primò summa cum læti-
tia percepi, arcē Vvarpurgam à serenissimo Da-
norum Rege oppugnatam ac in deditionem reda-
ctam esse. Postquam autem paulò vltius legen-
do progressus, nobilem ac fortissimum virum,
ẽntilem & amicum meum Daniele Rantzov-
uium, copiarum Regis Daniæ in Suecos primari-
um ductorem, in hostili oppugnatione eius arcis
vnà cum ceteris versantem fortiter pugnando
mortem occubuisse intellexi, lætitia hæc in subitū
conuersa est in ærorē. Quanquam verò in cal-
ce earundē literarū adieclū erat, huiusmodi rumo-
rem,

rem, qui de luctuoso præstantissimi viri interitu
passim spargeretur, obscurum, incertumq̃ esse: Ta-
men nescio qua animi diuinatione, vel potius præ-
sagio permotus vereor, hanc famã veriore esse,
quàm vellem.

Nuper enim ipse Daniel Rantzouius ex ca-
stris literas ad me dedit, propria manu exaratas,
cum alioqui maximis & amplissimis negotijs bel-
licis impeditus, ministrorum suorum opera in scri-
bendo ante hac vti consueuerit. Hæ literæ omnẽ
præ se ferebant humanitatem, amorem, atq̃ bene-
uolentiam, & circa finem hæc sequentia verba la-
tina habebant: HIS VALE cum vxore & li-
beris tuis dilectissimis, meq̃ tibi commendatum
& seruum & amicum tuum promptissimum ha-
beto. Vale iterum atq̃ iterum &c. Ideoq̃ hæc
verba legenti mihi, nescio quo pacto sinistra suspi-
cio de graui aliquo casu, amico meo impendente
incidit. Auget hanc iniectam suspicionem, quod,
cum nuper quosdam versus, imaginibus ac tabu-
lis defunctorum quorundã Herôum ac Ducum,
in arce mea Bredenbergenli depictorum ascrip-
tos, ipsi legendos exhiberem, & inter hos, carmina
suæ quoq̃ picturæ subiecta, legeret, mutato non-
nihil vultu, omen illud auersatus, in hæc verba e-
ruperit: Quid viuus inter tot mortuos? Infelicis
enim ominis loco habebat, suam quoq̃ effigiẽ

inter defunctorum Ducum imagines collocatam
esse.

Postremo huc hesternæ noctis accedit somni-
um, quod de Danielis Rantzouij arce circiter au-
roram habui. Dormienti enim mihi visum est, me
ad eam arcem, cuius species, oculis in somnis obie-
cta erat, iter habere, eiusq; magnificam structuram
summa cum admiratione suspicere, sed mihi rur-
sus paulatim ab arce discedenti, vultumq; in eam
reflectenti, insignis arcis moles visa est in exiguum
lapideum subsidere monumentum, cuiusmodi il-
lud est, quod ante aliquot annos, patri meo in pri-
mario Diui Laurentij templo Itzehoen si statui cu-
raui. Cum autem somnia mea non omnino sint
vana, sed exitus & euentus ijs nonnunquam respō-
dere soleat, hæ & aliæ verisimiles rationes animū
meum, propter incredibilem amorem, quo ipsum
Danielem semper complexus sum, nihil non mali
suspicientem, in dolorem coniiciunt acerbissimū.

Sed cum |virum fortem, non solum in rebus se-
cundis, verum etiam aduersis, animi grauitatem,
constantiamq; tueri deceat, meo vulneri hoc reme-
dium adhibendum esse censeo, vt, si quid accide-
rit illi humanitus, harum rerum cogitatione dolo-
rem meum leniam: gentilem meum & amicum
Danielem, pro incolumitate & salute Regis ac pa-
triæ acriter pugnantem occubuisse, vtq; existimē,
vitam

vitam in satis multos annos ei prorogatam esse, cum præstantissimis rebus gestis, post multiplices et varias dimicationes, bellicosq; sudores, amplissima virtutis ornamenta, nempe gloriam immortalem, ad quam à pueritia inflammatus fuit, consecutus, posteris suis nominis & familiæ amplitudinem auctam & illustratam tradat, & relinquat: Cum Regis Daniæ copias per multos annos in Suecos duxerit, eorūq; exercitus tribus belli Ducibus captis, fuderit atq; dissipauerit: Deniq; cum maiorum suorum vestigijs insistens, Rantzouiorum more fortiter dimicando, mortem cum summa gloria oppetierit honestissimam.

Quare cum hæc ita sint, & ex præmissis indicijs nihil aliud colligi possit, quam eū ex hac mortali vita ad æternam vitam concessisse, non tam dolori indulgendum, quàm pijs manibus defuncti debitum & extremum officium præstandū esse arbitror, ideoq; breue Epitaphium in eius obitum à me conscriptum, gratitudinis ergo sepulcro amici mei incidi curabo. Quod tibi non exiguo fortasse dolore, ob hunc tristem & lacrimabilem casum affecto, significandum esse duxi. Plura ad te scriberem, verum summi luctus acerbitas me à scribendo auocat. His vale. Data ex castro Segeberg 27. Nouembris. Anno M. D. LXIX.

EPITAPHIVM DANIELIS
RANTZOVII AVTHORE
H R.

Nobili viro Danieli Rantzouio, equiti Holsato, Domino castrorum Nienhoues, Troieburgi & Vvoldenhorn: Belli inter Serenissimum Danorum Regem Fridericum II. & Suecos, per septennium gesti, summo Duci, & primario administratori: multarum pugnarum acerrimarum, cum Suecis manu prorsus impari commissarum victori: In illorum regione viarum obstrusarum, & ante hac incognitarum inuestigatori ac inuentori, eorundemq; vrbium, pagorum, & agrorum euerfori ac depopulatori, Arcis Vvarpurgæ expugnatori, de Rege ac regno Daniæ optimè merito, gentili, cognato, & amico suo charissimo, cum in obsidione dictæ arcis, tormento ictus, moriendo vincens vitam viriliter profuderit, Henricus Rantzouius D. Iohannis Rantzouij filius, in ducatib. Regis Daniæ Vicarius, hoc, nō tam priuati, quàm totius Daniæ ac Holsatiæ luctus perpetuum monumentum merens non sine lacrimis posuit.

Obijt anno Domini M. D. LXIX. XI. die
mensis Nouembris.

Ioachimus

IOACHIMVS HINCKIUS
I. V. D. NOBILI AC MAGNI
FICO VIRO HEINRICO RANTZO-
uio S. P. D.

Illustrissimus princeps meus Dux Adolphus an-
teuertit nuncium tuum de obitu clarissimi viri
Danielis Rantzouij gentilis tui: Veriusq; autem
literæ eò mihi fuerunt gratiores, quò magis ex ijs
perspexi, Illustrissimum principem pristinæ fa-
miliaritatis, te vero agnationis ius, & vtrunq; ve-
strum rerum ab eo gestarū gloriam, recto & gra-
to animi candore agnoscere. Dolet vterq; & non
immerito. Quid enim illi grauius accidere po-
tuit casu eius viri, quem inter domesticos educa-
tum, & albo senatorum ascriptum, periculo de ei-
us in re militari peritia & fide, bello Dithmarsico
facto, ad Danicum bellum sic emisit, vt virtutem
ducem, comitem verò fortunam adiunxisse ei vi-
deretur. Tuum verò mœrorem si quis miretur,
is plane ignorat, quantam animi perturbationem
bene etiam cordatis viris afferat agnatorum im-
matura mors, qui varijs bellorum casibus virtute
superatis, spem immortalis decoris visi sunt fami-
liæ suæ inuecturi.

Iustissime verò Serenissimus Rex noster eius
viri morte afficitur, cuius fidei hætenus grauissi-
mi belli sumā satis auspicatò crediderat. Te qui-
dem

dem fama de morte eius accepta perturbat, & mihi quoq; vt veteri eius amico permolesta est: Sed quo vultu optimum Regem existimas animam exhalantis coram spectasse decessum? Nosti Regis excellens & benignum ingenium, quàm arctè eos complectatur, quos exploratæ fidei, & integritatis ergò, charos habere coepit. Eius vicem in primis doleo, quod tali viro orbatus est, & ex animo precor æternum Deum, qui nouit Regem nostrum pacem maluisse quàm bellum, nisi lubrica hostiū fide, et vafriis artib. delusus, & retractus ad arma fuisset, vt hosti sanguinario Erynnides immitat, eiusq; robur frangat: Regem verò nostrum victorijs illustret, & diuturna pace vitā eius ad multos annos feliciter extendat.

Ad te quod attinet, æquum est vt luctum ponas. Neq; enim reduci ille ad vitam hanc potest, & omnino semel ei moriendum fuit. Quem casum cum subierit summa cum gloria, in conspectu Regis sui, fortiter pugnans, pro patria, pro aris & focus, & pro caussa iustissima, rebus antè sæpe feliciter gestis, quid tibi relinquitur, cur doleas? Neq; enim omniū belli ducibus, imò paucissimis tantalem vitæ exitum, qualem parens tuus habuit, contingere memini, qui post bellorum quasi compagine quadam conexorum, pluriumq; pugnarum illustres victorias domi suæ in complexu vxoris & li

& liberorum, nusq̃ à fortuna grauitè læsus, piè
& placidè vitam cum morte commutauit. Habet
hoc ad laudem & gloriam agnati tui non minimū
momenti, quod oblatam morte patris opulentam
hæreditatem, ædificijs & hortis Italica elegantia
exornatam, & adhæc sponsam moribus optimis
& forma insignem maluit, recrudescente hostium
culpa bello, negligere, quam Regis desertor vide-
ri. Merito igitur viuo illi abste honor hic est ha-
bitus, vt eius imago inter heroas domi tuæ ob be-
nè merita conspiceretur, qui vestræ familiæ per se
quidem satis illustri, non modicum belli splendo-
ris lumen videtur attulisse. Vale datæ Bremæ.
die 14. mensis Decembris, Anno. M. D. L X I X.

MICHAEL REDERS I. V. D.

ET DECANVS HAMBVRGENSIS.

NOBILI AC PRÆCLARO DOMINO HENRI-
co Rantzouio, regias in Holsatia vices gerenti
D. suo obseruando. S. P. D.

NVper ad me ex præfecturæ tuæ regio castro
Segebergensi, Nobilis & Magnifice D. Hen-
rice, de tristi obitu generosi tui gentilis Danielis
Rantzouij literas & amoris tui, & doloris testes
dedisti, quibus certè quod decebat, afficiebar ad-
modum. Quis enim non doleret, hunc Rantzo-
uium tantis præditum heroicis virtutibus, in ipso
fastigio præclaritatis, altioribus iam destinatum,
Y a deo

adeo subito & reipub. & gentilibus præreptum e
mori: qui non minus animi fortitudine, quam
rebus heroicè gestis, omnium quasi oculos in se
conuerterat, & apud remotissimos quoq; & nō
men & famam fuerat adeptus. Insigni hic amore
præ ceteris te amplectebatur, vnicè obseruabat, &
prælustre quid de vestra meditabatur prosapia.
Certè autem tales esse fortunæ vicibus & ludibriis
is expositos dolendum est: Non enim in eo ad
virtutem decrat quidquam, qui politioribus disci
plinis animum egregiè excoluerat, & ex ipsis fon
tibus priscam didicerat nobilitatem, antiquæ pro
cul Romanæ militiæ vestigia ambiens, et qui vir
tute magistra sub militaris disciplinæ proceribus
quondam præ excellentibus, bellicis se assuefece
rat legibus & armis: Qui tandem cum iam Hero
ici facinoris ei laurea, quod bellum gesserat, pro
ferentissimo Danorum rege difficillimum ad sep
tennium vsq; insigni fide & felici dexteritate, de
bebatur & præstò erat, proh dolor in ipsa Vvar
purgicæ arcis oppugnatione & expugnatione a
deo subito & infelicitè perijt. Vnde tu quidem,
vir præstantissime, Reipub: sortem penitus con
siderans maximè iam doles & afficeris. Nam in
ipsis tuæ administrationis difficultatibus, paucis
annis & patrem longè clarissimum, quo Cymbria
ea vestra felicitas fulciebatur, & nunc magnæ spei
propin

propinquum gentilem, ex nobili facinore heroas
simul amisisti. Verum quod ille in statu medio-
cri tantam est adeptus præminentiam & immor-
talem reliquæ rerum gestarum memoriam, pro
sui Regis salute strenuè pugnando vitam amit-
tens, quodq; humanæ pars erat fragilitatis, quem
aliàs vel febricula ex accidenti extinguere potuis-
set, decenter cogitabis, & dilectum tuum gaudis
æternis destinatum relinques. Nec enim vobis,
recordatione gentilitiæ virtutis, quæ & in parente
& Daniele nuper defuncto, alijsq; proavis fuit cō-
specta & in te conspicitur, Rantzouij deerunt uni-
puam: Quod tuæ quoq; plantulæ, quæ nunc edu-
cantur egregiè in locis ad virtutem commodis
tibi non obscure pollicentur. Deus ad prosperi-
tatem & præstantiam illos sospitet, & aliquando
eodem modo præminere faciat.

DANIELI, sicut à me flagitasti, Epicedion
aliquod rude conscripsi, quod ad te mitto. Fateor
autem inter tot occupationes forenses & molestias
publicas, mihi alioqui longis annis nec exercita-
to ad Poësin, non esse animum neq; nervos. Tibi
tamen morem gerere volui, non quod hæ nostræ
ineptiæ insculpi monumentis sepulturæ, sed pro
Epistola haberi debeant, vtinam tibi, cui me totū
debeo, & humiliter commendo satisfactum fo-
ret, quod opto, & pro salute & prosperitate tua

Y ij

Deum

Deum precor optimū maximū. Vale ex Ham-
burgo, decimo sexto Decembris. Anno L XIX.

EPITAPHIVM NOBILIS
HEROIS DANIELIS

RANTZOVII.

Siste gradum, faciliq. truces oculo aspice casus
Lector, & hac animo suspice fata graui.

DANIEL hac tenui tegitur RANTZOVIVS Vrba,
Bellica cui virtus nomen & omen erat.

At teneris siquidem lituos & castra secutus,

Castra peregrinus sanguinolenta iugis,

Claruit illustri terris virtute remotis,

Vicinamq. suo Marte notauit humum,

Balibica montosis vbi forte Suecus ab oris

Hostili versat littora adunca manu,

Immemor & patriæ legis Danica arma lacescit,

Regali hic iussu regia castra regit.

Atq. quot Iliacus quasi bellum attraxerat annos,

Belli dux simili Marte, fideq. gerit.

Hostem bis victor deuincit clade cruenta,

Et petit obscuris inuia regna vix:

Armatus belliq. duces audacibus armis

Tres capit, hostilem fertq. refertq. pedem.

Sed perit, & vincit tandem, Regiq. triumphum

Aptat sanguinis atq. trophæa genis.

Et sic,

*Et sic, cuius acer metuebat nomen & umbram
Suecus, inaccessis plebe tremante iugis;
Hic iacet extinctus: nigra tumultus arena,
Factus vipereis vermibus esca putris,
Quem pramatura Mars, morte peremit in ipso
Fama, atq; ætatis flore virente suo.
Fama, qua viuit gentilibus immortalis,
Et vitam, ex Christi vulnere, miles habet.
Hæc igitur monumenta videns, suspiria votis
Iunge decens lector, quò tibi fiat idem.*

ALIVD EPITAPHIVM DANIELIS RANTZOVII.

DANIELI RANTZOVIO HOLSATO NOBILITATE ET LAVDE GENERIS ANTIQVI CLARO, QVI PRIMA MOX ÆTATE, INGENVIS LITERIS INFORMANDVS DATVS A PATRE, ET ADOLESCENS factus, Holsatiæ Ducem Adolphum secutus in Imperatoris Caroli V. aulam, in qua triennium commoratus, hinc in Italiam profectus, exercendo militarem disciplinam, eam præstitit operam Imperatoris præfectis, per integros quinque annos, vt ad præcipua officia euectus fuerit. Inde reuersus in Germaniam, & ad Peinam militibus collectis, contendens contra Dithmarsos duo pedestria duxit signa, in quo bello Schonvuesio sub lato, à legione huius copiarum ductor fuit postulat. Tandem bello suborto inter Daniæ & Sue-

cia Reges, 24. cohortium rector primo factus, deinceps totius exercitus, & belli dux constitutus fuit: Quæ sibi commissa munera in septimum vsque annum tanta gessit fide & fortitudine, vt Sueciae Regis Erici exercitum, exigua manu congressus bis fuderit & profligarit, Regnum Sueciae ingressus hostiliter sex mensium spacio igne & gladio deuastarit, tres belli duces præcipuos cepit, & hostes ita afflixerit, vt compulsi sint Ericum Regem proprio carceri custodiendum includere, & necessariam sibi pacem petere, quæ quidem data his est, sed ipso prorsus dissuadente, quod eos oportunitatem tantum quærere animaduerteter, ratus non esse consulendum paci, quæ aliquid haberet periculi. Quod ipse mox extremo suo cum malo est expertus. Nam successor captiui Erici Regis Iohannes, sua opinione commodam nactus opportunitatem, ad arma cum redisset, & renouasset bellum, hic fortiter pugnando pro patria, & Regis sui salute, ante Vvarpurgum arcem munitam, sed machinis bellicis tum ita fractam & concussam, vt qui eam defendebant ad deditionem sint coacti, cecidit, petitus ictu globi ferrei, tormēto eiectione, victor tamen & gloriosus, cum mentis quodam prælagio paulo ante rite confecto testamento, de rebus omnibus suis commode disposuisset. Huic ergo viro, præstanti ingenio, doctrina
excellenti,

excellenti, Germanici, Latini, Italici & Danici sermonis rara facundia pariter instructo, religiosæ pietatis studio insigni prudentia, fortitudine, fide, humanitate, beneficentia & liberalitate erga omnes eximio victorioso & strenuo ac pie & sancte in terris mortuo, Anno Domini M.D.LXIX die vero XI. mensis Nouembris C. V. Ann. XL. M. I. D. III. Antonius et Petrus Rantzouij lugentes fratres ac heredes, memoriæ & pietatis ergò H. M.P.C.

Q V E R E L A

DANIAE DE OBITU NOBILISSIMI ET BEL-
lica virtute præstantiſſ. Herois DANIELIS
RANTZOVII, belli præfecti
supremi.

H E N N I N G O C V N R A D I N O

Gambriuio Autore.

Heu nihil humanum stabile est, fors cæca vagatur,
Ætaq; præcipiti turbine cuncta rotat.
Omnia ceu filo tenui pendentq; tremuntq;
Et varias affert qualibet hora vices.
Quid querar? inuisi dum Martis ad arma reuertens
Specto rebellantis, vimq; dolumq; plagæ:
Nil tam triste tuli, toto hoc discrimine belli,
Funera RANTZOVII quàm properata ducis.
Arx mihi de specula cui momen ad æquoris vnus
Adiace,

Adiacet, at facies altera spectat agros.
Machina cum lectis huc ducitur ænea signis,
Aggere, qua latuit cinctus & hostis aqua.
Singula dum lustrat ductor, tormentaq; muris
Applicat, heu vitæ prodigus ipse suæ:
Attulit huic datum celeres glans missa per auras,
Præbuit at victas hostica turba manus.
Hic vir erat, cuius fidei me debeo totam,
Summaq; cui nostri credita Martis erat.
Quicquid enim fueram fortunæ experta benignæ,
Illius in dextram, Numina prona, dabant.
Huic allapsa fuit niveis Victoria pennis,
Semper & in galea visa sedere viri est.
Magnanimo pugnans toties qui pectore, misit.
Milite non multo millia multa neci.
Irruit intrepidus, rapidum cœu fulmen in hostes,
Indomita sternens obuia quæq; manu:
Scipiades Italo velut agmina milite fundens,
Pœnorum domuit, corda superba, ducum.
Solutus in armatas non horruit ire phalanges,
Compulit & subita vertere terga fugæ:
Constitit in rutilis ut Scanderbegius armis,
Eruptq; oculis flamma, labrisq; cruor.
Sæpius ad solum, conterrita Suecia nomen
Palluit, & manes nunc stupefacta tremit.
Nam nisi victor humo decessit, & ardua victrix

Mens

*Mors quoq; fortuna, iam super astra volat.
Iamq; Ducis septem totos mihi nota per annos,
Consilium, Virtus, Dextera, corda, fides.
Non melius contra Troiam pugnabat Achilles,
Et non pro Troia fortior Hector erat:
Nec belli ulterius fama est dispersa per orbem,
Inclita quàm tanti gloria, spesq; Ducis.
Quem si nuper ego potuissem audire monentem,
Æquora cum duro frigore strinxit hyems.
Sed te nunc gemitu, frustra, votisq; requiro,
Te decorant lachrimis, Martia castra, suis.
Cærule te plorat sub fluctibus Amphitrite,
Ingemit & tinctis, Hæstia celsa, genis.
Rex etiam amissum: sed desino, nec mihi questus
Sarcire hæc poterunt damna, sed ipse Deus.*

CIMBRIÆ RESPONSIO.

*N*On equidem superos, aulæ cælestis, honores
Inuideo Iuueni, qui fortunata frequentat
Concilia Heroum, terris quos extulit altè,
Et cælo æquauit Virtus, vbi cernere coram
Tot datur illustres animas, vultusq; tueri
Rantzouij patris antiquos, & luce potiri
Communi, celeresq; poli mirarier orbeis:
At terris queror ereptum, florentibus annis,
Et tot dona simul prærepta: nec acrius vllum
Virtutis stimulabat amor, vis ignea menti,

Egregiusq; decor membris, & plurimus ample
Frontis bonos, oculiq; tremens ceu flamma, micantes,
Voxq; infraëta sono, vestigia stirpis auitæ:
Qui priscum Herminium sumtis præstaret in armis.
Hunc dudum agnoui generosum Cymbria partum,
Ausonia metuenda olim, domitrixq; Quiritum.
Hunc sibi gens Christi in Turcæ, Hesperiaq; furorem
Poscerit, & magno afflictis optaverit emptum.
Iamq; adèd concussa dolet Germania luctu,
Amissumq; gemit laceros diffusa capillos:
Qualis conueniens iuxta Tyberina fluenta,
Marcelli ad tumulum doluit Mauortia Roma.
Æternum ergò Heros salve fortissime, salve
Rantzouij clarum generis decus, optima dicent
Facta tua, extremo posita sub cardine gentes,
Germanamq; fidem extollent, bastosq; labores.
Quantum ô præsidium, quantum & spem Dania perdis,
Quo saluo, regnis equidem nil triste timeres,
Et quamuis cumulet strages, & cuncta cruentet,
Haud impunè tamen renouasset Suecia Martem.
At tu magne Heros, nunc cum consorte laborum
Francisco, dederat quem stirps Brochusia, terras
Discordes, obitu liquistis, & altera regna
Vnanimes colitis, quos sancto fœdere iunxit
Vna fides, atq; vnus amor, mors sustulit vna:
Illinc despicitis viles ex athlere curas,

Et

Et tumidos fastus, inceptaq; callida mentis:
At potius, multos quæ vicerit vna triumphos,
Optatis pacem: date pacem optantibus alba
Lilia, Narcissumq; immortalesq; Amarantos,
Et caro cineri extremum persoluite munus,
Ad Boream cui Mars struxit pater ipse sepulcrum.
Vita hæc est flori similis, qui nascitur horto,
Mane leuans pulcrum caput, ac mox vespere ponens,
Momentoq; hominum res omnis vertitur vno:
Æternum at superat virtus, magni æmula Solis,
Lustrantis cælum radijs, terrasq; calenteis,
Et fruitur famæ nunquam morientis honore.
At tibi ductores fidos, victriciaq; arma
Sufficiat, solo qui temperat omnia nutu.

Calend. Decembr. Anno M. D. LXIX.

EPITAPHIUM

FORTISSIMI HEROIS, GENERE ET VIR-
tute bellica clariss. DANIELIS RAN-
TZOVII belli Danici ducis primarij.

Autore H. C. G.

Hoc DANIEL tegitur, Manortis gloria, busto,
RANTZOVIDVM antiquo stēmate natus eques.
Hic hominum mores, vt noscere posset, & vrbes,
Lustravit patria dispersa regna solo

Palladia instructum nobile pectus erat.
Effet at immensi terror, cum Carolus, orbis,
Auspicijs diui Caesaris, arma tulit.
Inde fuit virtus illustribus edita factis,
Nota per Eoas, Hesperiasq; plagas,
Dextraq; cum Regi, perspecta, fidesq; fuissent,
Et noua cum Suecis bella gerenda forent:
Solutus erat, rerum moles quem tanta vocabat,
Totius huic belli, credita summa, Duci est.
Maxima cum sauis inijt bis praelia Suecis,
Bis victor, capti tresq; fuere duces,
Semper & affulsit proprio victoria fato,
Arduus inuicta qua tulit arma manu.
Daniae viuens fuit hic tutela coronae,
Magnanimo praestans pectore, mente sagax:
Quicquid consilio gestum est, dextraq; sub armis,
RANTZOVII dextra, consilioq; stetit.
Ductorem hunc summum iam septima viderat aestas,
Et poterat meritis laudis honore frui:
Warpurgam demum sed milite cinxerat arcem,
Camaq; fulmineos misit vtrinq; globos:
Hic fortem impendit Regi, patriaq; cruorem,
Vitaq; sub diro Marte profusa fuit.
Hunc Rex, hunc patria, ipsa salus hunc publica luxit,
Famaq; RANTZOVIDVM tollit in orbe decus,
Aethere mens stellis certat fulgore coruscis,

Quam

*Quam sola in Christum vexit ad astra, fides.
Hic Mars ad tumulum Herois, virtusq; parentant,
Et spargit lacrimas, Dania tota, suas.*

EPIGRAMMA.

*Vldit vt exanimum DANIELEM Dania, dixit:
Fortius hoc belli tempore, nil habui.
Et meritò, hoc habui nil fidius, addere possum,
Nostrorum, tamen hoc pace loquor, Procerum.*

Grabschrifft / Daniel Kankowen
Vff deutsch.

Nach deme der Gestrenge vnd Ehrveste Danis
el Kankow / Gotschen Sone/inhaber der heuser
Nyenhouses / Tropeburg vnd Woldenhorn, etc. der
König: Mayr. vnd dem Reich zu Dennemarc vor einen
Feldobersten/gegen Schweden vnd derselben König/saß
in das siebend jar gedienet / vnd in derselbigen zeit / mit
den Feinden viel Schermüßel vnd Schlachtung ge-
halten/darunter die fürnemeste vff Ausruffheide gewes-
sen/da er mit vier tausent Man 2 6000. aus dem Fels
de geschlagen / vnd in Schweden bis anher vnerfarene
wege eröffinet/vnd in dem harten Winter/vngeachtet der
Feinde gewaltige ver hinderung/vnd teglich Prostant ab-
strickung/gezogen: Drey Feld obersten mit seinem hauf-
fen gefangen/vnd es so weit gebracht/das König Erich
in gefengnis gerahen/könig Hans vmb Friedts hand-
lung gesonnen/ vnd das Haus Nahrburg beleagert/das

nacher ergeben müssen/ vnd sonst allezeit sich trewlich/
ehrlich/manlich/vnd ritterlich in seinem dienst/gegen sei-
nen König vnd Herrn/dem reich Dennemarcken vnd sei-
nem Vaterland zu gutem / verhalten / dafür auch sein
Blut vnd Gut vergossen vnd gespildet/So hat Heinrich
Xankow seligen Herrn Johans Son/der König. Mape.
zu Dennemarcken etc. in den Fürstenthumben / Stads-
halter/ seinem freundlichen lieben Vettern vnd gewes-
nem gutem gesellen vnd freunde/dis zu einer gedechtnis/
sme zu ehren / vnd anzeigung irer vutereinander gehab-
ten Freundschaft/bey seinem Grabe auffrichten vnd se-
zen lassen.

Vnd ist erschossen worden im Jar nach
Christi Geburt M. D. L X I X. Am
11. Tage des Monats Nouembris zwie-
seten zehen vnd eilff vñhren.

EPITAPHIVM STRENVV,
NOBILIS, MAGNANIMI ET FOR-

tissimi viri, DANIELIS RANTZOVII.

AVTORE M. MARTINO CORONAE O.

DA claro cineriflores, Holsatica tellus,
Huic, tibi qui vitam corpus opesq; dedit.
Hic iacet æternis DANIEL dignissimus annis,
RANTZOVIVS patriæ nobilitatis honos.
Qui pietatis amans, prudens, studiosus honesti,
Fortis magnanimo pectore miles erat.
Holsata vitales puerum produxit in auras,
Ingenijs, opibus, terra virisq; potens.
Quam variæ pulcro fuerint in corpore dotes,
Nullius, ut par est, Musa referre potest.
Ingenuas artes teneris studiosus ab annis,
Cum generis iunxit nobilitate sui.
Cura etiam inprimis varias perdiscere linguas,
Et cultum eloquio pectus habere, fuit.
Italicæ gnarus linguæ fuit atq; Latinæ,
Reddebat proprio Gallica verba sono.
Danica cum Danis, cum Suecis Suecia verba
Ut sibi Germano calluit ore loqui.
Adde quod & patriæ talis facundia linguæ,
Qualis in Holsatico vix fuit vlla solo.
Post ubi iam docto mature accesserat ætas

Contulit ad magni primum se Caesaris aulam,
(Carolus is Caesar nomine Quintus erat)
Quà cum monstrasset primum sese inclyta virtus,
Nollet & obscuro tecta latere loco:
Carolus ingenium propter præclaraq; facta,
Præficiens Aquilis auxit honore, suis.
Fortiaq; Italicis generet cum Caesar in oris,
Militis inuicti robore bella potens.
Quing. fuit belli Præfectus strenuus annos,
Martis onus dubij sustinuitq; graue.
Sæpius instruxit solerti pectore pugnas,
Sæpius inuictas mouit ad arma manus.

Postea Dithmarsis inferre ferocibus arma,
Holsatici quando constituere Duces:
Hic primus iuuenes lectos sub signa vocauit,
Quo tua sunt firmo mœnia Peyna loco,
Cumq; feros miles iam bello inuaderet hostes,
Principio vnius dux legionis erat.
At postquam globulo cecidit Schoneuesius ictus,
Machina quem belli sulphure mota iacit:
Protinus illius Danieli traditur agmen,
Præfectus cuius fidus & acer erat.
Egregiaq; fuit nactus virtute fauorem,
Principibus carus militibusq; suis.

Cumq;

Cumq; laceſſitus Fredericus ab hoſte ſecundus
In Sueciam totis viribus arma tulit,
Fortia militia Frederici ſigna ſecutus,
Difficilis belli ſuſcipiebat opus.
Quod totis ſeptem geritur dum fortiter annis,
Addictus Regi non ſine laude fuit,
Illius hoc longo virtus eſt cognita bello,
Marte fero quoties pugna cienda fui.
Milite Germano vix dum ſex menſibus actis,
Peruaſit regnum, Suece ſuperbe, tuum
Omnia concutiens vbi triſtibus oppida bellis,
Suecorum ferro depopulatur agros.
Exiguaq; manu caſo bis fortiter hoſte,
Conſtituit Suetico leta trophæa ſolo.
Præcipuumq; ducem belli certamine vicit,
Compulſit & duro ſubdere colla iugo.
Illius auſpicijs belli rex autor ERICVS
Captus ab indigenis vincula dura tulit.
Poſtea ſed Princeps capto iam fratre IOHANNES,
Regia concordis ſceptra favore tulit.
Qui ſeſe pacis cum conditionibus offert
Principio, infida non ſine fraude tamen:
Diſſuadet temere poſitis deſiſtere ab armis,
Non fore conſtantem dicit in hoſte fidem.
Rara fides inter cum ſit quoq; ſanguine iunctos,

Verba fidem inueniunt: sub blanda pace IOHANNES
En noua disrupto fœdere bella parat.
Danorum celebri fama notissima terris
Arx iacet, in firmo vix capienda loco:
Impositum primo Wärebürgum tempore nomen,
Quod veluti custos sit regionis, habet.
Quam Suecus captam seu vi seu fraude tenebat,
Aulſam regno, Rex FREDERICE, tuo.
Hanc ubi vindicibus cinctam legionibus, ultor
Ipse recepturus fulmine Martis erat:
Ictus glande cadit, postquam victoria parta,
Et se compulsus dedere Suecus erat.
Ergò cadis DANIEL post tot tantosq; labores,
Confecto hoc bello nec superesse potes?
Hei mihi præsidium quantum Respublica nostra,
Et decus, hoc vno perdidit orba viro.
Sed quoniam Christum, precibusq; fideq; professus
Continuit fidos in statione pedes:
Ergo ubi militibus Christus sua præmia reddet,
Illius ornabit parta corona caput.
At tune vanos agites iam Suece triumphos,
Hic vere victo robore mortis ouat.

Versus continentes numerum anni, quo obiit
Daniel Rantzouius.

Capta foret regi FREDERICO SVEDIA: si non
Te DANIEL tristi Lachesis fera sorte TVLIſſet.

F I N I S.